

清史纪事本末

黄鸿寿

文硕阁

wenshuoge.com

关于我们	3
卷六、削平流寇	5
卷七、多尔袞摄政及诸王内讧	7
卷十一、开国法制兵制及官制	10
卷十二、康熙勤政	14
卷十五、欧人通商布教及和议之开始	22
卷十六、台湾朱一贵之乱	25
卷二十、文字之狱	27
卷二十四、兄弟猜忌及大臣之逐戮	32
卷二十九、增加兵额	35
卷三十、苗族及金川之征剿	38
卷三十一、準部及回部之平定	41
卷三十二、西南诸国之宾服	44
卷三十三、台湾林爽文之乱	47
卷三十六、内禅之真相	49
卷三十七、嘉庆中衰	51
卷三十九、中英交涉之变态	56
卷四十一、回部张格尔之役	58
卷四十六、英法联军入京及和约	59
卷四十七、俄订爱珲天津北京诸条约	62
卷四十九、湘军水师之编制	64
卷五十四、天津教案	66
卷五十八、通使及选派留学	69
卷五十九、英订烟台条约及续约	74
卷六十一、藩属之丧失	79
卷六十八、自立军之失败	83
卷七十一、改订藏印条约	86
卷七十四、谕禁鸦片之严厉	89
卷七十五、宣统嗣立	93
卷七十七、假饰立宪及组织贵族内阁	97
卷七十九、铁路国有政策	99

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

卷六、削平流寇

顺治元年，夏四月，流寇李自成自永平遁还京师，僭帝号于武英殿，遂奔山西。吴三桂破自成于山海关。自成走永平，三桂追至，自成遣使赴其军中议和。三桂曰：“归我太子、二王而复可。”自成出太子见三桂，三桂先令守备张成指挥范玉各率兵一千，用贼旗帜东西设伏，俟太子出，疾击贼营，又令都统耿士良率全军为应，以夺太子。自成果中伏大败，怒杀三桂之父襄及其家属，遂僭号称大顺永昌元年，追尊七代皆为帝后，立妻高氏为皇后，衮冕列仗，郊天受朝贺。是夕，纵火焚宫殿，诘旦狭二王西走。三桂望城火起，知自成已走，传谕京师，称护太子入城即大位。摄政王多尔袞不许，檄之西行，三桂乃送太子于高起潜所（旋逸于民间），起兵追自成。秋七月，李自成遁归西安。自成既西走至定州，吴三桂追及之于清水河，自成迎战，复大败，其将谷可成阵歿，遂走屯真定。三桂与辽东巡抚黎玉田合兵追及之，自成勒精骑迎之，三桂张二翼以进，斩首万级，自成益兵搏战，率诸将直逼营前，三桂分兵迭战，自晨至暮，自成中流矢坠马，掖而骑，拔营西遁，度故关入山西，三桂以兵逐之，及关而止，遂还京师。时多尔袞已定燕京，晋三桂爵平西王。自成至平阳，以谗杀其将李岩。岩故劝自成以不杀收人心。其在京师，诸贼日杀人，而岩于士大夫无所拷掠，又尝保护懿安皇后出险而俾之从容自死，军中多称之。定州之败，传言河南州县多反正，岩请率兵往。牛金星阴告自成曰：“岩，雄武有大略，非久居人下者，且河南，岩故乡，若以大兵与之，是假蛟龙以云雨，必不制矣。”因劝自成除之，遂收杀岩及其北车，于是军士解体，自成遂不能复战而复归西安。遣别将攻陷汉中，复分兵出潼关，掠河南及四川之保宁一路。张献忠出兵拒之，乃还。八月，都统叶臣败贼于府谷。自成将李过自新安纠众三万犯府谷，逼大同叶臣出兵击之，歼殄过半，过中创，窜归绥德。冬十月，遣英亲王阿济格、豫亲王多铎分两路趋西安讨李自成。时帝至盛京，近畿诸统兵官先后奏捉，直隶巡抚卫周允等削平真定、大名、顺德、广平四府山寨，都统叶臣等进平三晋，所至迎降。巡抚马国柱进剿汾州、平阳诸寇，山西悉平。肃王豪格平定清州满家洞各路，山东诸郡皆定。于是议大举入陕，分两路出师，以阿济格为靖远大将军，率吴三桂、尚可喜等，由大同边外，会诸蒙古兵赴榆林、延安，出陕西之背。以多铎为定国大将军，率孔有德等由河南夹攻潼关，期与西安会师。十二月，多铎败贼于洛阳，进攻陕州，破之。多铎军渡孟津，败寇将张有声于洛阳，收延河寨堡。进至陕州，张有曾据灵宝拒守，前锋参领索浑等击破之，尽收潼关外地。

二年，春正月，李自成率师援潼关，败绩，遁归西安。自成将刘宗敏盛兵潼关，为守御计。多铎军至，自成将刘芳亮迎拒，败之。自成亲率兵来援，令宗敏依山为阵以待。时多铎以火炮未至，遣前锋将索浑以兵三千，距关二十里立营。宗敏围之三日夜，人马寂然，寇众莫测，所以不敢击。及师大集，自成出关迎战，不利，遣将马世耀以众伪降，多铎斩之。自成欲返据延安，而阿济格一军已自保德州，编筏渡河入绥德，连下延安、鄜州，逼西安之北，自成腹背受敌，弃关还西安。二月，多铎入西安，李自成走襄阳。潼关之败自成将谷英、李过俱溃逃，惟李锦以榆林一

军纵之。自成知西安不能守，令田见秀烧仓廩，焚宫室，出东门，由商州龙驹寨走武关以入襄阳。方自之命见秀焚积聚，并焚宫室市里也，会自成已去，见秀曰：秦人饥，留此米活百姓，止烧东城一楼。追及自成于商州曰：“已焚矣！”后刘宗敏等宗族坟墓在秦中者皆被诛毁，独见秀家获免。夏五月，阿济格追李自成，大破之。自成走死，自成至武昌，左良玉已率众东下，城中无人。自成诸将田见秀、袁宗第、刘体干、刘芳亮、张鼎、吴从义、牛万才等皆从入。众尚五十万，分为四十八部，改江夏为瑞符县，铸永昌钱，谋夺舟东下取宣城曰：“西北虽不定，东南距再失之。”将发而阴霾四塞，暴雨烈风，旗枪尽折。又恐阿济格蹶其后，誓言往取南京。一夕拔营起，思据湖南，命其四十八部先发，而自以十二骑殿。忽军骑趋通山之九宫山，入玄帝庙。乡兵疑为劫盗，刃劈之死，其众悉投械于明湖广总督何胜蛟。隆武帝赐其名营曰“忠贞”。腾蛟参以旧军，分为十三镇，列湖西北，赐自成子锦名赤心。弟一功名必正，皆挂龙虎将军，封列侯。妻高氏，忠义夫人。自成乱中国二十年，陷帝都，覆庙社。及死，其众五十万，悉归腾蛟，一时称异事。而腾蛟口不言功，上疏但言元凶已除，稍泄神人之愤，宜告谢郊庙，人以此多之。冬十二月，豪格入顺庆，获张献忠，磔之。献忠于元年八月据成都，僭号大西，改元大顺，名成都曰西京，遣孙可旺、艾能奇、白文选等分屠附近诸郡邑，全蜀数千里无人迹。川中民尽，乃谋窥西安，尽焚成都宫殿庐舍，夷其城。率众出川北，又欲尽杀川兵，其保宁守将刘进忠故统川兵，献忠将执之而坑其众。泄言于闻者，进忠闻之，率一军逃。会豪格军至汉中，进忠来奔，请为向导。至盐亭丁充间之凤凰坡，会大雾，潜勒军登山，贼谍驰告。献忠以进忠守朝天关，不虞兵至也，斩之，如是者三，豪格挥铁骑促之。时方辰时，献忠含饭命牙将数十人仓皇出视，进忠指善射者章京布兰射之，中其额。献忠逃逃伏积薪下，曳出，磔之，其将孙可旺等走遵义。

四年，春二月，孙可旺陷明遵义，寻走贵州。贼入遵义，奉献忠妻刘氏为主，驻桃花洞。已而，豪格师克重庆，可旺乃焚贼后，遁入贵州，流寇悉平。

卷七、多尔袞摄政及诸王内讧

明思宗崇祯十六年，秋八月，清世祖袭帝位，以明年为顺治元年。帝时甫六岁，诸王贝勒集议以郑亲王哈朗、睿亲王金尔袞辅政。二王皆帝叔父也。冬十月，豫郡王多铎以谋夺大学士范文程妻，事觉，审讯得实，罚银一千两，夺十五牛录。肃亲王豪格坐知情不举发，罚银三十两。多铎为多尔袞同母弟，多尔袞无子，以其子多尔博为嗣，故敢恃势怙恶如此。豪格为帝兄，多尔袞素忌之，故借事苛罚以泄私愤。十二月，罢诸王贝勒等办事院判事务，并谕都察院嗣后王贝勒等归该衙门稽察，有事应纠参者，须据实奏闻。时多尔袞欲独专盛权，凡王贝勒等管理部务，概行停止。

世祖顺治元年，春正月，郑亲王济尔哈朗集内三院六部、都察院、理藩院堂官，谕曰：“嗣后凡各衙门办理事务，或有应白于辅政王者、或有记注者皆先后知睿亲王，档子书名亦宜先书睿亲王名。”多尔袞不愿济尔哈朗预政，济尔哈朗谨让之，故有此谕。二月豫郡王多铎以擅入户部衙门，按籍集视八旗女子，下部核实，罚银五百两。夏四月，固山额真、河洛会等讦告肃亲王豪格言词悖妄，讯实，废为庶人。豪格以多尔袞心怀篡逆，目击不平，形于词色。河洛会党附多尔袞，乃以首告。多尔袞指为诽谤，即幽之，寻释，废为庶人。俄穆克图、杨善、伊成格、罗硕等坐附豪格为乱，不行出首，俱弃市，河洛会、潭泰、图赖、索尼等举发有功，各赏银马、鞍辔，并籍俄穆克图等家产给与之，多尔袞寻帅师经略中原。五月，摄政睿亲王多尔袞师至燕京，入朝阳门，内监以故明卤簿、御辇陈皇城外，启请乘辇。多尔袞曰：“予法周公辅冲主，不当乘辇。”众曰：“周公曾负扆摄国事，今王宜乘辇。”曰：“予来定天下，不可不从众意”乃陈卤簿、乘辇入武英殿，升御座受贺。秋九月，帝至京师。冬十月，加封多尔袞为皇叔父摄政王，命礼部建碑纪绩。齐尔哈朗为信义辅政叔王，复豪格肃亲王爵。英郡王阿济格、豫郡王多铎俱晋亲王，余俱受赐有差。

二年，秋八月，降英亲王阿济格为郡王。阿济格，多尔袞同母兄也，于追捕流贼回京时诬报李自成身死，且不候旨班师，又出征时胁令巡抚，释免逮问道负，及越境过鄂尔多斯土默特地方，索取马匹，至是议罪，降为郡王，仍责令追剿流寇。冬十月，加封和硕豫亲王多铎为和硕德豫亲王。十二月，皇叔父摄政王多尔袞召集诸王、贝勒、贝子、公、大臣等，遣人传语曰：“今观诸王大臣，但知谄媚于予一人，未见有尊崇皇上者，予岂能容此？昔太宗升遐，嗣君未立，英王、豫王跪请予即尊位，予曾以死固辞，遂奉皇上缵承大统。似此危疑之时，且知其不可，今乃欲以此相尝试乎？嗣后有尽忠皇上者，予重之爱之，否则祖宗法典具在，决不尔宥也！”时诸王贝勒皆以为然，惟豫王多铎默然不答。

三年，夏四月，多尔袞谕内阁：嗣后诸王大臣差遣在外，凡有启奏，具本御前。予处启本，着永行停止。

四年，春正月，罚辅政郑亲王济尔哈朗银二十两，以王殿台基逾制，及擅用铜狮龟鹤也。秋七月，多尔袞谕内大臣、各部尚书等曰：“前大臣等，金以和硕德豫亲王为予季弟，故犹豫未果。然予恭摄大政，简贤屈不肖，国之巨典，乌容詹顾。兹尔等可偕诸王定议，以闻众金为然，议上。”于是多尔袞进多铎而诫之曰：“汝继子辅政，益加勤勉，斯名誉非小矣。”翌日，帝御太和殿，册封多铎为辅政叔德豫亲王，多尔袞寻谕内院、都察院、理藩院等衙门曰：前令辅政德豫亲王、和硕亲王共听政务，今和硕郑亲王已经停罢，止令辅政德豫亲王与闻。凡各部院事务有亲理者，有应辅政德豫亲王代理者，开列具奏。

五年春三月，降郑亲王为多罗郡王，贝子屯齐、尚善、齐哈及公扎哈纳、富喇塔、努赛等讦告郑王济尔哈朗当太宗崩时，欲立肃王豪格为君，以帝为太子。词连诸人，齐集质讯。经王大臣等议上，郑王、肃王俱论死。得旨，郑王革去亲王爵，降为多罗郡王，余得罪者凡数十人。肃亲王免死，后以失察兵官冒功事拟死。得旨，如此处分，诚为不忍，不准行。多尔袞心忌豪格，必欲除之，使诸王内大臣等反复奏争，乃命幽繫之。时豪格新自四川立大功，回未久也，寻毙于狱，间者哀之。冬十一月，覃恩大赦，加皇叔父摄政王为皇父摄政王，凡进呈本章旨意，俱书皇父摄政王。

六年，春二月，皇父摄政王多尔袞统兵征大同。三月，多尔袞师入寇家寨，间辅政豫亲王多铎出痘，即日旋师，至居庸关得讣。是日暮，驰入京城。夏六月，多尔袞复征大同，谕内三院及部院等衙门官，曰：“予帅师西行，不日言旋，尔等宜各勤执掌。”又谕谭泰、河洛会、冷僧机、刚林、范文程曰：“各部院事务，令尔等裁决，其军国大事，由英亲王等公同商议。可缓者，著候予还，不可缓者，即行启知。”秋七月，多尔袞至阿鲁席巴尔台，罢大同之行，猎而还。冬十月，多尔袞帅师征喀尔哈部二楚虎尔，帝亲送之。

十一月，多尔袞军至喀吞布勒克，闻元妃有疾，乃旋师。

十二月，多尔袞元妃博尔济锦氏卒。

七年，春正月，多尔袞以玉宝追封其妃博尔济锦氏为敬孝忠恭正宫元妃，旋纳肃亲王豪格福晋博尔济锦氏为妃。夏五月，多尔袞率诸王大臣出猎于山海关。秋七月，多尔袞谕工部，于边外筑城，为夏日避暑之地。一日，贝子锡翰等诣多尔袞王府视疾，多尔袞忿曰：“顷子罹此莫大之忧，体不复快。上虽人主，念些大故，亦宜循家人礼，一为临幸。若谓上方幼冲，尔等皆亲近大臣也。”又曰：“尔等毋以予主擅请临幸。”顷之驾至，多尔袞让翰等曰：“尔等故达子令，擅请驾临，其意以上至，即可借以释尔罪乎？”言讫，向翰等跪且拜，至是下翰等鞠讯，降翰为集国公，又以一等精奇尼哈番鳌拜目睹翰等罪状，不即执讯，降为一等阿思哈番，余降黜有差。冬十一月，多尔袞以有疾不乐，率诸王、贝勒、贝子、公等及八旗固山、额真、官兵猎于边外。十二月，多尔袞卒于喀喇城，年三十有九，诏臣民易服举丧。议悉用皇帝礼。寻命王府所有信符，收贮内库。又命吏部取赏功册进大内。

八年，春正月，祔多尔袞主于太庙，追尊为义皇帝，庙号成宗。英亲王阿济格有罪，赐自尽，其党议罪正法者数人。二月，谕户、工二部停止边外筑城工程，寻有旨，宣布多尔袞罪状，撤去庙享，其母、妻封典悉行追夺，籍没家产，停其嗣子多尔博袞爵，其弟豫亲王多铎降为郡王，大学士刚林、祁充格具以阿附置重典，范文程从宽革职，河洛会、英拜、罗什博尔惠、谭泰、巩阿岱、锡翰、席讷布库、冷僧机俱先后伏诛，拜尹图以年老免死，禁锢狱中。

十年，秋八月，废后博尔济锦氏降为静妃，改居侧宫。以后乃多尔袞于帝幼冲时，因亲订婚，未经选择故也。

编者曰：初多尔袞与郑王同受遗诏辅政，欲专大权，日夜谋去郑王。郑王为人谨愿，遇事逊让，多尔袞意尤不满，然以与诸王、贝勒盟誓在先，不敢背众肆行。及统兵入关，定国开基，以成一统之业，厥功最著，权势益增，党附日众。援引同母北豫王为辅政叔王，停止郑王听政，又素忌肃王，因使其党贝子屯齐等，诬告郑王定策时，归心肃王，密谋推戴，几陷肃王于大辟。其后肃王不得其死，复夺其妃，诸王等始闪然内愤，群为侧目矣。多尔袞又自以元辅懿亲，倚势骄据，出入宫禁，逆迹外昭，君臣之间不复更存形迹。凡有批拟，即用皇父摄政王之旨，又收信符入其府中。死时恩礼尚厚，未几其近侍苏克萨哈、詹岱、穆济伦等，首告其私制帝服，藏匿御用珠宝，指为潜图不轨之证。诏下廷议，郑巽、端重、敬谨诸王合词证成其狱，以致得罪，此固由于多尔袞摄政有年，专擅日久，蓄养群奸。谗构骨肉，诸王恶而畏之，隐忍不敢发言，故于其身后，群起而攻之，以构成此大狱也。郑王亦叔父也，假令多尔袞能如王之存心克让，善远权势，以道事君，同心辅政，及身克保宗藩，后裔长延带砺，岂不懿欤？惜乎器小，见不及此也。

卷十一、开国法制兵制及官制

明神宗万历十五年，春正月，满洲始定国政。禁悖乱，戢盗贼，法制以立。

四十三年，冬十一月，满洲置理政听讼大臣五人，札尔固齐(〈蒙古语理事官也〉)十人佐理国事。凡有听断之事，先经札尔固齐十人鞠讯，然后言于五大臣。五大臣亲行复审，然后言于诸贝勒。众议既定，犹恐有冤抑，国主更详问之，详慎讼狱，国人称之。

十二月，满洲定兵制。先是万历十一年，满洲以甲十三副攻图伦城，破之，益厉兵力，得以次削平诸部。初定出兵校猎，不计人数之多寡，各随族党屯寨而行。每人各取一矢，凡十人设长一人领之，其长称为牛录额真。后于二十九年正月间，以诸国徕服人众，编三百人为一牛录，每牛录设一额真(〈后改称为牛录章京，即佐领〉)，至五牛录设一甲喇额真(〈后改称甲喇章京，即参领〉)，五甲喇设一固山额真(〈后改称固山章京，即都统〉)，每固山额真左右设两梅勒额真(〈后改称梅勒章京，即副都统〉)。初设有四旗，旗以纯色为别，曰黄、曰红、曰蓝、曰白。至是增设四旗，参用其色镶之，幅之黄、白、蓝者，缘以红；幅之红者，缘以白，共为八旗。行军时地广则八旗并立，地狭则八旗合一路而行。军士禁喧嚣，行伍禁搀越。当两军交战，被坚甲执长矛大刀者为前锋，被轻甲善射者自后冲击，俾精兵立马他处，相机接应焉。

四十六年，夏四月，满洲颁定练兵之制。其法，每一牛录制云梯二，出甲二十以备攻城。凡兵士自出兵日以至班师，各随牛录勿离，如离本纛，执而诘问之。甲喇、牛录等管官不以所颁法令申诫众军者，各罚马一匹。若谕之不听，敢违军令者，论死。凡攻城，不得一二人争先竞进，若一二人轻进致受损伤者，赏不及，虽战死，不为功。迨列阵既定，然后先登者，始录其功，有一二人先登陷城者，即驰告本旗大臣。俟一军毕登，然后鸣螺，俾众军听螺声而并进焉。

四十八年，春三月，满洲改设八旗官，分总兵官为三等，其副将、参将、游击亦如之。各牛录额真俱为备御官，每牛录下设千总四人。后设蒙古、汉军各八旗，其旗色与满洲八旗同。夏六月，满洲设纳言之木于门外，赴诉者，书其状而县之木。

熹宗天启六年，秋九月，满洲主皇太极嗣位，集诸贝勒议定官制。初，满洲主努尔哈赤起自部落，诸事草创，设官甚简，其后削平诸部，创制八旗，每旗设总管大臣(〈即固山额真〉)一，佐管大臣(〈即梅勒额真〉)各二，又设理政大臣五，札尔固齐十，往往即以总管或佐管等兼之，不皆分授。至是建议，每旗仍各设总管大臣一，是为八大臣，凡议国政，与诸贝勒偕坐，共议之；出猎行师，各领本旗兵行，一切事务，皆听稽察。其佐管大臣，每旗仍前设各二，此十六大臣，赞理本旗事务，不令出征。又每旗各设调遣大臣二，此十六大臣出兵驻防，以时调遣。所属词讼，仍

令审理。(〈后为驻防副都统、前锋统领、护军统领诸职〉)

思宗崇祯二年，春三月，满洲定蒙古军例。

夏四月，满洲设立文馆，命儒臣分职，一翻译汉字书籍，一记注朝政得失。

秋八月，满洲定行军赏罚例。

四年，春二月，满洲定出征军例。秋七月，满洲设立六部，每部以一贝勒主之(〈即管部〉)，各有满洲、蒙古、汉承政(〈即尚书〉)一，参政八(〈即侍郎〉)。惟工部则十员，满八，蒙、汉各二。启心郎(〈即翻译员〉)一，惟工部二，满、汉各一，笔贴式无定额，视各部之事务繁简而补授之。

五年，春二月，满洲主谕刑部禁赌博，定城守官三年考察之例。

九年，春三月，满洲改文馆为内三院。一名内国史院，设大学士一，学士一；一名内秘书院，设大学二，学士一；一名内弘文院，设大学士一，学士二。

夏五月，满洲设都察院。

十年，夏四月，命贝子堪罗托博议国政。每旗复设议政大臣五员。

十一年，夏六月，满洲设理藩院，专治蒙古诸部事。秋七月，满洲更定部院官制。先是部院诸衙门设满洲、蒙古、汉承政各三四员，其余皆为参政，凡二等。至是大学范文程等奏请每衙门止设满洲承政一员，以下酌量设左右参政、理事、副理事、启心郎、额者库(〈即主事〉)各官，凡五等。从之。

清世祖顺治元年，冬十月，帝入京师，即位，定内外文武官制。内自阁部至庶司，外藩臬守令，提镇将弁，略仿明制而损益之，兼用满、汉人。又定八旗都统、副都统、统领、驻防、将军、都统、副都统，均由兵部开列具题补授。守卫陵寝总管、翼领白塔监守，信炮总管、牺牲所所收，黑龙江、吉林管水手官，皆系八旗公中升补之缺，均由兵部引见补授。在京骁骑参领以下官，驻防协领以下官，由各旗引见补授。前锋护军参领以下官，由各该统领引见补授。五品以上，咨兵部月终汇题，六品以下，咨兵部注册。其驻防岭催升补骁骑校，附入月终汇题。

分置满洲、蒙古、汉军八旗于京城内。设骁骑营、亲军、前锋营、护军营、领侍卫府、提督九门步军营、内府三旗、盛京八旗驻防、直省八旗驻防，随各省形势设将军、都统。或但设城守尉、防守尉、直省绿营兵。总督所属为督标，巡抚所属为抚标，提督所属为提标，总兵所属为镇标，副将所属为协标，河道总督所属为河标，漕运总督所属为漕标。外藩札萨克各旗(〈凡二十五部，为五十一旗〉)，守卫陵寝兵。

二年，夏闰六月，除割脚筋及贯穿耳鼻法。秋七月，增设御史十五员。

三年，夏四月，裁各府挂衔别驻推官及大小县主簿。

四年，冬十一月，设四川总督一。

五年，春二月，设六部汉尚书及都察院汉都御史各一员。

夏四月，增户部十四司汉主事各一。

八年，夏六月，定在京满汉诸臣犯罪，必奉旨革职，然后关刑部审问。秋七月，以翰林院官分隶内三院，称内翰林国史院、内翰林秘书院、内翰林弘文院。

九年，春正月，增都察院御史四十员。夏四月，裁各道御史二十员。设宗人府衙门。

十年，夏四月，定御史为二十员。六月，制寺人不过四品。

十一年，夏六月，照成例以太师、太傅、太保、少师、少傅、少保及东宫三太、三少用为文武大臣加衔。

十三年，春三月，选满汉词臣八人，以原衔充日讲官。秋七月，定内外大小官员，凡受赃十两以上者，除依律定罪外，不分枉法不枉法，俱籍其家产入官。

撤各省守催钱满官。八月，命三年一大阅，定为例。停遣满官榷关。

冬十月，定每年六月内审定立决重犯，俟七月具奏正法。裁六科汉军副理事官。

十五年，夏五月，裁直隶总督，改设巡抚一员。

秋七月，设殿阁大学士，除去内三院秘书、弘文、国史诸名称。

增设各道御史三十员。分设闽、浙两省总督各一。

九月，设中和殿、保和殿、文华殿、武英殿、文渊阁、东阁大学士。冬十一月，定宫闈女官名数品级及供事宫女名数：乾清宫夫人一，秩一品；淑仪一，二品；婉侍六，三品；柔婉二十，芳婉三十，俱四品；尚宫局尚宫、司纪、司簿各二，司闻四，女史六；尚仪局尚仪一，司药二，司籍、司宝、司赞各四，女史三；尚服局尚服一，司仗四，司宝、司衣、司饰，女史各二；尚绩局尚绩一，司制四，司珍、司彩、司计，女史各二；宫正司宫正、女史各二，俱六品；慈宁宫贞容一，二品；慎容一，三品；勤侍无品级。

十六年，春正月，谕吏部：旧制内阁止有大学士及典籍、撰文、办事中书，原无学士、侍读学士等员，今见在满汉学士俱以原官留任，嗣后不必再补，典籍、撰文、办事中书照旧满汉兼设，其满官侍读学士以下各员，俱改为中书舍人，仍照见在品级加衔。应用员数，察照职掌，会同内阁议奏。翰林院设满汉掌院学士外，不必再设满汉翰林官。闰三月，申严诬告之禁。

五月，照旧例设侍读学士、侍讲学士，侍读、侍讲各三员。冬十月，定进士除庶吉士外，著俱以推官、知县用，不得除授知州。因品级太悬也。

十七年，春正月，禁士子不得妄立社名。科众会盟，其投刺往来，亦不许用同社、同盟字样，违者治罪。三月，定八旗汉字官名。固山额真，汉字称为都统；梅勒章京，汉字称为副都统；甲喇章京，汉字称为参领；牛录章京，汉字称为佐领；昂邦章京，汉字称为总管。满字皆依旧。秋七月，停遣御史巡按各省。冬十一月，仍设巡按御史。

十八年，夏五月，停各省巡按差。秋七月，复改内阁为内三院。罢进士观政例。八月，定直省各设总督一员。九月，增设直隶、山西、山东、河南、云南五省提督。冬十月，裁顺天巡抚，归保定巡抚兼管，以直隶已设总督故也。十二月，定营千总为正六品，把总为正七品。

卷十二、康熙勤政

世祖顺治十八年，春正月，圣祖即位，时年八岁。索尼、苏克萨哈、遏必隆、鳌拜等遵遗诏辅政，首罢十三衙门，停止各省巡按差，定司道及河工官员久任之法，豁免山东临街房屋税及各省田赋，增加饷练，蠲逋赋，禁非刑，中外翕然称颂。夏五月，杀江苏秀才倪用宾等十八人。初江苏吴县知县任维初贪酷，用宾等于世祖遗诏到苏，巡抚等官哭临之时，聚哭于文庙，并至府堂进竭贴。巡抚朱国治等指为震惊先帝之灵，聚众倡乱，摇动人心，请严加诘处。朝命侍郎叶尼等往勘，皆定为不分首从处斩。

圣祖康熙二年，秋八月，诏乡会试停止八股文，改用策论表判。头场策五篇，二场论二篇，表一篇，判五道，以明年甲申辰科为始，未几仍复旧例。复行满洲、蒙古、汉军翻译乡试。福建延平等处土匪王铁佛作乱，讨平之。冬十二月，广西陇纳山民阿仲作乱，讨平之。

三年，春正月，裁会试副榜。夏四月，辅臣鳌拜矫杀内大臣飞扬古。鳌拜与飞扬古有隙，既坐其子倭赫等以擅乘御马诸罪弃市，并坐飞扬古守陵怨望。其子尼侃、萨哈连俱坐绞。五月，以旱，禁直省繫囚，毋用非刑苛虐。秋九月，江南地震，其声自南而北。冬十月，彗星见，经五十馀日，历一十三宿。十一月，金星生白气，长三丈馀。

四年，春正月，水西蛮酋安坤作乱，吴三桂讨擒之。彗星见女宿度。三月，金星画见。

夏六月，云南省城迤东土酋王耀祖据新兴，僭号大庆，吴三桂破擒之。冬十月，江南献玉玺。溧阳县民顾起龙捞获玉玺，篆：“人心惟危，道心惟微，惟精惟一，允执厥中”十六字，总督郎廷佐以献，命贮内库。

五年，春正月，云南土酋禄昌贤作乱，吴三桂讨平之。十二月，鳌拜矫诏绞杀大学士户部尚书苏纳海、直隶总督朱昌祚、巡抚王登联。鳌拜与苏克萨哈不协，鳌拜隶镶黄旗，苏克萨哈隶正白旗，乃以私意倡互相圈换之议，苏纳海等言其不便，疏入，鳌拜大怒，欲置三人于死，帝不允，鳌拜矫旨行之。

六年，春二月，吴三桂进征乌撒女酋陇氏，讨擒之。

秋七月，帝亲政，御太和殿受贺，颁诏赦。鳌拜矫杀太子太保内大臣苏克萨哈。苏克萨哈既与鳌拜不合，奏求守陵，鳌拜必欲置之死，奏言其有异心，列其二十四大罪，应置极典。帝悉其情，持不下，鳌拜攘臂强奏。累日，竟予绞决，并灭其族。九月，诏停本年秋决。

七年，春二月，诏访求精通天文占候者。

三月，命科道缺出，即就有司内举贤能素著者，行取来京，听候选用。停叩阁例，有冤抑者准赴通政使司，登闻鼓衙门告理。

夏五月，金星见午位，色微暗。

浙江嘉善民郁之章有罪，流徙尚阳堡，子郁褒、郁广争请代，特并宥之。

六月，以亢旱、地震，饬廷臣修职业，诏内外清理刑狱。革职漕运总督吴惟华。密疏请征各州县镇市房号银两，及江南三十馀州，令民纳价耕种。帝恶其害民敛财，交刑部议。六月，金星画见，山东地大震，栖霞山震，沂水陷穴，广数丈，民间井倾，仄不可汲，楼台南北易向。秋八月，命刑部酌定见行则例进览。九月，金星画见，停止边外巡幸。帝欲出边畋猎，内秘书院侍读学士熊赐履疏谏，言星变叠见，水旱频仍，不宜轻出，以致民兵困苦。给事中赵之中亦请收回成命，遂命停罢。

八年，夏四月癸亥朔，日食。帝幸太学。五月，鳌拜有罪，下狱。鳌拜骄恣日甚，帝患之，召吏部右侍郎索额图入谋。索额图乃请解侍郎任，为内廷一等侍卫，日选小侍卫十余人，教之习布库戏（译言撩脚戏。皆十馀龄小童徒手相搏，而专赌脚力胜败，以仆地为定）。鳌拜或入奏事，并不之避，益以朝廷弱而好弄，更无复顾及。是日入内，忽为习布库者所擒，十数小儿，立执之付诏狱，廷勘罪状三十款，令免死，拘禁之。初，熊赐履条奏时政，有曰：“内臣者，外臣之表也。”又曰：“辅臣急功喜事，但知趋目前尺寸之利，以便私图。”鳌拜恶其侵己，曰：“劾我也！”遂请治以妄言之罪，并请申禁言官，不得上书陈奏。帝弗许，曰：“彼自陈国家事，何与尔等耶？”秋七月，以旱，命清理刑狱。九月，京师地震。冬十二月，复举人拣选知县例。云南阿戎作乱，讨平之。金星画见。

九年，夏四月，河决归仁堤。秋八月，命改内三院为内阁。

帝奉太皇太后、皇太后谒孝陵，寻还京师。九月，命礼部于官学生内，每旗选取十名，交钦天监分科学习，有精通者，以满汉博士用。冬十月，改内三院大学士衔，以图海、巴泰为中和殿大学士，兼礼部尚书，索额图、李蔚为保和殿大学士，兼户部尚书，杜立德、魏裔介为保和殿大学士，兼礼部尚书，对哈纳为文华殿大学士，管刑部事务。

十年，春正月，罢各部院及各省衙门通事。夏四月，命截留漕粮六万石并各仓米四万石赈济淮扬饥民。先是，户部议发银六万两赈饥，帝曰：“饥民待食甚迫，予银无益也。”五月，御史赵璟奏请加增外官薪俸，报闻，疏内略称：“外官薪俸太薄，总督每年支俸五百五十两，巡抚百三十两，至知县止四十五两，每月三两零，不足五六日之费。不取百姓，势必饥寒。若督抚势必取之下属，所以惩贪而愈贪也。”六月，金星画见，江南旱。秋七月，禁止百姓保留降调人员，从御史徐旭请也。九月，帝奉太皇太后、皇太后诣盛京谒陵。冬十一月，还京师。

十一年，夏四月，召原任大学士卫周祚来京，命入阁办事。六月，颁圣谕十六条。

十二年，夏六月，金星画见。冬十二月，民人杨起隆诈称朱三太子，改元广德，约满洲各官奴将于元旦起事，匿降将周全斌家，为镶黄旗监生郎延枢首告，督统图海等捕之。起隆逸去，擒其党李株等数百人，磔于市。

十三年，秋九月，京师地震。

十四年，夏四月，命信郡王鄂札为抚远大将军，大学士图海副之，率师讨蒙古察哈尔，平之。察哈尔，元裔也，崇德时来归，编旗安置义州，忽拥众叛。图海将军至，连破之，擒斩其王子布尔尼，察哈尔平。冬十一月，太白画见。

十五年，夏五月，壬午朔，日食。是月，有星陨于江南青浦之瓢湖滨，堕地有声，掘之得黑石，按之尚热，重凡十九斤。
秋七月，大学士熊赐履免归，以阁臣索额图劾之也。

十六年，正月朔，闻雷。九月，帝猎于边外。冬十月，还京师。
十二月，太白画见。

十八年，秋七月，京师地连震，诏群臣各言得失。时帝晝夜坐武帐中，宪臣魏象枢直入奏曰：天变若此，乃辅臣植党市权，引用佞壬，以剥蒸黎之应。帝不答。

十九年，秋八月，大学士索额图以疾求罢，命于内大臣处上朝。
十月，彗星见于翼。十一月，彗星见西方。冬十二月，磔杨起隆于市。大将军图海解送陕西起事之朱三太子即杨起隆来京，及与前监禁之杨起隆妻马氏，及其党郑得胜质对，皆不识，部议为显系起隆之党借名造反，罪应磔，从之。

二十年，春正月，命兵部右侍郎温代疏浚通州运河。二月，诏开海界。先是，滨海居民私饷台湾郑氏，顺治十八年遂下令迁界，民多荡析离居，满兵复奴其老稚，菑楚不忍闻。闽督姚启圣屡奏旗兵不服水土，康王体尊亦不宜久暴露，宜撤归。疏三上，始命班师，兵归者犹驱子女北行。至是，启圣又与抚臣吴兴祚奏请开边界，复民业，从之。颁发帑银二十万两赈山西饥民。三月，河南地震。
秋八月，辛巳朔，日食。九月，幸畿甸，自后以肄习水围、循视河堤，岁常举行。

二十一年，春二月，杀楚人朱方旦等。方旦，荆州人，刊刻秘书，其徒顾齐宏、陆光旭等为之标榜，时有宣圣复生之称。大将军顺承郡王勒尔锦驻荆州时，书赠至人里圣人堂匾额，巡抚张朝珍尝为题圣教帝师匾额。方旦等既伏法，帝以勒尔锦见在羈禁，朝珍已病故，俱予免议。三月，帝猎于乌喇。时鹵簿待发，宪臣徐元文率言官三十人入谏，帝曰：“方春省耕，不出旬日回，非游牧也。”遂启行。
夏五月，还京师。秋七月，彗星见井宿度，尾丈二尺馀。

二十二年，春二月，帝幸五台山。终帝之世，凡幸五台山者五，不备纪。
三月，还京师。夏四月，命边疆提镇官有应入覲者，奏闻。时边陲将士，不习国家法度，帝尝降敕广西将军马承胤军中，承胤跪受，诸将惊曰：“我将军亦跪人耶？”至是宪臣禧佛疏称：“海内大定，宜令提镇次第入覲。”帝因语群臣曰：“提镇久握兵权，心意骄纵，故每致生乱。常来朝见，则心生敬畏，如吴三桂辈亦不令来朝，始至于此也。”群下皆拜服。
六月，帝奉太皇太后出古北口避暑，自是每年五六月出口，不备纪。
秋七月，还京师。

二十三年，九月，帝东巡。先是，词臣曹禾以帝功德日盛，奏靖封禅，科臣王承祖奏请巡狩，并付廷议。工科给事中任辰旦独上疏谏，言：“封禅之说，惟秦始皇、汉武帝、宗真宗诸君行之，固猥陋无足道矣。若夫巡狩，载《舜典》、《王制》诸书，古诸侯各君其国，天子巡所守，以协同议礼制度。今天下一家，巡狩之礼亦不可举。”疏入不报，寻部臣议上，虞舜东巡至岱宗，燔柴致祭，汉高祖遇鲁，以太牢事孔子。今皇上盛德神功，同符尧舜，仿古之制，爰事东巡，经过泰山阙里，亦应致祭。至是启銮东巡，幸山东，登泰山，渡黄河、杨子江，幸镇江、江苏、江宁，还经泗水东境，幸曲阜，谒孔陵，始回銮。自是南巡凡六次[1]。
冬十一月，还京师。是年，直隶、河南饥。

二十四年，秋九月，《赋役全书》成。淮扬饥。
冬十一月，癸卯朔，日食，丁巳望，月食。

二十五年，春二月，诏嗣后武官照文职例丁忧，从四川提臣何传请也。先是，下廷议时，帝语阁臣曰：“武官不宜久任，在昔唐室藩镇，骄蹇跋扈，皆由久典兵权耳。乃丁忧之例既定，自不致任久矣。”夏四月，诏访求遗书。帝欲统一天下之言论思想，飭令直隶巡抚、学道，购收民间藏书秘录，务期搜访罄尽，送部进呈，以免异端讹说流播民间云。
闰月，江苏巡抚汤斌奏毁苏州城上方山五通淫祠，同时闽督郭世隆亦檄毁五显庙。
秋七月，帝猎于边外，自后每岁能秋冬农隙讲武之时，出边行猎，不备纪。
八月，还京师。冬十二月，发遣兵部侍郎蔡毓荣于黑龙江，因前在云南隐匿吴三桂家口也。毓荣前官绥远将军，平三桂大有功，诸满帅忌之甚，相与构陷，遂获罪。

二十七年，春二月，琉球遣子弟梁成楫等三人入监读书。大学士明珠、李之芳、余国柱，尚书佛伦、熊一洒、科尔坤同日罢，因言官郭琦劾诸人背公营私也。先是二十二年，天久不雨，命庶常德格勒筮之，遇夬卦，曰：“泽上于天，将降矣！而卦义五阳决一阴，小人居鼎铉，故天屯其膏，决去之即雨。”帝愕然，曰：“安有是？”德遂以明珠对，帝默不应。夏四月朔，日食。
六月，武昌兵变，推夏违龙为首。事闻，督统瓦岱往讨，平之。

二十八年，秋七月，勒令原任少詹事高士奇、左都御史王鸿绪、编修陈元龙休致，因左都御史郭琇劾诸人植党营私也。冬十月，降副都御史许三礼二级调用，以疏劾原任刑部尚书徐干学潜住京师招摇，及其子树谷违例考御史事。部议座以诬罔也。

二十九年，夏四月，《大清会典》成。五月，大学士徐元文等荐举麻城知县赵仓壁、清苑知县邵嗣尧、三河知县彭鹏、灵寿知县陆陇其。俱著行取。八月，己未朔，日食。

三十年，春二月，丁巳朔，日食。

三十一年，春正月，辛亥朔，日食。钦天监占，主有大臣黜，近臣有忧。帝责其附会，严斥之。

三十二年，冬十二月，严禁顺、永、保、河诸府造酒。时以畿辅米价腾踊故也。

三十三年，夏五月，命提督顺天学政兵部右侍郎李光地解任，回京守制。光地闻母丧，仅乞假数日治丧，仍视事，言官沈恺曾、杨敬儒交章论劾，给事中彭鹏疏诋光地为忘亲贪位。帝大怒，严旨诘问。鹏执奏愈力，并言臣与光地皆闽产，今若此，人人切齿，桑梓汗颜。帝不得已，因令光地解任，在京守制。

三十四年，夏四月，山西平阳地震，压毙人民甚众，诏曰：“迺者，畿辅郡县，灾伤叠告。而山西平阳府属，复有地震之异，朕心祇惕，谓必政事之失宜，方致阴阳之有感。反躬循省，深儆予辜。”六月，以京师久雨，诏廷臣言事。

三十五年，春正月，京师地震。夏六月，东南滨海飓大作，海啸。秋七月，复大风，坏民居庐舍。九月，京师地震。冬十二月，京师地震。

三十六年，春闰三月，辛巳朔，日食。冬十一月，京师地震。

三十七年，秋七月，京师地震，江南滨海大风，水猝至，平地丈馀。帝奉太后出山海关谒陵。冬十一月，还京师。

三十八年，冬十一月，逮顺天乡试正副考官修撰李蟠，编修姜宸英下狱，因御史鹿祐疏参是科考试不公，后集中式举人于内廷覆试，去留有差。蟠遣戍，宸英座于狱。时满朝臣僚皆知是狱之冤，王士禛亦有：“我为刑官，令西溟以非罪死，何以谢天下”之语。西溟，宸英字也。

三十九年，春二月，贵州省城地震。

四十年，冬十二月，连人傜人作乱，讨平之。

四十一年，夏五月，东南海啸。六月，火星入南斗。

四十二年，秋九月，湖南镇筴红苗作乱，讨平之。冬十月，帝巡太原。十二月，还京师。

四十三年，夏四月，革直隶巡抚李光地职，仍留任。先是，给事中黄鼎楫、汤右曾、许志进、朱骏业、王原等，合疏劾光地去岁报灾二十馀处，光地身为抚臣，漫无经理，疏内所称民沾实惠俱属空言。疏下，李光地回奏，光地引咎请落职，命留任。冬十一月，丁酉朔，日食。

四十四年，秋八月，京师地震。

四十五年，春二月，京师地震。江宁知府陈鹏年落职，命来京在修书处效力。初，江督阿山以帝将复南巡，召属吏议加赋，鹏年力争不可，阿山衔之。四十四年，帝至江南，使鹏年办龙潭行宫差，近侍索贿不与，窃置蚯蚓粪于簟席间。帝召鹏年诘问，将加罪，以致仕大学士张英、织造使曹寅力谏，得免死。驾幸金山，罚鹏年叠石、挽舟诸苦工以辱之。民趋助役，至是阿山劾其受盐典商年规，蚀龙江关税，落职，下之狱，命漕督桑额、河督张鹏翮会谳，民皆罢市，揭帛鸣钲，环制府问太守见劾之由。有司械系数人，争就系。句容八邑生童方京试，哗曰：“读书何为也？”皆火其卷去。谳者以三木讯商人，商人曰：“岁馈，自督抚至州县皆有之，惟太守不受一钱耳。”既捃摭无所得，则以鹏年尝遂倡，建亭其地，月朔宣讲圣论，为大不敬，狱成论斩。大学士李光地入谏，得解，几复授苏州府知府，复忤总督噶礼下狱，指所作游虎邱诗为怨望。帝仍令免罪，入武英殿修书，后终河道总督。夏四月，戊子朔，日食。冬十二月，命各省建育婴堂，从言官周清源请也。

四十六年，春正月，杀云南民李天极、王枝叶等。天极，广通县诸生，与临安府诸生朱六非等，以枝叶本朱姓，为明永历之孙，奉为主，称桂王文兴三年。潜期先取广南，次取开化，由蒙自袭省城。督臣贝和诺得标兵首报，发兵擒斩之。秋八月，贵州普安州三江苗人黄柱汉等作乱，讨平之。

四十八年，冬十月，杀编修熊本。本，孝感人，为故阁臣熊赐履从子。赐履卒于江宁寓室，贫无以殓，本为之治丧事尽礼。人高其义，及遗疏入，中有荐本语。帝疑其伪，命督臣噶礼确察。噶礼取疏草进，无本名，本落职论死。或曰噶礼迎合忮忌，所呈疏草未可据。

四十九年，春正月，朔，虹见东方。夏五月，南方霪雨，大水。秋八月，革福建提督蓝理职。理奏永春、德化间有陈五显等，聚众二千馀行劫，臣令参将尚之璜统兵

往缉两次，杀贼八十馀，中伤脱逃者不计其数，附近贼巢仍不废耕织，照常安业。帝谓数千人为盗，保得谓百姓不失业，此系掩饰己过，希图卸罪，命严议，至落职。

五十一年，夏六月朔，日食。冬十月，革江南总督噶礼职。噶礼与江南乡试副考官赵晋通关节，事发，抚臣张伯行劾之。礼亦讦伯行不出洋捕贼诸疑款，命俱解任，交钦使张鹏翮等杂治。时鹏翮之子懋诚任怀宁令，故于噶礼多瞻顾，奏晋与新科举人陈元奎、吴泌贿通关节，拟罪如律。噶礼劾伯行不能清理案件属实，馀系苛求，应降留，伯行劾噶礼索金事全虚，应夺职发徒，复命尚书穆和伦等覆讯。奏如前，帝以伯行为天下清官第一，责诸臣变乱是非，命伯行复任，黜噶礼职。十一月，籍没福建革职提督蓝理，调入旗。初，理在提督任内，好干预民事，或曰：“此有司职也，非所宜问”，理曰：“天下官管天下百姓，腐儒何足以知之。”妒之者因刻匿名帖，绘一虎以比之，多列罪状。督臣范时崇、抚臣满保所以参奏，命侍郎和托等往按。左右不承，理曰：“吾大臣，何必办？”举笔署曰，皆实，议立斩，追赃八万，籍其产，特旨免死入旗。帝出关谒陵。十二月，回京师。

五十三年，春二月，以旱，诏廷臣言事。夏六月，诏刑部宽恤狱囚。

五十四年，春二月，革江苏巡抚张伯行职。伯行劾布政使牟钦元藏匿通洋匪棍张令涛。令涛旧为噶礼幕客，故伯行必欲死之。命尚书张鹏翮往勘，寻奏令涛良民，伯行诬劾拟斩，帝不允，命来京，入直尚书房，旋擢仓场总督。

夏四月，丙寅朔，日食；望庚辰，月食。秋七月，东南各省骤风暴作。冬十月，山西太原府知府赵凤诏以受赃十七万有奇，伏法。凤诏，尚书赵申乔子，申乔自请罢斥，命仍在任供职。

五十五年，春二月，定民间买卖地亩，其丁随地输课，从言官董之燧请也。夏六月，旱。

五十六年，夏四月，严禁天主教在各省立堂传教。天主教来自西洋，康熙八年有旨严禁，至是广东碣石镇总兵陈昂疏言广州城内外教堂布满，乞饬早为禁绝，部议从之。

五十七年，夏四月，磔河南民袁进，即朱复业等于市。初，兰阳县有郭英者，自称前明勋裔，以同邑幼童朱复业为明周王之孙，抚养家中，诡名袁进，欲效郭子兴抚太祖故事，勾结白莲教首李雪臣、兴邦父子，匿邑诸生李山义家，潜谋举事，为县令侦知捕获。抚臣张圣佐以闻，命尚书张廷枢察审，论如法。

五月，既望，有群蚁自海入江南之吴松江，风浪冲击，团结不散，有大至径寸者。秋七月，陕西平凉巩昌府属地震。八月，杀镶蓝旗逃棍孟光祖。光祖称奉诚王府差遣，往各省诓骗财物，梟于市，江南巡抚佟国勳、四川巡抚年羹尧，不将光祖拿获

，反接受物件，馈送礼物，国勦革职，羹尧革职留任。

五十八年，春正月，甲戌朔，日食。

命截留漕米四十三万，贮苏州、镇江、江宁、淮安、安庆赈荒。

五十九年，春正月，王大臣等以帝明年御极六十年，请预定庆贺典礼，不许，谕曰：“见在西陲用兵，军民劳苦。去岁正月朔日食，今年七月朔又值日食。海洋飓风，飘没官兵船只。山左东三府不发被淹，黎民饥馑。淮黄大水，仅能抢护。人心风俗未尽醇，官箴政事未尽理。此正君臣孜孜求治之时，庆贺之事，著停止。”

夏六月，禁商船以军器出洋。

六十年，春三月，会试副考官副都御史李绂夺职，发往永定河工效力。是科会试榜发，下第举子拥绂邸舍喧嚷，为言官舒庠等所劾，免官发遣。

夏五月，直隶、山东、山西、河南、陕西、福建、浙江饥。六月，安徽大旱。

秋九月，河决河南、山东、直隶等处。冬十月，台湾风灾。

六十一年，春正月，召满汉文武诸臣及至仕退斥人员，年六十五以上六百八十人，宴于乾清宫前，名千叟宴。夏四月，福建驻防将军黄秉钺夺职，因防兵哗饷也。帝在热河，语王大臣等曰：“前有以朕每年出口行园，劳苦军士者，不知国家承平虽久，岂可不修武备？如前噶尔丹、策妄阿、喇布坦等梗命，朕两次扫平漠北，救民水火，此皆朕平日不忘武备，勤于练兵之所致也。若前惑于人言，憚劳苦而不加训练，又何能远至万里之外，灭贼立功耶？”秋七月，夜有大流星入斗垣。

九月，帝还京师。冬十一月，帝崩，寿六十有九，四子胤禩嗣立，谥帝曰仁，庙号圣祖，葬遵化州孝陵东马兰峪，号景陵。

[1] 详第十三卷治河篇

卷十五、欧人通商布教及和议之开始

圣祖康熙三年，夏闰六月，颁赠荷兰国王段匹银两。先是，荷兰于顺治十三遣使哥页及开泽，自爪哇抵京师，以互市为请。廷议许荷兰船八岁一至，船数以四艘为限。其后，郑成功占领台湾，荷兰数遣舰队助攻金夏有功，至是秋，以求报酬，遣其使臣歌伦，复以巴达维亚总督之命来议约，诏颁，予银币有差，他所请皆不许。

四年，春三月，罢钦天监监正汤若望。初，世祖朝德意志宣教师汤若望，以历学受知遇，命掌钦天监事，寻赐太常寺卿，加通政使，封通元教师。至是，回回教徒新安卫、官生杨光先上书攻击若望，摘其新法十谬。廷议以本朝历祚无疆，若望不应止进二百年历。又选择荣王安葬日期不慎，论磔。帝以若望有前勋，免死，罢其官。

六年，夏五月，俄使来请互使，帝以俄人连年扰边，又容纳适逃，不许。

八年，春三月，授南怀仁为钦天监监副。自杨光先劾退汤若望后，以光先为监正，罢西法不用。既而光先论闰多不合。比利时人南怀仁时任修历治正，复疏论之，较验得实，光先削职遣戍，授怀仁监副。未几，晋监正，加太常寺卿。后三藩事起，任怀仁工部技师长，令督铸大炮。事平叙功，加工部右侍郎，卒赠礼部侍郎，赐谥勤敏。怀仁等不独明习历法，且旁通百技，政府亦利用之，自治历之外，或令铸枪炮以佐军用，或任外交通译太测量事，故亦不禁其布教，时臣民受洗礼者不下数十万人，而中国之数学及历学极东洋一时之盛。北京天文台之壮观尤为环球冠。

十四年，夏五月，俄使至，请与中国订界约，开贸易，交换俘虏，不许。初顺治十年，俄军侵入什尔喀河流域，时土酋根忒木尔帅部众内从，求保护后，中国有司遇之虐，根忒木尔复奔俄。世祖特遣使莫斯科，令交还中国治罪。俄人不报，至是以此难俄人，谓非交付逃人根忒木尔不可。俄人卒不交出。

二十五年，秋七月，都统彭春等攻取俄罗斯边境雅克萨城，俄守将图尔布青战役，俄人请成，许多。先是，俄罗斯所属罗刹连年侵扰黑龙江边境，帝患之，遣春等以行猎为名渡江侦察情形，归言罗刹可取状，乃命春统水陆军并进，攻陷其城。图尔布青中弹死，其陆军大佐伯伊顿代之守。以军中病疫，思罢兵，帝闻之，亦表示同意，以荷兰公使杜都为介绍，致书俄皇，约定边境。俄皇旋覆书，谓前者中国数赠书于本国，因国中无人能通解汉文，故久不为报，今已知边人构衅之罪，请先释雅克萨之图师，即当遣使诣边定界，乃诏春撤兵归。

二十七年，春三月，以内大臣索额图、佟国伟、马喇为公使，赴色楞格斯克会俄使议界约，寻召还。索额图等行至喀尔喀界，值土谢图与噶尔丹构兵，道梗不得前。帝闻，遣侍卫官保往追之，令其退驻汎界。

二十八年，夏四月，命索额图等赴尼布楚，与俄使会议。先是，俄人来告，改以尼布楚为会场，帝诏索额图等赴之，命都统郎谈发兵一万，自黑龙江水陆并进，以为使臣后援。索额图等抵尼布楚，驻军城外，俄将军乌拉索闻中国军队至，疑有他故，飞书阻止。索额图不应，及俄使费要多罗至色楞格斯克，见中国兵卫甚盛，气大沮，旋张幕于其地为会场。两国公使既会，护兵各二百馀，人皆露刃帐侧。俄人复以兵五百列城南当中国陆军，又以兵五百陈尼布楚河岸当中国水军。俄使发议，欲划黑龙江为两国国境，以江南地为中国，而自有其北岸。索额图则谓东自雅克萨，西至尼布楚、色楞格斯克，凡俄领黑龙江，以及后贝加尔殖民地，当尽以属中国。俄使不可。翌日复会，索额图词少逊，请以尼布楚为分界，俄使难之。以是议久不能谐，时中国译官宣教师张诚、徐日升等调停两使间，往复数回，索额图始议北以格尔必齐河及外兴安岭，南以额尔古纳河为界，而俄人于客尔古纳河南所筑堡寨迁移北界，俄使犹不允，于是索额图辍议，拔营向尼布楚城，示将宣战，且招抚蒙古及通古斯人之降俄者，令为内应。顾俄使雅不欲决裂，乃允以额尔古纳及格尔必齐两河为中俄界线，而索额图翌日复翻议，致书俄使，谓北境之分界线非外兴安岭，为自后贝加尔至朱古特岬之一带长岭。俄使大恚，议复梗，宣教师乃言于两使，谓彼此不得要求过当，平和始克就绪，于是双方退让，国界之议乃成。因复及逃人事，俄使谓根忒木尔已在莫斯科受洗礼，更名，不允交付。索额图亦知其终不可致，亦不复争，和约乃成。于是年九月交换，凡六条，所谓《尼布楚条约》是也，一名《黑龙江条约》。

一、自黑龙江支流格尔必齐河，沿外兴安岭以至于海，凡岭南诸川，注入黑龙江者属中国，岭北属俄。

二、西以额尔古纳河为界，河南属中国，河北属俄。

三、毁雅克萨城。雅克萨居民及物用听迁往俄境。

四、两国猎户人等毋许擅越国界，违者送所司惩罚。

五、两国彼此不得容留逃人。

六、行旅有官许文票者，得贸易不禁。

冬十二月，中俄两国遣员立碑于格尔必齐河东及客尔古纳河南为界标，书以满、汉、蒙古、拉丁及俄罗斯五体文字勒之，自是中俄修好，为中俄交涉之起源。于以见当时外交之优胜。且知有国家者，外交与武力确有相为表里之实，而不可缺一者焉。

卷十六、台湾朱一贵之乱

圣祖康熙六十年，夏四月，台湾民朱一贵作乱。总兵官欧阳凯，水师副将许云，南路参将苗景龙，游击刘得紫、游崇功，千总陈元等死之。一贵，福建漳州府长泰县人，小名祖，于康熙五十二年充台厦道辕役，寻被革，居母顶草地饲鸭为生。其鸭旦暮编队出入，愚民异之。时承平日久，守土恬熙，知府王珍税歛苛虐，以风闻，滥捕结会及私伐山木者二百余人。株连需索，民不堪其扰，于是凤山县民黄殿、李勇、吴外、郑定瑞等谋变。以一贵朱姓，可托明乔，遂奉以起事，称中兴大元帅，率众数百夜袭冈山、漣汎。警报至郡，总兵官欧阳凯集将弁议出兵，中营游击刘得紫请行，不许，令右营游击周应龙，以兵四百，及新港、目加留湾、肃垄、麻豆四社土番往。应龙躯干魁伟，议论风生，故主兵重之。是日微雨，应龙率兵番行五里即止，翌日，再进十五里。一贵已于是夜出槟榔林，劫防汎，戕把总，掠军械，而应龙隔一水不往救，一贵乃旁掠四出，南路民杜君英等起应之。应龙兵至小冈山，遇敌，千总陈元、把总吴益等奋力掩击，一贵败走入山，应龙命止兵弗追，但传令悬赏购杀。土番性凶残，纵火燔民居，民死无数，人心激忿，各乡树帜响应。于是杜君英、陈福寿、刘国基起淡水；郭国正、翁义起草潭；载穆、江图论起下埤头；林曹、杜骞、林璉起新园；王忠起小琉球；皆约一贵攻府治。君英合众袭南路参将苗景龙于下淡水，景龙败死。应龙闻景往救，日行十五里，越日遇敌于赤山。君英、一贵两路夹攻之，方激战，应龙遽以后队退，陈元阵歿。吴益、周应、李硕等负伤走，而应龙竟回府治，一贵大队随之，郡中大震。欧阳凯、刘得紫、许云共率师千有五百出御，列营春牛浦以待。忽军中夜惊，镇兵四散，黎明，始稍集，然人无战心。逾日，敌兵大至，许云跃马陷阵，敌大败。时水师游击游崇功以兵入鹿耳门赴援，遇台厦道梁文煊、知府王珍等眷属舟，叹曰：“官者，兵民之望。官眷逃则人心散，大事去矣！”麾众驰春牛浦。一贵、君英合队来犯，镇兵忽内乱，把总杨泰，绰号违家勇者为内应，刺欧阳凯坠马死，刘得紫被执，许云、游崇功等十余人皆死之，水师游击张彦贤等率兵千余人，船四十馀艘，联鯨杨帆出澎湖，应龙复遁归内地，文煊等奔澎湖。五月，台湾陷，朱一贵僭号于台湾。一贵既入台郡，北路贼赖池、张岳等同时陷诸罗，参将罗万仓死之。凡七日，而全台尽失。一贵等开府库，有红毛楼者，故荷兰据台时所筑，旧名赤嵌城，后郑氏以之贮军火，四十年来莫有启者，至是发之。得之大小炮位、枪弹、硝磺、铜铁无算。一贵乃自称中兴王，号永和元年，大封其众。国师、太师、公侯、都督、将军、尚书、总兵以下千余人，优孟衣冠，辉煌道上，民间为之谣曰：“头载明朝帽，身穿清朝衣。五月称永和，六月还康熙。”盖当日虽妇人孺子亦知其必亡也。六月，南澳镇总兵蓝廷珍，克复台湾府，朱一贵遁。先是，台中逃官及难民抵澎湖，澎协将弁皆仓惶失措，以为一贵将长驱至，亦各出眷属登舟，将窜厦门。右守营备林亮，请主将掣回登舟各家属，诸将犹豫未决。亮按剑厉声曰：“朝廷以海外封疆付我等，今锋刃未血而相率委去，可乎？请整兵配船守要害，俟贼至，决一死战！战不捷，公等归亦未晚。”乃驰出江干，申主将令，拔佩刀，驱官民眷属各登岸，人心始固。时水师提督施世驃驻厦门，见难民船日至甚众，始知台变，而郡中文武窜至澎湖，喘息称定，然

后具文申报至厦，世骠即日率师出港。总督觉罗满保疾驰抵厦门，咨檄南澳镇总兵蓝廷珍。而廷珍条上进兵事宜之书至，所议悉与吻合，大喜曰：“吾调此君平台，得人矣。”使总统渡台水陆兵八千，船四百艘，会提督合兵进剿。师行，满保躬迓海滨送之，廷珍意气激昂，从容语总督曰：“草寇不足烦区处，某一登彼岸，大帅可即奏报荡平也！”抵澎湖，适降将吴良受一贵命，谋取澎湖，赴世骠营前诈降，讯之，尽吐党中情形，知其党内乱。一贵、君英互争雄长，谋相攻，百姓不附。廷珍言于世骠曰：“群盗皆乌合，不足忧，但众至三十万，诛之不胜诛。且多杀无益，宜张示止殄渠魁，馀勿问，则人人有生之乐，无死之心，可不血刃平也。”世骠诺之，并戒将士登岸之日，无得妄杀。是日，发澎湖先锋林亮、董芳，以六舟冒死直进，遥望炮台、火药累积，专以炮注攻，中之轰发如雷，守台者死无数，遂扬帆直渡鲲身（海河）。敌将苏天威退保安平镇，与城守郑定瑞列队迎拒。林亮、董芳复先登陷阵，廷珍督大队继之，苏、郑败走，廷珍入镇城。次日，世骠始至，敌二次来犯，皆为廷珍击退，自是一贵等退入府治，不敢出。有西港民某，愿导兵由西港暗渡，距府不远，呼召立应，又多竹林，可埋伏，彼若以数千人分布要害，四面掩击，亮等一军危矣。宜遣将统大军继其后，方可万全。骠曰：“谁当此者？”廷珍曰：“非他人所以往，某不敢辞。”遂率水师五千五百馀，夜指西港进发，黎明登岸，令空舟悉回安平。诸将请其故，廷珍曰：“示军士必死，无还心。今日战胜，明日直抵府治耳。”会敌在苏厝田与林亮等正激战，廷珍严陈设伏而进，敌望见曰：“此老蓝旗帜也！”惊而溃。是夜驻黎头标，料敌众必乘夜劫营，伏兵大败之。比晓抵城下，敌数万皆遁去。廷珍夜入城，秋毫无所犯，民大悦，自进兵至此裁七日耳，遂复府治。世骠亦同日抵城，获杀害欧阳凯、许云、罗万仓之杨泰、黄龙、陈碧三人，各付其子欧阳敏、许方度、罗世正等自行处死。凌迟、剖腹、碎尸、扬骨，惨极无人理。台人至今犹谈之而色变云。闰六月，总兵官蓝廷珍复台南北，朱一贵、杜君英等恶就擒。廷珍分兵收复南北二路，一贵走下加冬，廷珍密遣将林卿等擒之于沟尾庄，与其党村君英等送京师，磔之，台湾平。

卷二十、文字之狱

圣祖康熙二年，夏五月，诏戮浙江湖州府民人庄廷鑑尸，其父庄胤城，弟庄廷钺均立斩。初，明故大学士朱国桢私著明史，籍未刊而亡，家亦中落，以稿本质金于廷鑑。廷鑑易自己名刻之，补入崇祯一朝事，中有万历间总兵李成梁捕斩建州卫都指挥使王杲语。归安知县吴之荣方罢官，谋起复，因举发其事，廷钺入贿得免。廷鑑死，其父胤城乃稍易书中指斥语，再版刊行之。荣恨计不售，更购初版，上之法司，遂兴大狱。致仕侍郎李令晰为作序，亦坐死，且杀其四子，幼子年十六，法官命灭供一岁，例得免死。幼子不忍独生，卒不易供而死。序中所称旧史朱氏者，指国桢也，之荣素怨南浔富人朱佑明，遂嫁祸，且指其姓名以证，并杀其五子。其余书列名及官吏失察，与刊刻、收藏人株连死者七十余人，妇女并给边而之荣卒以此起用，并以所籍朱佑明之产给之，后仕至右佥都。

六年，夏四月，杀江南民人沈天甫、吕中、夏麟奇。天甫等选诗二卷，语多忌讳，嫁名黄蓁素百七十六人作，陈济生编辑，吴牲等为这序。持向牲元莱所，诈索财物，元莱察其书非故父手迹，控于巡城御史以闻，下法司严审，以天甫等诬陷平民谋叛。皆伏法，诸被诬者虽事终省释，而生死多不可知矣。

五十二年，春二月，杀翰林院编修戴名世，戮学士方孝标尸。时诏修明史已数十余年，而馆臣采录遗书，率多忌讳，致屡裁稿而未告成。名世心窃痛之，因着子遗录以见其概，又兴其门人金生书，谓以弘光之帝南京，隆武之帝闽越，永历之帝两粤与滇黔地方数千里，首尾十七八年，曾不得如昭烈之在蜀，帝昺之在厓，史家犹得以备书其事，近日方宽文字之禁，而天下所以避忌讳者，万端终明之世三百年无史，岂不可叹？书中又引孝标所著滇黔纪闻，称其考据确实，是书载入其南山集中，刊行已久。至是都御史赵申乔疏摘其语以闻，名世族皆弃市，孝标戮尸，其子登峰云，旅孙世樵并斩，族属金妻发遣，编修汪灏、方苞、方正玉、尤云鶚、刘岩等因连获遣者，凡三百余人。金先生病死狱中，申乔发难，构此大狱。不及二年，其子凤诏以官太原知府，受钜藏伏法。

世宗雍正三年，冬十二月，杀浙江举人汪景祺。初，景祺从军青海，尝作《西征随笔》，有诗讥讪圣祖，又为年羹尧作功臣，不可为论，为抚臣福敏查出，入奏。命立斩，家庭发遣。

四年，夏四月，革食侍讲奉钱名世职衔，发回原籍。因名世作诗称诵年羹尧平藏功德，触帝怒，亲书名教罪人扁额，令地方官张挂其居宅，又令朝士等赋刺恶诗，并谕旨一道，交名世刊刻进呈，凡直省学校所在，各颁一部。冬十月，以光禄寺卿王国棟为浙江观风整俗使，并饬停浙江省乡试、会试，因历年以文字获罪者，多浙江人也。

五年，春二月，革太常寺卿邹汝鲁职，发往荆州府堤工处效力。因汝鲁进河清颂，内有“旧染维新，风移俗易”语，谓其语近讥讪也。夏五月，戮礼部侍郎查嗣庭尸。嗣庭典试江西时，题“维民所止”。有讦者谓维止二字乃取雍正斩首之意，继又搜出日记，于圣祖用人行政大肆讥评。帝大怒，逮嗣庭及其子上克下于狱，至是皆死狱中，命锉尸梟示，子云立斩，子长椿、大梁、克瓚；兄慎行、嗣璫；侄克念、念基、闻学俱著流三千里。

七年，冬十二月，杀革职主事陆生机，罚革职御史谢济世充当军中苦差。先是，振武将军顺承王锡保陆辞，帝语之曰：军前效力之汉官等，若有私自著作，怨怼罔上者，即密以闻。是年六七月间，锡保先后奏报济世注释大学，毁谤程朱，于见贤而不能举两节，有抒写怨望之词。生机细书《通鉴论》十七篇，中有论封建、立储、兵制等事，多抗愤不平语，至是分别治罪。

八年，冬十月，杀庶士徐骏。骏在馆时，因上书言事，于陛下之“陛”字误书作“狴”，帝怒其粗率，立斥放归。至是检其诗集，内有“清风不识字，何得乱翻书”之句，指为讥讪，命正法。

十年，冬十二月，戮江浙大儒吕留良尸及其子吕葆中尸，次子吕毅中等皆斩。吕留良，石门人，讲学乡邦，学者称晚村先生，或称吕夫子。尝以博学弘儒及山林隐逸荐，誓死不就，至薙发为僧，至是为曾静之狱所牵及。先是，湖南永兴人曾静居乡讲学，学者称蒲潭先生，因应试靖州城，得见留良讲义，至夷夏之防及井田封建等篇，始明种族之界。遣弟子张熙至留良家，求其著述，时留良已死，其子毅中悉以父遣书授之，词多愤激。静读之，益倾服，愤然弃青衿，日与留良子弟严鸿达、鸿达弟子沈在宽诸人游，于是深茹种族之痛，志图光复。时传闻川陕总督岳钟祺裔出宋岳飞，与金世仇，将谋报复，又钟祺两请入觐，诏不允行，钟祺深自危疑云。静遂遣熙至陕，投书钟祺，劝举事。书中历数帝弑父、屠弟及戮辱功臣诸罪。钟祺以闻，命逮静等入京庭讯。帝以留良等罪，尚在曾静等上，赦静、熙归，且诏地方官予以保护。鸿达已死狱中，与留良、葆中皆追戮其尸。毅中、在宽均立斩，子孙遣戍，妇女入官。广东连州知州朱振基，学政王奇勛不应，设祠奉祀吕留良，与车鼎丰、车鼎贲、孙用克、周敬舆俱坐死，父母、子孙、兄弟、妻女坐发给为奴者二十三家。

十三年，冬十二月，杀湖南儒士曾静、张熙。初，世宗命释曾等回归里，诏地方官绅不得将静等暗加杀害，违者抵償。即朕之子孙，将来亦不得以其诋毁朕躬而追戮之。至是，高宗嗣立，竟杀之，并诏直省停讲《大义觉迷录》，缴回颁发原书。论者谓世宗之颁讲是书，盖有深心，而高宗忽从而禁之，又高宗之深心也。

高宗乾隆十八年，秋七月，诏江办巡抚庄有恭，著照前学政任内所得养廉银数加罚十倍。先是，乾隆十五年，有恭再视学江苏，有浙江人士丁文彬献所著《文武记》

、《太公望传》等书，有恭以为狂，不究，纵之去。文彬复挟书至山东，投衍圣公孔昭焕，转告巡抚杨应琚以闻。帝震怒，严旨诘问有恭，并命查取逆书进呈。有恭以文彬系有精神病人，且事隔五年，细检原书不得覆奏。帝斥其狡诈，姑念学政无惩办逆民责任，今免罪罚金。

十九年，秋九月，戍盛京礼部侍郎世臣于黑龙江。世臣诗稿中有“霜侵鬓朽叹穷远”及“秋色招人懒上朝”、“半轮明月西沈夜，应昭长安尔我家”等句，帝恶其疏懒鸣高，自拟于苏轼黄州之谪，且卿贰崇阶，有何穷途之叹？况盛京为丰沛故乡，世臣系满洲世仆竟忘根本，居心更不可问，故有是谴。

二十年，夏四月，内阁学士胡中藻弃市，广西巡抚鄂昌赐死，工部侍郎张泰开革职，故大学士鄂尔泰撤出贤良祠。中藻所著诗集曰《坚磨生诗钞》。帝谓“坚磨”出自鲁论，孔子所称磨涅，乃指佛髀而言，胡中藻以此自号，是诚何心？又其督学广西时，试题内有干三又不为象龙说，乾隆乃朕年号，龙与隆同音。并摘其诗句十数语锻炼成狱，遂被族诛。泰开，故中藻门生，又为之作序，中藻系出鄂尔泰门下，鄂尔泰尝赞赏中藻之夸。鄂尔泰之侄不合，援引世谊与中藻唱和，又摘鄂昌《塞上吟》中称蒙古为胡儿，为忘本党逆，故皆及于祸，旋降严旨禁满洲八旗学习汉文及与汉人唱和，论同年行，革来往。

二十二年，秋七月，赐原任浙江布政使彭家屏死，杀河南生员段昌绪、司存存、司淑信。昌绪家中存有吴三桂檄，昌绪为之浓图密点，加评赞赏。家屏收藏《明季野史》、《潞河纪闻》、《日本乞师豫变纪略》、《酌中志》、《南迁录》等书。又所刻族谱《大彭统纪》牵引得姓之始为黄帝苗裔，其命名曰大彭与累朝国号同一称谓。谱中凡遇明神宗年号，于帝御名，皆不阙笔，谓其目无君上已极，赐自尽，并杀昌绪等。

二十九年，秋九月，杀泰州知州赖宏典。以托人谋干迁官书中，有‘点兵交战，不失军机’诸隐语，指为逆词，命正法。

三十二年，冬十二月，磔浙江齐周华。周华以党吕留良遭遣戍，归刻其书，抚臣熊学鹏摘其中忌讳语以闻，并诬原任礼部侍郎齐召南犯隐逆词等罪，诏磔周华，落召南职。

三十三年，春二月，以已故谢济世所著《梅庄杂着》中多怨望语，飭令江西巡抚宋邦绥毁其书及版。

三月，命江西巡抚吴绍诗销毁已故李绂、李任汉、傅占卫所著各书版。

三十四年，夏六月，以已故钱谦益所著《初学集》、《有学集》，其书版均著销毁。因集中于国语、薙发两事，多痛诋语也。

三十七年，春正月，诏直省购访古今著作进呈。

三十九年，秋八月，催毁直省藏书。冬十二月，广东总督李侍尧查出已故屈大均诗文进呈。其诗集中有大都宫词三首，多纪顺治朝掖庭秘事，命销毁。寻阅文内有雨花台葬衣冠之事，命确访其处，速为创毁，无使悖逆遗秽，久留黄土云。

四十年，春正月，发遣吕留良之孙吕懿兼曾孙吕敷光往黑龙江，与穷披甲人为奴，因其为大逆缘坐之犯，不合损纳监生也。冬闰十月，诏毁《遍行堂集》、《皇明实纪》、《喜逢春传奇》各书。《遍行堂集》为僧澹归即明给事中金堡所著，《皇明实纪》及《喜逢春传奇》皆东莞陈建即江甯天笑生所撰。收藏诸书之高秉遣戍。

四十二年，冬十一月，逮江西举人王锡侯至京下狱。新昌王锡侯删改《康熙字典》，另刻《字贯》，其序文凡例将圣祖、世宗及帝御名开列。帝大怒，逮狱论死，巡抚至监司均革职。

四十三年，夏四月，山西举人王尔扬为同邑李范作墓志，于考字上用皇字。巡抚巴延三捕获严审请旨，帝谓尔扬迂腐用古，并非叛逆，免诛。冬十月，戮东台举人徐述夔及其子徐怀祖尸，其孙徐食田、徐食书并斩。述夔所著《一柱楼诗》中，咏正德杯云：‘大明天子重相见，且把壶儿搁半边。’帝谓‘壶儿’即‘胡儿’，又有‘明朝期振翮，一举去清都’之句，帝谓其愿有欲兴明朝去清朝之意，遂大怒，命与怀祖俱戮尸。食田、食书及校对徐首发、沈成濯，藩司陶易与，幕友陆炎皆坐死，知府谢启昆，知县涂濯龙俱革职。戮前礼部尚书沈德潜尸。德潜子告归，帝以己著诗集委之改订，颇多删润。德潜死，调其诗集进呈，则平时为帝点窜捉刀之作，咸录焉。帝大恚，命革去官爵谥典，撤出乡贤祠，扑毁所赐祭葬碑文。寻闻其咏黑牡丹诗：‘夺朱非正色，异种也称王’之句，指为逆词，令剖棺戮尸。江苏赣榆县民常玉振，于其父行述内有：‘于佃户之贫者，赦不加息，并赦屡年积欠’之语。抚臣杨魁捕获下狱，同特宝山县职员范起鹄家藏《亭林集》。江西士人李雍、河南致仕主事余腾蛟皆以逆诗逮审不实，免究。

四十四年，春二月，降福建巡抚黄检为真隶正定府知府。以检不应刊刻其祖父廷桂奏稿，且载入世宗及帝朱批也。夏四月，杀直隶民人智天豹。帝谒陵回京师，天豹使其徒张九霄于道旁呈献《大清天定运数》一本，中编大明天号三十馀条，而于乾隆年号仅及五十七年而止，又于圣祖庙讳直书不讳，命立斩，九霄斩监候。

四十六年，夏四月，绞杀在籍大理寺卿尹嘉铨。帝自五台山还至保定府，嘉铨使其子赍表赴行在，为父会一请谥，且请从祀孔庙。帝怒其狂妄，交刑部治罪，随据部查出嘉铨所著各书中，多狂悖之语，坐狡立决。

编者曰：自康雍间，屡兴文字之狱，时因天下初定，人心未一，人主为自卫计或非

得已。至乾隆朝，各案毛举细故，诛连满庭，于是比附妖言，告讐诗文之事纷然而起，御史曹一士尝疏论之，略谓比年以来，小人不识朝廷诛殛大憝之故，往往挟持睚眦之怨，借影响之词，攻诘诗书，指摘字句。有司见事生风，多方穷鞫，或致波累师生，牵连亲故，破家亡命，甚可悯也。臣愚以井田封建，不过迂腐之常谈，不可以为生今反古。述怀咏史，不遇词人之习态，不可以为援古刺今。即有序拔偶遗纪年，亦或草茅一时失检，非必果怀悖逆，敢于明布篇章。使以此类悉皆比附妖言，罪当不赦。将使天下告讐不休，士子以文为戒，殊非国家义以正法，仁以包蒙之意云云。观此则当时文禁之森严，冤狱之繁重，盖可知也。

卷二十四、兄弟猜忌及大臣之逐戮

圣祖康熙六十一年冬十一月，世宗即位，命贝勒胤祀、十三阿哥胤祥、大学士马齐、尚书隆科多总理事务，召抚远大将军十四阿哥胤禩驰驿回京。封胤祀和硕廉亲王，胤祥和硕怡亲王，胤禩多罗履郡王，二阿哥胤禑子弘晰多罗履郡王。先是，康熙中，胤禑居储位，会圣祖亲征准噶尔，胤禑奉命监国。以性仁弱故，为政务宽大，不为圣祖所喜，于是诸皇子希冀非份，相与蓄术，结宦官，为秘密之运动以倾陷之。圣祖不察，胤禑卒以此召祸，一再册立，仍被废斥。及世宗嗣立，恐诸人仍前固结，将不利于己，以胤禑、胤禩久被幽繫，不复能有所为，胤禩等庸懦，无足虑。惟胤祀才望为诸王冠，思有以笼络之。胤祀而能翰诚辅己者，王党势孤，日京消灭，自无与朝廷为乱者。乃封胤祀亲王，令与马齐等同理政务，馀晋爵亲王、郡王有差。又以胤禩为胤祀同母弟，其出征西宁时，中外群相揣测，谓圣祖试用胤禩，使之立大功于国家，为将来定储地。此时胤禩拥重兵在外，深得西北方人心，恐其生异志，特召令还京师，而改胤禩派往军前。发遣前，编脩陈梦雷父子于关外，梦雷前缘事发往关东，后圣祖东巡时，以其学问优裕，带回京师，令在诚亲王处，帮同编辑《古今图书集成》一书。诚王素以文学着称，梦雷日侍左右，世宗忌之。至是，坐以招摇不法，并其子再发遣。命诸王阿哥，名上一字改为允字，以与世宗御名同也。

世宗雍正元年春正月，禁侍卫、官员等私在诸王门下行走。二月，发遣内大臣勒什亨往西宁，随贝子允禩效力。先是，允禩派往军前时，怏怏不欲行，曰：‘我何罪而斥我万里？且居丧未过百日俟，陵寝回时再往亦未迟。’帝怒，诛其太监何玉桂、管领汉给事秦道。然处治二人时，帝语勒什亨，不必记在档案，而勒什亨记之，故有是谴。三月，晋封辅国公阿布兰为多罗贝勒，赏给佐领总理事务，时阿布兰不应，出班跪接。又宗人府建立碑亭，阿布兰拟文勒石，不应颂扬大将军功德，著革去贝勒，撤其佐领。夏四月，帝自山陵回京，命贝子允禩留驻陵寝附近之汤泉。五月，召从理郡王弘晰于郑家庄，去北京二十馀里。晋封贝子允禩为郡王，语王大臣曰：‘允禩心志高傲，从此不自改悔，则国法具在，朕不得不治其罪。’允禩来时，将此传谕知之。冬十二月，革履郡王允禩王爵，仍在原固山贝子上行走。以其自封王以来，并不感激效力之故。

二年夏四月，革郡王允禩爵，禁锢宗人府。因奉使出口，迁延不行也。五月，革贝子弘春爵，弘春，允禩子。六月，降贝子允禩为镇国公，以册封贵妃金册有舛错故。发遣贝勒苏努、内大臣德宁于右卫，刑部尚书七十于三姓地方，皆坐党附诸王也。秋七月，郡王允禩谪守景陵，允禩自立功西藏，中外颇称道之，故帝忌之特甚。冬十月，发遣刑部尚书二等公阿尔松阿于奉天，坐交通藩邸也。十一月革世子弘晟为闲散宗室，弘晟，允祉子。革裕新王保泰爵，坐党廉邸故。二阿哥允禑薨，追封和硕理亲王，谥曰密。

三年春二月，发遣二等公鄂伦岱于奉天，因其党阿廉邸也。夏四月，解年羹尧川陕总督大将军任，补授杭州将军。羹尧为藩邸旧人，帝初登极时，虑诸王为变，常令羹尧衷甲以从。前后以平西藏、青海、庄浪积功，爵上公、晋太傅、赐金黄服饰[1]、三眼花翎[2]、四正龙补褂[3]，共宠异之如此，实前后勲臣所未有。后帝委以密访允禩在军中时劣迹，戒曰：‘得状，吾必有以厚酬汝。’羹尧察其无可议，乃力为奏办，帝深滋不悦。至是，以羹尧贺表内朝乾夕惕误作夕惕朝干，帝怒曰：‘羹尧既不以朝乾夕惕许朕，则羹尧青海之功亦在朕许与不许之间。其自恃有功，故为怠慢耶？抑或杀戮过甚，致此昏溃也？观其平日带兵，尚属勤于操练，可改授杭州将军。’六月，革年羹尧之子年斌子爵、年富男爵、隆科多之子玉柱銮仪卫使职。秋七月，撤隆科多太堡衔，坐徇庇年羹尧也。并革年羹尧杭州将军职，授闲散章京，在杭州效力行走。革贝子允禔爵，因山西巡抚伊都立参奏其纵属毆民也。九月，革辅国公普照爵，普照，羹尧妻叔。削去太傅一等公年羹尧职衔，逮京审，拟正法。冬十一月，革内务府总管来保职，以其阿附诚王故。十二月，降郡王允禩为固山贝子，谓允禩为大将军时，任意妄为也。赐年羹尧自尽。帝久欲杀年羹尧，然以其功大不予保全，恐有乌尽弓藏之诮，因犹豫久之，会四川巡抚蔡珽被羹尧劾入京，因面陈羹尧不法诸款，命将军督抚提镇议奏。诸臣迎合参奏，请速加诛戮，议政处遂牒列羹尧九十二大罪，应立正典刑，帝令羹尧自裁，子富立斩，余十五岁以上之子发遣极边烟瘴地方充军，妻孙宗室之女遣还母家，族中文武革职，其嫡亲子孙将来长至十五岁陆续发遣，永不赦回。有厝养其子孙者，以党附叛逆例治罪。父太傅一等公遐龄，兄工部侍郎希尧俱革职。遐龄时年八十馀，初亦坐死，大学士朱轼力争，言以子刑父非法，得免。

四年春正月，诏允祀、允禔、苏努、吴尔占削籍离宗，革去黄带子。允祀改授民王，妻革去福晋，休回外家，严行看守。初，允祀册封亲王，其妻党往贺，福晋语来宾曰：‘有何喜可贺？今日封王，明日不能保首领耳！’帝闻而恶之，至是并坐。革隆科多职，派往阿尔泰地方办理界务。隆科多为帝元舅，颇有机干，帝之获当璧也。隆科多与有力焉，故帝即位伊始，不时召见，造膝密语，频与饮至更深。隆科多或至沈醉，令人舆送出宫。初令其承袭父佟国维一等公爵，寻加太保，授吏部尚书兼步军统领。谕令启奏处书写舅舅隆科多，后叙辅政功，复赏一等阿达哈哈番世职。及年羹尧得罪，交部议处，隆科多时长吏部，未将羹尧公爵议革，帝谓其袒羹尧，深恶之。然当时臣工，尚无敢言其罪者，值田文镜、幕客邬某者，窥知帝意，为文镜草疏劾之。疏上，隆科多果得罪，而文镜自是宠遇日隆，其得君之专，一时大臣无与伦比。二月，民王允祀、贝子鲁宾、简亲王雅尔江阿、镇国公永谦俱除爵，允祀、鲁宾俱监禁高墙。鲁宾、雅尔江阿、永谦等皆坐诏附允祀、允禩也。三月，敕改允祀名为阿其那，允禔名为塞思黑，译言猪狗也。时帝必欲杀二人，命诸大臣议其罪，大学士徐元梦泣奏曰：‘愿上念手足之情，免二人死。’帝怒，谪元梦中书舍人。撤食侍讲奉钱名世职衔，并书‘名教罪人’四字，令该管地方官制扁额，张挂其居宅，又令廷臣各赋刺恶诗一并交与名世，自行刊刻进呈。颁示直省各学校，以其尝赠诗年羹尧，称颂平藏功德，谓当立碑于圣祖平藏碑之后，故也。夏五

月，派兵提解允禩，并其子白起来京，禁锢寿皇殿。杀鄂伦岱及阿尔松阿，戮苏努及七十尸，革固山贝子满都，护善郡王讷尔素邈，裕亲王广宁爵，俱监禁宗人府。秋八月，署直隶总督李绂奏报允禩病故。先是，诏解允禩回京治罪，都统楚宗，侍卫胡什礼等将允禩用三条锁锁掣，至保定，奉旨即在此拘禁，及胡什礼回奏，述李绂有‘塞思黑一到，我即便宜行事’之语，帝命胡什礼驰往谕止，寻绂奏称并无此语，及绂奏报允禩患疾，帝命楚宗、胡什礼拣选名医用心调治，至是绂以塞思黑病故奏闻。九月，宗人府奏报阿其那病故。先是，帝命将允禔改禁宗人府，旋降旨曰：管理宗人府，顺承郡王锡保，才品优长，乃国家费心效力之贤王。令在内廷行走，差遣甚急，着给与亲王俸。护卫官员，俱照亲王之数给用，至是锡保以阿其那病故报闻。冬十一月，命将塞思黑之妻逐回外家，严加禁锢。

五年冬十月，禁锢隆科多于畅春园外。隆科多以帝令宗人府除去允禔等名，因嘱辅国公阿兰私抄王牒底本，存貯家中，欲留为将来对合地也。帝闻之大怒，革去阿布兰公爵，圈禁家中，调回隆科多治罪。至是，锡保奏隆科多罪状凡四十一款，请正法。命畅春园外附近空地，造屋三间，永远禁锢。子岳与阿革职，玉柱发黑龙江当差。十二月，禁锢将军贝勒延信于畅春园外。先是，锡保奏延信罪状二十款，请斩决，命与隆科多在一处圈禁。因延信尝称允禔为人朴实，阿灵阿为人杰，又有旨询问允禩、年羹尧罪状，并不据实揭报也。

六年夏六月，降诚亲王允祉为郡王。锡保奏允祉尝在御前喝责王大臣等，毫无臣礼，应革爵禁锢。帝曰：朕惟此一兄，从宽降为郡王。其子弘晟著拏交宗人府严行锁锢。

八年夏五月，革允祉王爵，禁锢景山永安亭。宗人府奏其于怡亲王丧事举哀时，全无悲泣之状，性情残刻，罪恶日稔，应削去王爵，革退宗室，即行正法。命从宽拘禁，自是帝之兄弟及诸王大臣凡为帝所猜忌者悉戮，逐无 矣。

[1]皇子服，诸王特赐者始许服

[2]贝子品制

[3]亲王服，诸王赐者亦少。异姓初无赐者，徒以御服无别。亲王且改二行龙、二正龙矣

卷二十九、增加兵额

高宗乾隆三年，增设八旗养育兵额。初，八旗兵额数二十五万人，入关既久，馀丁繁多，其不得充伍之闲散满人，至有窘迫不能养其妻孥者，世宗愀然忧之，亟欲为谋生计。无长策，欲增编佐领则正饷不敷，因议设八旗养育兵，给予钱粮，俾得赡养。于雍正二年选其下满洲、蒙古、汉军共四千八百人为教养兵，满、蒙每人月给三两钱粮，每年共需银十七万二千八百两。每旗满洲、蒙古、汉军共六百名，内满洲每旗四百六十名，蒙古六十名，汉军八十名。其汉军之八十名，令为步兵，食二两钱粮，就此钱粮数内通融料理，可多得四十名，汉军每旗选百二十名。此所设教养兵，皆于参领下计数选取，至是复定满洲、蒙古各旗原设养育兵，每二名出缺，作为三名，照汉军例，各给银二两。满洲、蒙古旗，每佐领下，增足养育兵十名，汉军旗每佐领下增足六名。

四年，设荆州驻防养育兵四十名。

六年，增杀虎口至绥远城兵额。

七年，增设荆州驻防养育兵四百名。

十年，设江宁驻防养育兵四百名。

十八年，复定养育兵每三名出缺，作为四名，再恩赏一名，各改给银一两五钱。时于原养育兵一万五千一百二十四名外，匀出缺五千四十四，再恩赏缺五千四十四，共二万五千二百十二名，食银四十五万三千八百十六两。

二十九年，设绥远城驻防养育兵四百名。

复定满洲、蒙古之养育兵二万三百十五名，每年增食米一万六千一百石有奇。

三十一年，增设伊犁驻防养育兵二百四十六名。

三十二年，增设成都驻防养育兵一百四十四名。

三十八年，增设乌鲁木齐驻防养育兵二百八十名。

三十九年，增设杭州驻防养育兵一百二十八名。

四十四年，增设土鲁蕃驻防养育兵四十八名。

四十七年，增添绿营兵额。先是，各直省七十一镇之中，绿营兵数虽名为六十四万

，而其实缺额常六七万。至乾隆四十六年，增兵之议案决，武职坐粮马干，另行添设养廉公费，赏恤另行开销正项。所有空名，悉令挑补实额。直隶省增实兵四千七百七十名，山东省增实兵一千五百八十一名，山西省增实兵二千五百九十五名，河南省增实兵九百七十九名，江南省增实兵五千十一名，江西省增实兵一千五百八十七名，福建省增实兵四千七百五十六名，浙江省增实兵三千三十九名，湖北省增实兵二千三百八十名，湖南省增实兵二千五百八十八名，四川省增实兵四千二百七十四名，陕西、甘肃二省增实兵一万二千七百三十名，广东省增实兵五千七百七十四名，广西省增实兵二千三百三十四名，云南省增实兵五千四百六十名，贵州省增实兵五千二百八十四名。于是举康熙以来绿营兵之不足者，悉数挑补，一举而添兵六万有奇。然岁添新饷几三百万焉[1]。

仁宗嘉庆四年，命各省督抚提镇召募新兵，补实兵额。自苗教军举以来，征调各省营兵开赴前敌，其在军中死丧逃亡者甚众，帝恐将来事定归伍时不敷各省原定兵数，因谕各省督抚提镇召募新兵。除河南、陕西、四川、云南募兵较多，所缺无几，毋庸议外，其余各省著照派出征兵现缺之数酌量招募。直隶、山东应先补十分之五，山西、甘肃、广东应先补十分之四，江西、广西应先补十分之三，贵州应先补十分之七。

九年，藉给宁陕及陕安等处新兵地价银两。白莲教会之役，以满、汉额兵征发不便之故，临时广募乡勇以佐战守，谓之新兵，复增置郡县营汛，即以新兵挑补。各地增设之兵额，湖北置襄阳提督一，郧阳总兵、道员各一，计增兵三千五百。陕西置五郎总兵一，改称宁陕镇。馀如陕安镇营、汉中协营、并阳平关、宁羌、略阳等处，增兵共八千六百一十七。四川置绥定府〈以达州升〉副将一，馀如保定、夔州所属要害地，各设守备，共增兵千。就中宁陕及陕安等处新兵，因地险粮贵，皆须一律置买地亩，自行开垦，俾裕生计而勤训练。每名借与地价银十两，共八万六千一百七十两，于是并地丁项下借支，在于节省马干项下分年扣还。至十五年冬季，全数归款。

十年，增设满洲、蒙古八旗养育兵二千二百五十名。帝以八旗生齿日繁，生计不免拮据，谕令将五营马兵以若干缺归入满洲、蒙古八旗闲散人等分别挑充，令都统以下各官悉心妥议。继思旗籍弟子与绿营兵士一体当差，未免有玷身份，著将差马拨出二千匹，交与张家口牧放，计每月可省马干银五千两。于八旗满洲、蒙古闲散内，每散满洲增额养育兵二百分，蒙古额增养育兵五十分，八旗共增养育兵二千分。又因每月节省节省马干银五千两，按照每兵每月给饷银一两五钱，共可得三千三百三十分，合较八旗满洲、蒙古佐领数目，于满洲八旗每佐领下，增设养育兵四名，共二千七百十八名。蒙古八旗每佐领下，增设养育兵三名，共六百十二名。

十一年，增设京师八旗满洲、蒙古及各营养育兵四千三百九十六名。先是，谕以八旗人口加增，自应再筹办理，著阁臣、部臣、都统等妥议，及复奏称。统俟河工办

峻时，筹出可备生息支用闲款银内，再行奏明办理。而帝以旗人生齿日繁，当急思鞠谋保聚之道。著于广储司拨银十万两，造办处拨银十万两，户部筹拨银五十万两，共七十万两，交商生息，增添养育兵。八旗每佐领下四名，其半分佐领下二名，蒙古每佐领下三名，圆明园护军营、内外火器营各三百名，健锐营一百五十名。八旗满洲、蒙古及各营，共增设养育兵四千七十二名。又内务府三旗每佐领下，增设养育兵四名，圆明园内府三旗六十名。增包衣三旗养育兵三百二十四名。

二十年，令青州驻防八旗闲散壮丁内，挑选馀兵二百四十名。青州驻防满营，额设马甲一千四百六十名，步甲三百二十名。到防既久，生齿日繁，奏请调剂。帝令将该营所存马价银六千两，再于司库扣存市平内酌提角二万四千两，共成三万两，交商生息，随饷拨解，交该副都统。在于驻防八旗闲散壮丁内，择其材堪造就者，二百四十名，作为馀兵，与甲兵一体操练，每月支給银一两，以资养贍。

宣宗道光元年，添挑太原城守尉驻防养育兵四十名。

[1]绿营旧制：马兵月饷二两，步兵一两五钱，守兵一两

卷三十、苗族及金川之征剿

高宗乾隆元年，春三月，经略张广泗分兵八路，合攻牛皮箐苗寨，破之，苗平。苗族种名不一，在四川者曰僰、曰生番；在两广者曰僮、曰黎；在湖南、贵州者曰徭；在云南者曰裸、曰野人。其语言风俗既与中国绝异，故中国自元明以来，设有宣慰、宣抚、招讨、安抚长官等土司，又有土府、土州县，其长皆得世袭，握自治权，盖欲仍其旧俗，官其酋长，以羁縻之也。顺康以来，袭明旧制，分设土官，然苗民不知耕作，专以劫杀为生，土官又以积威，苛敛虐使，恣为不法，故苗族常为边患。而于云贵为尤甚。自雍正四年，鄂尔泰巡抚云南，建策改土归流，因极言从前以夷治夷之失计，然欲改土为流，非大用兵不可，宜悉令献土纳贡，违者剿。世宗览疏，大喜曰：“卿，朕奇臣也！此天以卿赐朕也！”命进呈生年日月，召赴养心殿，手铸三省总督印付之。鄂尔泰抵任，用游击哈元生，委任以乌蒙、镇雄之事；用总兵石礼哈，搜讨贵州广顺之长寨，招服黔边东西南三面生苗二千馀寨，用知府张广泗招抚古州，辟苗疆二千里

前后劾黜云南霑益土州安氏镇沅土府刁氏及赭乐长官司威远州广南府各土目悉定澜沧江以东地以普洱为府广西诸土官自泗城之岑氏以下亦先后缴敕印纳军器二万馀用兵五六年三省边防粗定世宗奇其功至批札云朕实感谢矣不知如何待卿而后心安于是鄂尔泰以积勋封襄勤伯授武英殿大学士入朝广泗亦由云南巡抚移督湖广继之者皆易视苗事疆吏又以征粮激变至十三年春各寨蜂起聚集清江台拱闲陷黄平以东诸城积忿于鄂尔泰督军时所获苗皆刳肠截脰分挂崖树几满至是抵抗之志益坚至手刃妻女而后出战镇沅苗至缚知府刘宏度于柱裸淫其女而头曳之鄂尔泰虽惭怒次骨引咎自劾而苗患蔓延不复可制矣时诏发滇蜀楚粤四省兵会剿而军中各怀意见将军哈元生主剿提督董芳主抚抚苗大臣张照又密奏改流非策且致书诸将倡弃地之议因命令不能一致治军数月迄无成功时帝已嗣位尽罢张照哈元生董芳治罪而以广泗任七省经略先后攻克台拱之九股苗及清江下流各寨至是复增兵分八路围其逋逃于丹江古州郡匀台拱闲之大森林所谓牛皮大箐也凡烧千二百二十四寨赦三百八十八寨贵州苗族悉平越十年而有四川大金川之役

十二年春三月命云贵总督张广泗改督川陕驻四川相机进剿大金川苗部金川为四川西边诸土司之一为汉冉駹地隋置县唐属雅州明隶杂谷安抚司本吐蕃领地俗信喇嘛教明时封其部哈伊拉木为演化禅师世有大小金川流域地后分两部居小金川者曰攢拉（译言小河滨）居大金川者曰促浸（译言大河滨）顺治七年授小金川酋卜儿吉细土司职康熙五年授大金川酋嘉勒巴演化禅师印雍正元年以嘉勒巴孙莎罗奔于康熙五十九年从征西藏羊冈有功授为金川安抚使乾隆十一年莎罗奔势强盛谋兼并诸邻部以结婚政策羁縻小金川酋泽旺而夺其印以与泽旺弟土舍良尔吉复以兵力侵略革布什咱及明正土司并击伤中国之赴援军至是以广泗前征苗有功命移节川中专仕大金川军事广泗至进屯小金川之美诺信用汉奸王秋言良尔吉为乡导然大金川地险又长于防御工事以石筑高垒名曰战碉大小林立围攻数月诸将多失事副将张兴游击孟臣皆为降番所诱杀

十三年夏四月以大学士讷亲为经略起故将军岳鍾琪为提督驰赴大金川军营讷亲至军用以碉逼碉为唯一之兵略而得一碉辄伤人无算总兵任举副将贾国良皆战歿广泗所用之向导良尔吉前夺其兄泽旺印又烝其嫂阿扣感莎罗奔甚故在军中每以动静通报莎罗奔以故攻战复数月仍无尺寸功冬十二月以大学士傅恒为经略赐讷亲死杀张广泗傅恒至任总兵冶大雄为总统使副将马良玉诱诛良尔吉并斩阿扣王秋闲谍以绝撤诸方围碉兵为直捣中坚之计壁垒至是为之一新

十四年夏四月大金川土司莎罗奔降诏班师先是傅恒上疏陈选锐深入之计划期以四月奏捷时帝念劳兵久又以其地险欲罢兵诏傅恒还朝而傅恒已与鍾琪分军深入总兵哈攀龙哈尚德等连克巴郎平碉及色尔力石碉傅恒奉诏令鍾琪前往敌营谕降西藏之役莎罗奔从征隶鍾琪麾下素服其威德至是鍾琪单骑入噶喇依营中目莎罗奔而故缓其轡曰汝等犹识我否众惊曰果我岳公也皆伏地请罪导入帐中留宿鍾琪解衣安寝如常次日莎罗奔帅众诣军门降大金川平

三十六年冬十月罢四川总督阿尔泰以尚书温福侍郎桂林代之进剿小金川初乾隆三十一年以大金川莎罗奔兄子郎卡继大金川事渐桀骜时与邻部构衅总督命令致无效帝令阿尔泰檄九土司（松冈梭磨卓克基沃日革布什咱绰斯甲布小金川党坝巴旺）环攻之土司中兵力既多不敌阿尔泰又不知利用小金川以制郎卡郎卡遂反与小金川绰斯甲布和亲愈猖獗郎卡死其子索诺木又阴与小金川泽旺子僧格桑结攻守同盟之约遂合攻革布什咱及沃日诸土司帝命罢阿尔泰寻赐死以温福为大学士桂林为总督令率兵分路进讨

三十七年夏五月褫桂林职以阿桂为四川总督桂林与温福分军由打箭炉汶川进渐逼小金川境而桂林将薛琮以深入无援致全军陷没洩水归者仅二百余人桂林以隐匿不奏劾罢命阿桂代之冬十二月阿桂攻取小金川以温福为定边将军阿桂为副将军阿桂既代为川督转战有功至是直抵美诺僧格桑窜大金川阿桂檄索索诺木不应帝欲一举并灭之故有是命

三十八年夏六月小金川降番攻陷木果木温福死之授阿桂为定西将军以参赞丰伸额为左副将军明亮为右副将军先是温福等分道进发既而温福以敌扼险不得进驻军大金川东境木果木以狃于易胜不复调集各路兵马惟令提督董天弼分屯其东以守小金川地而日与诸将置酒高宴额駉色腾布护军统领伍岱提督马铨先后入谏反劾其煽惑军心帝为召还色腾布而遣戍伍岱遣绿营兵三千人取碉卡有伤者反责之人心并懈超勇公海兰察至扣刀以诮之迁延月馀敌侦知兵弱整劲旅数千东攻天弼军不战自溃进袭温福温福方雅服督战遂被执寻杀之所部战死者三千馀溃者万馀小金川复陷冬十月阿桂等克复小金川阿桂既受命改道出沃日攻小金川东境而明亮攻其南至是阿桂直抵美诺明亮亦所向有功小金川地尽复

四十年秋八月阿桂丰伸额明亮攻破大金川之勒乌围进围噶尔崖（括耳崖）自三十八

年十二月阿桂等军分三道进攻大金川阿桂自小金川攻其东丰伸额明亮自党坝攻其西北富德自革布什咱攻其西南三十九年七月阿桂军逼勒乌围时索诺木与其从祖莎罗奔守其地见阿桂军深入鸬杀僧格桑献其尸及其家族请停止攻击阿桂不许至是年八月破勒乌围莎罗奔索诺木已先期窜噶尔崖至是三路军会于噶尔崖城下包围之

四十一年春二月阿桂等攻克噶尔崖莎罗奔索诺木帅众降金川全境荡平阿桂等围攻噶尔崖四十馀日索诺木始与莎罗奔挈家族以下二千馀人出降并俘献京师大金川再定两金川既平诏以小金川地为美诺厅（后改名懋功）以大金川地为阿尔古厅（即今绥靖屯）直隶四川

编者曰自乾隆三十六年再用兵两金川以迄于平定得地不过千里人不满三万众而暴师五年糜帑七千万两其行军困难之理由固其地理之险阻与其土兵之同心效死要亦可想见当日国家之兵备为不可恃将略为不足称已顾时主犹躬亲谒陵勒碑太学复东巡告成于阙里铺张为甚盛事也抑又何哉

卷三十一、準部及回部之平定

高宗乾隆二十年，春二月，以尚书班第为定北将军，阿睦尔撒纳为定边左将军出北路，陕督永常为定西将军，萨拉尔为定边右将军出西路，往征准噶尔。自乾隆四年准部和议既就绪，边事稍甯，至十四年，噶尔丹策零死，其部内乱，其宰桑[1]萨拉尔、杜尔拉特台吉三车梭，先后来降，而辉特台吉阿睦尔撒纳亦于十九年师众内附，且乞师。帝久知其为准部所服从，利用之为向导，欲乘机大举。廷臣鉴于雍正九年和通泊之败，不愿再开衅，惟大学士博恒赞成帝意，帝喜曰：‘卿，朕之张华、裴度也！’既而准部大将玛木特亦来归，遂以是月分两路出师。北路出乌里雅苏台，西路出巴里坤，尽简八旗吉林索伦精锐以从。夏五月，两路兵抵伊犁，擒准噶尔汗达瓦齐及青海酋长罗卜藏丹津，伊犁平。自两路兵出发，两定边将军本准部渠帅，建其旧纛先进，故所至降者相继，两军遂于是月朔会于博罗塔拉河，越五日而至伊犁。达瓦齐已走保格登山，阻淖为营，众尚万馀。侍卫阿玉锡，夜以轻骑直簿其营，敌众惊溃，走投回疆。阿克苏伯克霍迪斯已得班第军中檄，即执之以献，并获前青海逃至之罗卜藏丹津，送京师，伊犁粗定。冬十月，阿睦尔撒纳叛，将军班第、参赞容安死之，萨拉尔被执。准部先故有四卫拉[2]，卫拉之分部各有其汗，自绰罗斯浑台吉强盛，伊犁始为回部盟长，抗衡中国者数世。帝初欲俟事定，仍设四汗以分其势，而阿睦尔撒纳欲为四部总台吉，私以其意乞额驸色布腾代请，期于七月下旬俟命，并使其众流言，非己为汗，准不得安。因用其国汗旧印，移檄邻部哈萨克及俄罗斯等国，不言降中国，但谓率满洲、蒙古兵来定准乱。班第等密以闻，帝命即军中诛之。时兵皆凯旋，随班第等得仅五百人，兵少，班第不敢发。先是，帝令阿睦尔撒纳以九月至热河，行饮至礼，班第等因趣之行，使喀尔喀亲王额林沁伴之，欲使入内地则易成擒也。阿睦尔撒纳迁延中途，迨八月中，待朝命犹不至，知事有变，入境且得祸，行至乌伦古河，乃谓额林沁曰：‘阿某非不臣，实中国无信。今入境如驱犬羊，大丈夫当立事业，安肯延颈待戮？’徐解副将军印掷与之，曰：‘汝持此交还大皇帝可也。’拥众驰去，并劫撒拉尔以行，遂噉伊犁叛，又遣众掠西路军台，于是刺麻宰桑等蜂起应之。永常兵数千屯乌鲁木齐，不敢往剿，班鄂皆自杀。事闻，以色布腾隐匿不奏，褫爵，额林沁纵逆，赐死，并逮永常，改命公策楞为定西将军，由巴里坤进剿。

二十一年，夏五月，褫策楞职，命公达尔党阿为定西将军。先是，策楞师行至吐鲁番萨拉尔自伊犁脱身来归知阿睦尔撒纳所在仅距一日程命参赞玉保急往追之而玉保信闲谍言谓阿睦尔撒纳已就擒献者且至遂驻军俟之报捷策楞策楞遽闻于朝比策楞至伊犁则阿睦尔撒纳已从容入哈萨克（可萨克今俄领中亚细亚境）将军参赞互相咎托言马力竭顿师不进于是和托辉特部青滚杂布亦叛四部亦骚动阿睦尔撒纳闻之自哈萨克归会众于博罗塔拉河谋自立帝怒褫策楞玉保职以达尔党阿富德代之命巴里坤办事大臣兆惠为右副将军往援并命超勇亲王成衮札布为左副将军追捕青滚杂布

二十二年夏四月命兆惠出西路成衮札布出北路大剿准噶尔会诸部内讧又痘疫盛行兆

惠兵至诸酋迎战皆败死阿睦尔撒纳复西窜往哈萨克其汗阿布賚许擒献及阿睦尔撒纳至阿布賚先败其马阿睦尔撒纳惊徒步入俄罗斯寻患痘死理藩院行文索之俄人以其尸送恰克图帝命成衮札布归镇乌里雅苏台兆惠留军过冬明年再进剿余众明年正月兆惠等合围纵剿先后虐杀四年凡山谷僻壤及川河流域可渔猎资生之地计二十馀万户六十馀万口皆搜剔尽矣事平设满洲驻防徙汉兵耕种其地置伊犁将军以统治之遂成为满洲一殖民地

二十三年春正月以雅尔哈善为靖逆将军征回部回部在天山南路其旧汗本元裔后值厄鲁特强盛遂隶准部势力之下及阿睦尔撒纳窜死天山北路之地全入中国南路大和卓木（译言圣裔）波罗泥都小和卓木霍集占欲乘新旧势力交代之际谋独立阴勒部众传檄各城咸戒严以待回部数十万争起响应惟库车伯克鄂对不欲附和奔伊犁霍集占诛其亲族严兵守库先是兆惠奏派副都统阿敏道为回部招抚使至波罗泥都欲集所部受中国约束霍集占曰我困准噶尔久矣今属中国则又为他族奴隶不如此时自立以回复旧有之势力乃诳阿敏道入库城而拘之寻被杀至是帝命出兵讨之秋七月褫雅尔哈善职命纳木札尔为靖逆将军先是雅尔哈善兵至库车进攻不利霍集占自阿克苏来援与领队大臣爱隆阿军遇激战竟日霍集占大败入城固守城依山以柳条沙土交筑炮攻不入提督马得胜于城北一里外掘地道已及城矣而雅尔哈善欲急切收效严令昼夜力掘敌人自城上瞥见灯火机遂泄敌自内注以水穴城之士卒六百人尽没时降目鄂对在军中献策曰闻霍集占食且尽必乘我不备突围归归则难制若于城西渭干爱曼河及北山要路各伏兵一千则贼成擒矣雅尔哈善以其言叵不听唯下令并力攻取一日暮索伦老卒牧城下闻城中驼鸣似负重声奔告曰驼鸣高且健贼将遁矣雅尔哈善方饮怒曰尔何知酌如故其夜霍集占率众开西门由渭干爱曼涉水遁而守西门之都统顺德讷闻报尚以昏夜不发兵及晓始遣百人追之敌已渡河断桥去远矣逾数日城守阿拉辨以空城降事闻雅尔哈善顺德讷马得胜皆伏法命尚书纳木札尔代之并令兆惠移师会剿

二十四年秋七月兆惠抚定喀什噶尔叶尔羌二城初兆惠师抵乌什伯克霍迪斯来迎即前擒送达瓦齐者询知波罗泥都奔喀什噶尔霍集占奔叶尔羌兆惠既至叶尔羌以兵少不能攻城欲伺便取胜乃择城东隔河有水草处结营所谓黑水营也侦敌之积聚在城南棋盘山欲取之以充军实遂由城南夺桥渡甫济四百骑桥忽断城内出五千骑来截步兵万馀继之张两翼来攻隔河兵不能救阵亡者无算总兵高天喜副都统三保护军统领鄂实监察御史何泰侍卫特通额俱战歿余兵浮水还掘壕筑垒以守军中乏食驼马亦尽每乘闲出掠曰民烹以充食无水嚼冰饮相持三阅月已无生还望将军纳木札尔参赞三泰于途中遇敌阵亡富德在北路冒雪赴援不得达会巴里坤办事大臣阿里衮以兵夜至合富德军大呼进鞭驼马蹴地声壮敌不知来兵多少骇而溃遁入城始与兆惠合振旅还阿克苏乃议两路进师兆惠由乌什取喀什噶尔富德由和阗取叶尔羌两和卓木各弃城遁去喀什噶尔叶尔羌皆复八月拔达山部酋素尔坦沙函送回馘霍集占首级回部平富德等追敌至伊西洱库河乃拔达山部界也敌先据山麓以待富德麾兵进击不利乃选锐手四十人缘山北岭俯击之敌辎重营有攀援过山阻于岸者方惊惧失措闲霍迪斯鄂对大呼招降降者蔽山而下声若奔雷霍集占禁之不能止遂与波罗泥都逸入拔达山部富德檄谕其酋素尔坦沙缚以献素尔坦

沙乃擒二人杀之波罗泥都首为其从人窃去乃函霍集占之首以献回部悉定

编者曰天山南北之战事辟地广万有馀里杀敌达百万口其成功似甚盛然劳师五年费帑三千万两在人主好大喜功故不惜国家艰难之物力与宝贵之人命而致之此以见开拓地土之不易矧其所遇非劲敌也庸足多哉又霍集占妃香妃者高宗闻其美兆惠陞辞时嘱为生致之至则郊迎入处之西内为建香妃楼楼外肆市室庐礼拜堂具如西域市以悦之而妃不为屈衽衣中藏白刃以数十计语宫人欲得当以报故主也太后钮祜禄氏闻之恐会高宗有事于圜丘宿斋宫后急召妃至慈宁宫缢杀之高宗趋救之不及则痛哭命葬以妃礼事见达县吴德瀾湘潭王闾运各集中附纪于此

卷三十二、西南诸国之宾服

高宗乾隆三十二年，春三月，诏明瑞以将军兼云贵总督，前往永昌，接办缅甸军务。缅甸，古朱波地，为后印度半岛诸国之一，自古不通中国。宋宁宗时，始见史志。元世祖尝往征，责贡赋。明时设三宣慰司以羁縻之，然万历二十二年后，朝贡久虚，自康熙元年，执送明永历帝由榔交中国后，两方之关系遂绝。雍正九年，其国与整迈构兵，其头目蟒占灯遇中国守备燕鸣，虽告以国王明年进贡之语，而卒未至。乾隆十五年，始以茂隆银厂厂长吴尚贤之介绍，附表达总督，愿充外藩适其国木疏部长瓮籍牙革命军起，尚贤亦以中饱厂课事下狱，事又中止。十九年，瓮籍牙既恢复国都，诸土司相率降服，惟贵家与木邦二土司抵抗累岁。贵家者，前随永历帝入缅之贵族，子孙沦于缅，自署曰贵家，世据波竜银厂，此赏雄诸部。二十七年，为瓮籍牙所战败，窜居孟速地方。为内附计，而总督吴达善，索七宝鞍于其酋宫里襄雁，不得，遂诱而杀之，奴其妾婢，并檄缅人擒献里雁之妾囊占。时瓮籍牙已死，其子莽纪觉嗣，囊占已适莽酋弟懵驳，至是懵驳以达善有心指责其妻淫行，大忿恨，乃时噉其酋内犯。达善恐后连败露前事，戒边将毋与战。缅人自是益心轻中国。至三十年，遂大举入犯九龙江方面。时达善已移督川陕，刘藻代之，发兵防战，三路皆败。三十一年，朝命大学士杨应琚督滇，藻遂以忧惧自刎死。会缅军病疫退去，应琚得以其间，收复车里、孟良等地，乃狃于易胜，疏陈缅甸可取状。帝信之，应琚移檄缅邦，言精兵数十万陈境上，不降即进讨。于是缅人乃大出兵攻木邦、景线，皆陷之，又以舟师薄新街，守将赵宏榜遁，还虎踞关内。应琚闻警，遂构精神病，诏粤督杨廷璋赴滇代治军。而缅人诈乞罢兵，应琚病亦渐愈，遂奏捷，廷璋乃归。应琚亟欲与缅人议和，以弥缝前奏，然缅人侵略不止，帝察其伪，令明瑞代之，逮应琚回京，寻赐死。是年，缅甸袭暹罗，陷其国都，逐其国王马邻达刺，置守兵而还刺。暹罗，故隋唐赤土国，复分为暹与罗斛二国。元初，暹常入贡。元末，罗斛强，其王波罗吉并有暹地，称暹罗斛国，都湄南河滨之犹地亚。明时，朝贡不绝。洪武二年，更号暹罗。自康熙十二年受中国封，贡使频至，故为缅甸近邻。尝为缅甸所破，为缅附庸。后独立。至是因其国王不善抚众，国民时怀二心，缅人复乘机又破之。

三十三年，春二月，明瑞兵溃于小猛育，大将观音保等皆战歿，明瑞自杀。明瑞以三十二年五月至永昌，作战之计划已就，遂先将兵万七千出发，由宛顶向木邦使参赞额尔景额将九千人由虎踞关向猛密十二月至木邦守兵望风先遁留兵五千守之乘胜渡锡箔江至象孔以迷道故待猛密援兵而后进乃回军向猛笼时额尔景额进次猛密北之老官屯为敌所困因幽恚死其弟额尔登额代之顿兵不进明瑞盼援不至而敌兵迫日急是年正月乃复弃猛笼向木邦以归行至小猛育地方闻木邦留守兵已为敌袭溃戕参赞珠鲁讷道员杨重英被掳明瑞进退受困遂自杀所部万余人悉溃领队大臣观音保以下十余人皆死之事闻逮额尔登额至京磔之并斩提督谭五格于市

三十四年春正月命大学士傅恒前往云南经略军务时暹罗流寓中国人郑昭起兵为暹罗

复讎回复犹地亚驱逐缅甸守兵建新都于盘谷故缅甸时与暹罗构兵不欲再结怨于中国遂以

三十三年四月具蒲业缅文求和时副将军阿里衮已至军即据以闻不许六月中参赞舒赫德总督鄂宁密陈招致缅人事后被严旨已而副将军阿桂至倡与暹罗连盟夹攻缅甸之议后亦未克实行冬十一月经略傅恒奏报缅甸情驳遣人呈书请和允之先是傅恒以七月奉本省四川贵州满洲兵共六万有奇自滇省起行至戛鸠乐丹结筏十馀日乃毕由猛拱猛养所历二千馀里无缅兵遂以十月渡大金江回蛮暮是役也奔走百七十馀日军力疲乏而未尝一战经略名誉顿损惠得病继而阿桂率战舰百艘至与敌舟大战于江中连破之进攻老官屯敌垒敌竖栅自固攻久不克敌开水门通舟运粮械阿桂拔战舰越栅截之敌人乃遣人立栅上递缅文请张幕适中地将军等往议款时阿里衮已故傅恒又病重诸将以兵多染瘴日有死亡争请许和恒乃遣使责缅帅眇旺模以进表纳贡返土司地诸事语未竟眇旺模左顾而去会有诏召传还朝遂罢议恒归未几以忧恚死

三十五年春正月云贵总督彰保遣使往缅甸议和缅人拘其使不遣保遣守备苏尔相往督前三约为所拘留帝大怒复议兴师以阿桂前首倡罢兵褫职降为兵会金川事起遂罢南征议

五十三年秋九月缅甸使臣细哈觉控等入觐先是四十一年金川平帝遣阿桂赴云南会同总督李侍尧勘边增兵为进攻计缅人纵苏尔相还事乃已至四十四年缅王懵驳死其国内乱屡作四十七年复为暹罗所破暹罗王法亚查克利通贡中国复得中国册封于是缅人益惧至是遣使入贡并许释归杨重英等重英自陷缅甸独居萧寺二十年缅人说其降不屈欲赘为婿亦不可前重英被掳缅人纵其随员二人还帝命磔诸境上且谕令滇督他日重英归即照此办理至是帝怒已解复重英职且旌其忠谓其节过苏武亲制苏杨论以褒之重英未及入国门而卒其眷属囚系者亦二十年及是始赦出冬十月命两广总督孙士毅出兵安南安南古交趾地在暹罗之东（今法领亚细亚地也）明永乐时尝为中国所灭宣德三年黎利起兵独立重建大越国嘉靖时莫登庸篡国据河内为北朝黎氏据清华州为南朝自是大越分为南北朝万历中南朝将郑松逐莫氏复河内而阮潢据顺化称广南王于是安南分为大越广南二国至康熙五年赐封大越王黎维禘为安南国王始通朝贡乾隆三十八年广南土豪阮文岳与其弟文惠文虑起兵覆广南三分其地自据中部称大帝以南部与文虑使文惠回复北安南郑栋窃据之北部三州五十三年文惠复举兵灭安南安南嗣王黎维祁出亡民闲至是其遗臣阮辉宿扈王族二百余人自广西龙州附近入边士毅以闻帝以黎氏守藩奉贡百餘年在中国有保护之义务乃安置其家属于南宁命士毅出师而别命云南提督乌大经以兵八千由蒙自进入屯宣化镇为声援留兵二千守谅山以八千直捣河内十一月孙士毅复安南诏封黎维祁为安南国王士毅统兵出关自谅山镇分道进发沿途得安南国民之欢迎提督许世亨遂得以八千人长驱深入不逾月而恢复东京士毅承旨封维祁为安南国王檄广西巡抚孙永清归其家属

五十四年春正月阮文惠袭安南孙士毅遁入镇南关提督许世亨死之先是东京捷闻后诏

士毅罢兵而士毅妄信文惠乞降之说驻师河内以待又骄不设备是日军中方置酒张乐举元日祝典夜忽得警报称阮兵大至始仓卒备战昏暗中自相蹂躏维祁挈家先渡富良江入边士毅随之既渡士毅令斩浮桥以断后于是兵在南岸者自提督以下溺死至五千余人其云南之师以黎人黄文通向导得全返士毅上疏自劾命入京以福康安代之夏六月封阮光平为安南国王文惠既据安南适其兄文岳方与暹罗构兵恐中国再举乃更名光平遣兄子光显叩关诣督臣言守广南已九世与安南敌国非有君臣之名分帝亦以维祁再失国乃天厌黎氏维祁不堪扶植又鉴于前此军事上之失败更无意用兵因责光平以来年万寿光平当诣京师祝釐及为许士亨等立祠安南诸事光平悉听命至是赐光平印封安南国王而编置维祁家属于汉军旗授佐领

五十六年冬十一月命福康安为将军海兰察奎林为参赞往征廓尔喀先是西藏南境喜馬拉耶山之南麓有蛮民居之分建多数部落其中泥泊尔部最强后分三部时有内讧其西邻廓尔喀乘闲灭之遂雄长诸部乾隆五十三年后藏班禅族属适有争夺遗产之事廓尔喀复兴兵侵入后藏帝命川督鄂辉成都将军成德统兵剿之以侍郎巴忠监其军巴忠恃近臣不服鄂与成统属自遣堪布许以岁币万五千金而以敌降饰奏翌年岁币不至廓尔喀大举深入驻藏大臣保泰拥兵不救并欲移班禅于前藏赖刺麻不可至是事闻帝震怒巴时扈驾热河畏罪投水死褫鄂成保三人职改保名为浮习浑（译言卑贱）命福康安兼程进

五十七年春三月晋福康安为大将军夏六月福康安由青海至后藏连破廓尔喀屯兵尽复藏地后分兵三道侵入泥泊尔福康安以四月出师先遣领队大臣成德岱森由聂拉木进总兵诸神保驻绒辖防敌人抄袭后路而自与海兰察与敌战于擦木又战于玛尔辖直抵济龙成德亦由聂拉木转战而入凡后藏所失地悉复秋七月福康安连克噶勒拉堆补木特帕朗古桥甲拉古拉集木集等处七百餘里福康安自入敌境敌举国来拒于噶多溥福康安遣海兰察战大败之遂克木城石卡数十追奔至雍雅山敌人遣使请和不许至是里粮再进六战皆捷八月福康安败绩于热琐桥檄披楞部夹攻廓尔喀廓尔喀再请和许之遂班师师行至热琐桥距其国都可莽多仅一日程福康安以为出师以来势如破竹甚骄满拥肩舆挥羽扇督战兵皆解囊韃负火枪以息敌乘闲入遂大败护军统领台斐英阿以下阵歿者十余人时闻敌之南境邻部披楞与有夙讎福康安因檄其同时进攻敌恐南北受困再遣人议和既盟遂班师

编者曰是役也巴忠既辱国于前福康安复债师于后犹赖披楞干涉事克转问用兵绝域者可不引以为戒欤

卷三十三、台湾林爽文之乱

高宗乾隆五十一年，冬十一月，台湾彰化民林爽文作乱，陷彰化、诸罗、淡水。凤山民庄大田起兵应之，据凤山。知府孙景燧，都司王宗武，同知程峻，长庚刘亨基，知县董启珽、汤大奎，巡检冯启宗等焉。爽文彰化巨族，世居县之大理杙庄，豪富雄一方，聚众结秘密社，号曰‘天地会[1]’。积数十年，吏无敢问。嗣为知府孙景燧所闻，檄峻及副将赫生额、游击耿世闻，帅兵役往补。不敢入，驻营于五里外土墩，谕村民擒献，否则村且先焚，邻近数小村聚以忧之。爽文遂因民怒，集众夜攻营，全军尽覆。明日，爽文乘势陷彰化，寻又隐诸罗，景燧、宗武、长庚、亨基、永川宗悉为所杀。爽文自称明主大元帅，大田亦起于凤山，约合趋府城。

五十二年，春正月，林爽文、庄大田分水陆两路犯台湾府。总兵柴大纪御诸盐埕桥，爽文败绩。爽文等兵犯府城，大纪遣兵赴南路以拒大田之众，而自将御爽文于盐埕桥，杀其众千馀。桥距府治五十里，为水陆交通扼要之区，大纪自守之，敌始不敢窥府城。二月，命常青督师渡台剿贼，以李侍尧为闽浙总督，柴大纪署理水师提督，郝壮猷署理陆路提督。先是，提督黄仕简、任承恩渡海后，观望失机，时大纪督率官兵义民收复彰化、凤山、诸罗、鹿仔港、竹塹等处，郝壮猷在南路亦颇有斩获，帝闻，命仕简、承恩解任，令常青自行督师，而以大纪、壮猷分摄水陆提督。三月，改授蓝元枚为福建陆路提督。时谕旨谓大纪、壮猷因仕简、承恩等观望，不无效尤，解大纪署任，以壮猷代之，以元枚熟悉台湾情形，调补陆路提督。夏四月，命常青为将军，督办台湾军务，以福州将军恒瑞、陆军提督蓝元枚为参赞，寻改授元枚水师提督，柴大纪署理陆路提督，逮治黄仕简、任承恩、郝壮猷等，壮猷寻伏法。先是，仕简在台时，檄大纪北取诸罗，壮猷南取凤山，大纪连战获胜，遂复诸罗，壮猷南出二十里即为敌阻，顿兵五十日始获入凤山。凤山城已空，招民复业，匪混其中，吏复不觉，城复陷。游击郑嵩、延山俱战歿，壮猷遁归府城，至是与任简、承恩同被逮，而斩壮猷以徇军中。六月，诏柴大纪补授福建陆路提督，兼管台湾镇总兵事务。大纪复诸罗后，爽文屡次分路来犯，大纪连战击退，杀获以数千计，帝深嘉之，故特加擢用。秋七月，授柴大纪为参赞，赏给‘壮健巴图鲁’名号，以其在军中一切调度深合机宜也，加太子少保。八月，命大学士陕甘总督福康安为将军，携带钦差大臣关防，驰赴台湾，代常青督办军务，以内大臣海兰察为参赞大臣，普尔普舒亮领队大臣。常青至台后，未几，蓝元枚卒，青与恒瑞引兵出南路，离府城十里，遇敌即退，疏请增兵万，致敌得以其暇，蚕食各村，于是泉人之不从反者，亦劫使从之。旬日间，骤增众十馀万。爽文驱以攻诸罗，诸罗为府城北障，赖大纪力守，得不陷。青遣兵往援，皆不敢进，恒瑞复张皇敌势，疏请兵六万。青本和珅私人，老而耄，在台畏急甚，日夜流涕，欲弃城遁者再，诸将止之，因密札哀乞珅，请以他将往代，珅奏见之，帝知二人不足恃，故遣福康安、海兰察代之。冬十一月，诏改诸罗县为嘉义县，封柴大纪为一等义勇伯，世袭罔替。令浙江巡抚以万金恤其家属。时爽文屡以大队攻诸罗，志在必得。又攻盐水、鹿仔诸港，以断府城粮道，大纪皆分兵夺之，决渊溃、破炮车，以守城兵四千当敌众十馀万，

屡出奇夺贼积粮，食尽则以花生、地瓜、油杭充饥，福康安奉诏赴援，迳留中道，疏请增兵而后进，又严旨不准行。大纪力守孤城，已亘丰载，至是敌势日张。有诏令捍卫兵民出城，再图进取，而大纪疏言：‘诸罗失则府亦危。且数月以来，深壕增垒，守御甚固，一朝弃去，克复甚难。而城厢内外义民不下四万，不忍委之于敌，惟有固守待援。’帝览疏为之泣下，赏赉有加，奖谕备至，诏中有‘大纪当粮尽势绝之时，惟知以国事民生为重，虽古名将，何以加兹……’等语。冬十一月，海兰察大破贼众于仑仔岭，再败之牛稠山，诸罗围解，贼遁斗六门。初，福康安统兵援嘉义，从海兰察策，声言直抵大理杙，而阴趋县治，遇敌仑仔岭。涨兰察奋勇杀入，连破敌众，即日抵嘉义城。明日，福康安亦至，爽文等遁入斗六门据守。十二月，海兰察攻克斗六门、大理杙等处。林爽文遁入集集埔，海兰察乘胜攻克斗六门，遂捣大理杙。爽文已携家走集集埔，福康安止海兰察勿追，使人传谕埔内生番，擒爽文出献，爽文等反得以乘暇布置，据险死守。

五十三年，春正月，海兰察擒获林爽文于箐谷。爽文自走入集集埔据溪岸，垒石环数里，海兰察帅领军队腾险而上，爽文与其党数十走箐谷，至是海兰察官追至老衢崎寺方，爽文等悉就擒。二月，海兰察擒庄大田于牛庄。海兰察擒林爽文后，即移师攻大田于牛庄，追至极南之琅桥，先以舟师断其前路，环山围之，大田亦就俘，馀党悉定，台湾平！秋七月，杀太子少保参选大臣一等伯柴大纪。大纪前以保护府城及固守嘉义县功，帝与廷臣无不称其义勇，及福康安至，大纪官兵出迎，咸饥羸无人色。大纪自以参选伯爵，不执纛韃之礼，福康安遽劾其前后奏报不实，反诬以激变退缩等罪。词内并及提督蔡攀龙。帝始犹以为疑，前后三诏中，略谓福康安于大纪等，遇事吹求，而于恒瑞，又因为亲戚，曲为瞻徇。大纪等未免因系大臣，且屡经优旨褒嘉，稍涉自满，于福康安前礼节不谨，致为所憎，遂直揭其短耳。时福康安已定拟大纪斩决，帝命解京亲讯，及后入侍郎德成、侍卫额勒登保之谮，又大纪至京，供内有德成在台湾连日审讯义民，诱令指出大纪职罪等语。帝怒其攀陷，遂著照福康安所拟，即行处斩，而于拥兵不救嘉义之恒瑞，前后失律之常青、黄仕简、任承恩、普保吉等反得不死，或加擢用。

[1]即三合会

卷三十六、内禅之真相

高宗乾隆六十年，秋九月，帝御勤政殿，召皇子、皇孙、王公大臣入见。宣示立皇十五子嘉亲王颙琰为皇太子，以明年为嗣皇帝嘉庆元年。帝践祚之初，尝焚香告天，若得在位六十年，即当传位嗣子。嗣以次子永琰为嫡出，且人品贵重，当然继体。因于乾隆元年七月，循用雍初年成式，亲书其名，密置于乾清宫正大光明匾后。旋永琰于三年十月病殇，帝召大臣等启阅密旨，赠为端慧太子。后复以七子永琮亦系嫡系，拟书名臧贮，继念其年尚幼稚而未果，旋亦早世，谥曰悼。至三十八年冬至，祀南郊，帝以今太子名昭告上帝，并默祷如所定嗣子不克负荷，即降之罚，使其夭折，俾得再简元良，以延宗祐。是日，复遣诣盛京，祀陵，隐然以神器攸归，面稽于祖也。至是御门宣布册立缘由。俟长至后，太子移入毓庆宫，以定储位。即于明年元旦行授受典礼，并两次宣谕，略谓：‘朕今精神康健，视听不衰，一日不致倦勤，即一日不敢懈弛。归政后，凡遇军国大事及用人行政诸大端，仍当躬亲指教，俾嗣皇帝将来知所禀承，至中外俱题章疏，及引见文武官员寻常事件，俱由嗣皇帝披阅，奏知朕输云云。’

冬十二月，谕朕于明年归政后，凡有缮奏事件，俱书太上皇帝，其奏对称太上皇。

仁宗嘉庆元年，春正月，朔，举行授受大典，帝侍上皇诣奉先殿堂子行礼，上皇御太和殿，亲授帝玺，帝跪授。上皇受贺跽，还宁寿宫，帝即位受贺。奉上皇传位诏书，颁行天下，覃恩有差。帝侍上皇诣寿皇殿行礼，御乾清宫，赐皇子亲藩等宴。帝奉上皇命，册立嫡妃喜塔腊氏为后，侧妃钮祜禄氏为贵妃，刘佳氏为诚妃，侯佳氏莹嫔。帝侍上皇御宁寿宫皇极殿，举行千叟宴，赐亲王大臣、蒙古贝勒、贝子、公、额附、台吉年七十以上者三千人，及回部、朝鲜、安南、暹罗、廓尔贡使等宴，其一品大臣，年届九十以上者，上皇召至座前，亲赐卮酒，馀赏诗章、如意、绵缎、文绮、银牌等物有差。

二月，帝御乾清门听政，自是以为常，在圆明园则御勤政殿。

帝初御经筵，诣传心殿行礼。

三月，帝侍上皇出京谒陵，幸南苑，行围七日还京师。

夏五月，帝侍上皇幸木兰行园。帝奉上皇命，晋赠故大学士闽浙总督贝子福康安为郡王，予谥文襄，配享太庙。康安奉命征苗，督七省之兵，与苗相持一年馀，始奏么么不足数，及老师旷日，则频以暴雨山潦涨阻为辞。先复请益兵数万，降苗受官弁百馀，月给盐粮者数万，旋抚旋叛，军士中暑毒死者甚众。数省转输，费巨万计。在军穷极奢侈，尊若帝天。顾上皇宠任之，屡欲进以王爵，而絀于家法，乃倬总师干，建军功，以为分封之基础。所至之地，简名将劲旅以辅之。父传恒，晋贝子，兄灵安、隆安，弟长安皆尚主。至是，康安卒。六月，己亥朔，日食。

秋八月，还京师。九月，帝奉上皇命，御出入贤良门，率皇子诸王等习射。

冬十二月，帝侍上皇幸子旻宁[1]所，赐大婚礼。

二年，春二月，后喜塔腊氏崩，谕谓皇后册立甫及一年，母仪未久，且昕夕承欢，

诣取吉祥，此七日内，圆明园值日奏事之王大臣等及引见人员，俱著常服，惟不挂珠。此礼以义起，天下臣民等自当共喻朕崇奉皇父孝思，敬谨遵行，副朕专隆尊养至意。时帝以礼统于尊，一切丧礼从杀，而和珅、福康安等每日进见上皇，必详询帝不遇于哀悼皇后否，及在宫内服色。珅等辄对以皇帝孝奉为务，甚能以礼制情，并不遇于伤感。因奉养太上皇，诸取吉祥，不独御用系属常服，即凡随从太监亦然。上皇闻之，乃大悦。三月，帝侍上皇幸盘山，越十日还京师。夏五月，帝奉上皇敕谕，将册立贵妃钮祜禄氏为皇后，先封为皇贵妃。帝侍上皇幸木兰行园。秋八月，还京师。冬十月，乾清宫交泰殿灾。

三年，夏五月，帝奉上皇幸木兰行园。秋七月，帝奉上皇命，以雨，停秋猕。九月，帝侍上皇回京师。冬十月，辛卯朔，日食。戊午己未之夜，众星交流如织。

四年，春正月，上皇崩。下和珅、福康安于狱。帝受禅三年中，一切由上皇主政，珅日侍上皇左右，见其耄荒，窃弄威福日盛，帝皆优容之，且外示亲厚，呼相公而不名，遇有奏上皇者，皆令珅代白。左右有非之者，帝曰：‘朕方倚相公理四海，何可轻也？’珅又荐其师吴省兰为帝录诗集，觐动静。帝知其意，吟咏中，不露圭角，珅心安之。又帝于臣工条陈章内语有侵珅者，下军机及部议，时裁去衔名，及折尾年月日，或止交议一事而裁去其前后文，不欲令人知之，恐其触怒上皇，取怨权奸也。至是，上皇崩，翌日，御史广兴、广泰，给事中王念孙、交章劾珅，帝立命仪威二王传旨逮问，并令勇士阿兰保监以行，珅旋伏法。

[1]宣宗

卷三十七、嘉庆中衰

仁宗嘉庆四年，春正月，帝亲政，诏罢贡献，谕中有‘诸臣以如意进者，朕视之转不如意’语。时叶尔羌采解大块五色石，辇至嘉裕关前，令无庸解入，并弛私售叶尔羌、和阗等处玉禁，撤回各卡伦防兵归伍。一时珠玉之价，骤减十之七八云。谕九卿科道奏事，封章密奏，直达御前，不得另具副封关会军机处。追赠已故御史大夫曹锡宝副都御史衔。锡宝在乾隆中，尝劾奏和珅家人刘全倚势营私，家赀丰厚。至是珅伏法，查抄全家产，数逾二十万，帝嘉锡宝当日之敢言，特旌之，并令给予一子荫生。二月，复宗室会试例，并著自辛酉科为始，与生监一体乡试。夏四月，给降调礼部主事伊壮图给事中衔。帝念前内阁学士伊壮图以陈奏各直省仓库亏缺，降调回籍，深致婉惜，令驰驿来京，将加擢用，至是伊壮图来京，以母老陈情，乞军机王大臣代奏，命给予给事中衔，仍令驰驿回籍侍养，并准其在籍奏事，呈由云南巡抚转递。禁京城开设戏园。五月，禁止各省摊扣官员养廉及兵丁月饷。秋七月，东南滨海大风雨，海啸。

八月，定各省刑具式，有私创及非法滥用者，罪之。戍翰林院编修洪亮吉于伊犁。亮吉上书成王永理及朱圭、刘权之，言时事，冀其转奏，书中罗列谄事和珅诸人，现列官中外者四十余人，末复指斥乘舆，有三四月以来，视朝稍晏，恐有俳优近习荧惑圣听语。王以闻，帝大怒，即日逮狱治罪，寻命免死，发往伊犁交将军保宁严行管束。九月，江南洪泽河决。冬十月，绞杀湖北襄阳道胡齐仑，因经手湖北军需，任情馈送，至侵蚀至二十馀万两，逮京讯实，命即处绞。自剿办教匪以来，已历四载，费帑银数逾七千馀万，而各省协济之款尚不在此数。嗣查川省弊端更甚，建昌道石作瑞吞侵帑银至五十馀万两，延诸将帅会饮多在深菁荒麓间，一席之费，辄至三四百金，赏赐优伶，犒赏仆从，不与焉。福康安初至，作瑞馈珍珠三斛，蜀锦一万匹，他物称是。所侵者固皆荡尽，至死无殁，人争快之。冬十月，命在京大员密保才守出众人员。十二月，降国子监祭酒法式善为翰林院编修。式善于春间条奏事宜，折首有“新政维新”语，及论八旗出关屯田一节，大忤帝意，拟京察时罢斥。至是，尚书丰仲济伦，以人才保荐，帝疑有请托，命解任下廷鞠，寻命降调。

五年，夏四月，癸未朔，日食。以旱，命清狱。六月，申严赴京越诉罪。秋八月，命王大臣等于自行陈奏事件，须自行呈递，即各部旗衙门公递事件，亦应专差值堂官一人，亲自到宫门，递交奏事官接受。谕出差人员，除军机大臣等，准其随带军机章京外，其余各省率行奏请者，即将该大臣治罪。九月，申谕各省督抚，毋奏留升任他省人员。

六年，春正月，禁乡会试卷用隐僻字书及书写卦篆字体。三月，申严匿名文书坐罪例。夏六月，京师大雨，宫门水深数尺。永定河溢，桑干河决。诏曰：“自六月朔日，大雨五晝夜，宫门水深数尺，桑干河决，漫口四处，京师西南隅几成泽国。村落荡然，闻者伤心，见者惨目。小民何辜，皆予之罪也，

拟今秋停止巡幸……”云云。命清狱。

七年，春二月，云南维西县傜人腊者布、恒乍綳句结傜夷人滋事，命琅玕剿之。夏四月，谕部院大臣简放督抚者，除有兵差审案之事，不得奏请随带所属人员。五月，琅玕奏，擒获傜首腊者布，攻克康普寨，剿洗北路傜匪。六月，琅玕奏，兜剿康普叶枝夷匪，西北两路，全境疏通。秋七月，帝秋猕木兰。八月，己亥朔，日食。九月，帝还京师。冬十月，禁止番役子孙出仕应试。十二月，安徽宿州匪徒滋事，费浮等讨平之。

八年，春闰二月，内务府厨役成德犯跸，捕获伏诛。是月二十日，帝进斋戒，将入顺贞门，成德径前行刺，固伦额驸喀尔喀亲王拉旺多尔济立擒之。下廷讯，无供，但云事若成，则公等所坐之处即我坐处而已。命不必深诘，并其子禄儿、对儿磔之，迄不知何人所使也。秋七月，帝秋猕木兰。九月，予告尚书彭元瑞卒，赠协办大学士，谥文勤。元瑞天才敏瞻，与纪昀同有才人之目。所作应举文字婉丽清新，人争传诵。东河、衡家楼河溢。帝还京师。冬十月，开衡工捐例。十一月，申禁上控案件发原审官。

九年，秋七月，帝秋猕木兰。九月，帝还京师。冬十二月，大学士刘墉卒，予谥文清。墉父统勋，遇事神敏，性复刚劲，有古大臣风，高宗颇敬惮之。乾隆朝大臣，其始终未未曾一入刑部狱者，勋一人而已，卒谥文正。墉以贵公子为名翰林，书名满天下，继父为宰相，天下呼为小诸城。

十年，春正月，予告大学士王杰卒于京师，予谥文端。杰在相位，与和珅同列，遇所当执，沆不与同。后珅伏诛，其密赞之力为多云。二月，协办大学士纪昀卒，予谥文达。昀为《四库全书》馆总纂官，每进一书，仿刘向、曾巩例，作提要冠诸简首，时推为大手笔。夏四月，圈禁西洋人德天赐于熟河厄鲁特营房，因在内地刊书传教也。其代为递送书信及奉教、传教人，广东陈若望等，男妇共六十四人，均发伊犁，给厄鲁特为奴。六月，永定河溢。

闰月，蚩尤旗见紫微垣，越日，南方大雨。秋七月，帝秋猕木兰。八月，御前大臣都统公额勒登保卒，予谥忠毅。额勒登保，初隶海兰察部下，每战辄陷阵。海兰察语之曰：“子将才，宜略识古兵法。”以其不识字，取繙绎《三国演义》授之，遂为名将，尤严操守。用兵久，诸将多蓄货财，凯旋日，过卢沟桥，皆輜重累累，额勒登保独行李萧然，数奇而已。九月，帝还京师。

十一年，春正月，定免死改遣罪犯，分别年限减释例。

三月，严禁浙江、江苏等省贩米出洋。秋七月，帝秋猕木兰。九月，还京师。冬十二月，大学士朱圭卒，予谥文正。圭为帝师，于大学益利之辩，通鉴治乱之由，反复陈说不倦。尤以好士闻，通人寒士，必扬其名于朝。

十二年，夏四月，以旱，命清狱。申禁地方官擅造非刑。
五月，定各省奏咨案件达限处分。秋七月，有火星见于西方，历四月而灭。
八月，甘肃大通县番滋事，讨平之。帝秋猕木兰。九月，严禁八旗抱养民子为嗣。
帝还京师。冬十月，罢武会试内场策论，改令默写武经。十一月，天坛斋宫灾。

十三年，春三月，命减直隶军流以下罪。夏六月，江苏荷花塘运河溢。
江南七里沟运河溢。秋七月，帝秋猕木兰。
九月，试用通判王履泰进呈编辑《畿辅安澜志》，奉旨留览。帝还京师。
冬十月，癸巳朔，日食。

十四年，春正月，绞杀总管内务大臣广兴。广兴初官给事中，以参和珅著直声，洊擢今职，继以缎库官员串通总管太监孙进忠，挑斥宫中支应绸缎数目不符，革职。帝命山东、河南密查广兴前往该两省审案时劣绩，东抚吉纶覆奏：“广兴与都御史周廷栋同在东省审案，周廷栋全无主持，至民间有‘周全天下事，广聚世间财’之谣。”帝大怒，下廷讯，至是命处绞，子蕴秀等戍吉林。陕督长龄，时在东抚任内，听任藩司邱庭澂动帑办差，遗戍伊犁，庭澂发黑龙江。是案，中外因连获严谴者十余人。二月，罚贝子德麟损修河南要工，追论其父福康安生前簠簋不饬罪也。三月，西安将军公德楞泰卒，予谥壮果。德楞泰奋勇敢战，前在川征教匪时与额勒登保同心戮力，以底成功。夏六月，弃山阳知县王伸汉于市。伸汉办振浮冒，委员李毓昌将案揭之，伸汉毒毙之以灭口，至是逮京讯实正法，知府王谷处绞，总督铁保革职。秋七月，帝秋猕木兰。九月，戍浙江学政刘凤诰于黑龙江，以代办监临，有将应试生徐步鉴用联号情弊也。帝还京师。冬十月，左迁山西布政使刘清为刑部员外郎。清前在四川时，招降川东贼二万，与贼大小百馀战，斩馘万计，尤能得民心。王三槐俘至少京廷讯，供言官逼民反，帝问四川一省官皆不善耶，曰惟有刘青天一人，帝立加殊擢，累官至今职，川督勒保深嫉之，奏言清民社有馀，方面不足，遂致左迁，复官至曹州镇总兵。

十五年，春二月，命试办海运，以河工弊坏，漕运阻滞故也。
三月，命严查携带鸦片入城。夏六月，山西大旱。秋七月，永定河溢。
帝秋猕木兰。九月，还京师。冬十月，河南高堰山圩，两厅堤坝决。

十六年，夏四月，以京师及河南、山东旱，命清狱。
六月，西北有星芒，溢三四丈。八月，白虹见。

十七年，春二月，谕凡军流人犯，有在配所遣人来京呈递封章者，无论是非虚实，均一体治罪。降御史荣春一级调用，以讹言偷翦发办入奏故也。
秋七月，申谕直省督抚，严查所属私造非刑。

十八年，夏六月，申禁宗室觉罗与汉人为婚。命赐浙江生员鲍廷博举人。廷博于乾

隆间，进其藏书之《知不足斋》，至是复进所刻《知不足斋》从书第二十六集，帝嘉其好古绩学，老而不倦，故有是命。秋七月，申禁私贩鸦片烟，定官民服食罪。帝秋猕木兰。八月，定举人每届四科大挑一次，仍照例扣除三科举人。九月，帝还京师。

十九年，春正月，复开捐例。自十九年四月至明年五月乃止，谓之豫东例。闰二月，学士蔡之定请行用楮砂，不许。谕将乾隆年间增设名粮额数，酌议减汰，仍复旧例，寻部议各省统计裁兵一万四千二百四十名，马一千三百五十六匹。夏六月，庚申朔，日食。江南旱。秋七月，江南苏州、松江、太仓各府州县，地生白毛如发。帝秋猕木兰。九月，还京师。

二十年，夏四月，颁御制官箴二十六则，宣示内外。四川中瞻对番酋洛布七力作乱，讨平之。六月，乙卯朔，日食。七月，帝秋猕木兰。八月，复两江总督百龄太子少保衔，晋爵三等男。先是本年春间，湖北、江西、安徽、江苏等省，舍获匿名揭帖，上印九龙朱戳，字体诡异，词语悖逆，命各省督抚侦刺，无踪，至是百龄遣人于和州、巢县等地方，缉获严士陇、方荣升等首从百五十人，献实，抵极法，无漏网者，帝重嘉异之，著赏还官衔、世爵。九月，帝还京师。冬十月，山西、河南地震。十二月，谕飭江南湖北、湖南各督抚，严命茶清茶门教匪。有涿州石佛口王姓，其先世自前明以来，倡立白莲教，自称闻香教主，流传二百余年，改教名为清茶门，自是为督臣那彦成拿获，帝命依律惩治。其直省传教匪犯，飭各督抚迅速查拿。

二十一年，秋七月，帝秋猕木兰。八月，谕岁举秋猕，系我朝家法，必当永远遵循。嗣后每遇进哨，大小臣工概不准以雨水寒冷为词，妄生浮议。倘仍造作浮言，希图阻止，必将其人按军法治罪，立正典刑，不稍宽贷。九月，还京师。冬十一月，两江总督百龄卒，赐协办大学士，予谥文敏。百龄少负时望，当局争欲延览，而挺劲自异，不屑随人俯仰，至浮沉冷局二十馀年。嘉庆初，始扬历重镇，勲望伟然。

二十二年，春二月，始命大挑人员，分发河工差委。夏四月，甲戌朔，日食。以大旱，命清狱。五月，命新进士朝考，以诗、疏、论命题，裁去拟诏不用，著为令。六月，革大学士松筠职，因谏阻明年幸盛京也。秋七月，帝秋猕木兰。九月，还京师。绞杀宗室海康、庆遥，俱以学习邪教故。冬十月，辛未朔，日食。

二十三年，夏四月，戊辰朔，日食。京师风霾，室中燃烛。予告大学士董诰卒。诰，邦达子也，父子俱以工绘事，久直南书房，至大用。

二十四年，夏四月，革盛京将军松筠、兵部尚书和世泰、侍郎裕恩等职，因兵部遗

失行印也。秋七月，帝秋猕木兰。帝崩于避暑山庄行殿，遗诏命皇次子智亲王绵宁嗣位，更名旻宁，以明年为道光元年。帝寿六十有一，葬宝华峪，号昌陵，谥曰睿，庙号仁宗。

卷三十九、中英交涉之变态

仁宗嘉庆十三年，冬十月，以英吉利兵舰驶入广东，夺总督吴熊光职，以百龄代之。英人自康熙十九年通商中国，继于二十三年建设商馆于广州，而以粤海关检查之严密，及税额之繁重，欲更辟新商港，继于四十年，东印度会社社员甲赤普尔率商船三艘至浙江舟山、宁波等地贸易。浙海关税则较粤海为轻，洋商利之，历康、雍两朝，至乾隆二十二三年间，诸国商船聚泊定海，转运宁波者日众，几有舍粤就浙之倾向。于是高宗纳浙闽总督喀尔吉善、两广总督杨应琚之策，更定浙海科则，视粤海加重，籍以限制洋商。二十四年，黄商洪任辉赴天津，以广东贸易之困难诉于政府，语侵粤海关监督。高宗怒其妄控，下之澳门狱中，自是浙中贸易之途绝。而广州为中国唯一之互市场，各国商船率自东莞县虎门入口，聚泊省城之黄埔。然华英商人每以货财上之关系，日起纷议，英政府乃以五十七年遣使伯爵马戛尔尼及司当，东入东国，要求改良两国之交涉。因提议七条。

一、遣员驻京师，照管本国商务。

二、商船至宁波、舟山及两广、天津地方收泊交易。

三、仿俄国例，设商馆于京师，收贮货物发卖。

四、要求舟山附近小海岛一处，居留英商及收贮货物。

五、于广东省城附近拨舍地方一处，居住英商及寄寓澳门之人，准其自由出入。

六、英商于广州、澳门间，由内河运输货物，请免税或减轻税额。

七、任听英人传教至次年。

其使臣自天津赴京，疆吏例予旅车，题曰：“英国贡船”，强令立之，及抵京城，政府又强令于觐见时，行叩头礼。英使亦不欲以争执小节，妨害其推广商利之目的，悉遵例行之。觐见后，使臣以要求各款，向政府提议，高宗以为远人不识天朝礼制，妄行乞请，于其条件，悉驳斥之，而敕谕其国王，盛称天朝威德，付其使遣归。会英人与法兰西国失和，法帝拿破仑颁布大陆条例，禁欧洲各国与英通商。时葡萄牙国独梗命，法遣兵并其地，英人恐法夺澳门，以是年七月遣海将度路利率战舰十三艘进泊香山鸡头洋，旋以三艘入黄埔，并有三板船入省河，以防御法兰西，保护中、英、葡三国贸易为词，且愿与中国协剿海贼。以其意作书投粤督，遂登岸公然分兵守住澳门炮台。朝廷恐其将实行占领之策，饬熊光严辞拒绝，且封禁水路以绝其粮食。英人苦之，至是启碇，引还印度。帝怒熊光蒞弱，不即时驱逐英舰，夺其职，令效力南河，寻逮戍伊犁。

十九年，冬十二月，英吉利护商兵船违例闯入虎门，旋驶出禁地。英舰自十三年十月开出澳门后，未几仍蔑视旧制，辄以兵船出入虎门，至是督臣蒋攸銑派员诘责，始驶出洋面，于是攸銑疏定防闲策数事：严禁民人私为夷人服役、洋行不得用欧式建筑、店号不得用夷字、清查商人、内地民人不得私往夷馆，并得旨允行。

二十一年，秋七月，英吉利使臣司当冬等觐见，至宫门，称疾，不成礼而退。英人既以前此浙江之贸易不能遂其请愿，复以近年来广东关税有种种之钳束，因于是年遣正使司当冬及副使二人来中国，诣阙陈诉。乃使臣不遵成例，于粤岸收泊，径驶至天津海口登岸，谢宴时又不行三跪九叩首礼，及抵京帝命于是月七日瞻觐八日于正大光明殿赐宴颁赏再于同乐园赐食九日

陛辞并于是日赐游万寿山十一日在太和门领赏再赴礼部筵宴十三日遣行至入觐日帝传旨升殿召见忽接伴大臣和世泰奏称使臣不能速行俟至宫门请驾二次奏称正使病泄须少缓三次奏称正使病倒不能进见当谕以正使回寓赏医调治令副使进见四次奏称副使二人亦同称急病帝大怒以中国为天下共主岂有如此倨傲侮慢甘心忍受之理严旨停其筵宴赐物逐之回国并寄英主敕谕一道备责使臣之无礼（时英廷无能通解华文者反之外部七十馀年至光绪十六年薛福成使英英人始出而属其代认盖当时实未尝启视也）又通谕中外及蒙古王公等托词来使进见朝服未到便服不能瞻谒大皇帝和世泰等不将情节奏明致未改期召见不料庸臣误事至此朕实无颜下对臣工云云寻命革去和世泰理藩院尚书苏楞额工部尚书广惠总管内务府大臣穆克登额礼部尚书

编者曰英使此来挟有推广商利之奢望仅期与中国外交上人员交涉而已并无瞻对大皇帝之必要而中国朝廷必确认英吉利为海外朝贡国之一此次使节直为备进方物而来傲然自大轻视邻国误用其奴隶国人之习惯法以对付欧罗巴使臣强之行跪拜礼遂致酿成此次之失败自是中英闲之外交日形退步而感情上之损失亦愈以积加已潜伏无形之祸机于不觉矣又考顺治康熙闲德意志人汤若望比利时人南怀仁官钦天监时皆许其侍立不行拜跪礼雍正年闲教王遣使到京世宗许行西礼且与之握手乾隆五十八年英使马格里来华礼臣与议礼节彼以觐见英主之礼为言礼臣以请高宗特旨准行西礼盖中国拜跪之礼西人万不允遵故后天津条约载明遇有碍于国体之礼断不可行即指此也

卷四十一、回部张格尔之役

宣宗道光五年，冬十月，以大学士长龄署伊犁将军，筹办军务，当乾隆朝之平定天山南路也。回酋大和卓木波罗泥都之子萨木克及喀什噶尔地方人民亡入浩罕国，于葱岭以西。其汗为蒙古察合台汗之裔，既纳萨木克等，恐遭战事上之波及，因告中国，愿担负监守逃人之责。政府亦因势利用之，岁贿以银一万两，使加约东。及嘉庆末年，南路参赞大臣斌静荒淫无度，失回众心。萨木克次子张格尔者，其人有胆力，自入浩罕后以诵经、祈福、传食诸部，颇为回人所崇奉。张格尔乃因南路人心之不平，乘机投入布鲁特，假众数百，以是年八月袭喀什噶尔近边。布鲁特硕目苏兰奇入关告警，反为章京绥善所叱，遂愤走出塞，与回人合，领队大臣色普征额率兵往击，破之。张格尔仅馀三十人，舍骑徒步而走。色普征额追出塞外，不见敌踪，遂回军喀什噶尔，与斌静宴赏中秋节。所擒八十馀人，斌静悉令杀之灭口，而以苏兰奇交通逆裔，导众滋事入奏，帝心疑之，命伊犁将军庆祥往勘，具得斌静奴畜回民，渔猎回女诸罪状，逮入京治罪，以永芹代之。张格尔复集兵，屡骚扰近塞，永芹引军出击辄遁云。至九月，令队大臣巴彦巴图以兵二百出塞四百里，复无所遇，乃纵杀布鲁特游牧妇孺百馀而还。其酋汰劣克愤甚，率所部二千追袭之于山谷间，巴彦巴图全军陷没，于是四城之回人争起响应诏，以长龄代庆祥镇守伊犁，庆祥代永芹视师喀什噶尔。

六年，秋八月，张格尔陷喀什噶尔，庆祥死之。先是，张格尔率兵由开齐山路突入回城，拜其先和卓之墓。距喀什噶尔八十馀里，令协办大臣舒尔哈善等围之。张格尔突围出，帝闻，授长龄扬威将军，诏陕甘总督杨遇春、山东巡抚武隆阿为参赞，督师助勤。军未集而张格尔已乞得浩罕国安集延兵〈（安集延兵鸷悍善战，时有百回兵不如一安集延之语）〉三千，于是月攻陷喀什噶尔。庆祥迎战于浑河，败绩，自缢死焉。凌河阿穆克登先后歿于阵，于是英吉沙尔叶同羌和间三城同时陷落，群回悉凌。

七年，春三月，将军长龄、总督杨遇春克复喀什噶尔，张格尔遁。先是，长龄等于六年十月抵阿克苏，时提督达凌阿已败敌于托什罕河，张格尔复遣兵所柯尔坪，阻进兵之路。长龄督将，并分路进，悉腊其众，至是年二月，师次大阿拐，敌屯洋河已特。乘夜来犯营，击却之。越日，由中路进袭，歼万馀人，追杀二十馀里，擒三千馀人。张格尔复纠众十馀万抗拒于沙布都尔庄，诸将奋勇抄击，逼至浑水河，又破之，遂进军阿瓦已特。三路掩杀，俘斩二万有奇，复追至洋达玛河，搜杀罄尽，遂于是月移师浑河北岸。回众十馀万阻河为阵，亘二十里，穴垒轰击，鼓角震天，势张甚。是夜，大风扬沙，大雾晦，长龄欲待霁而进，遇春不可，曰：‘此天赞我也。’乃遣索伦千骑，绕趋下游，牵其势而亲督。

卷四十六、英法联军入京及和约

文宗咸丰六年，冬十月，英吉利军舰驶入广州攻城，陷之，旋引还。初，鸦片之局既终，中国政府许英人以五口通商。英人于道光二十六年来粤，请立约，总督耆英与其二年后践约，届期而徐广缙督两粤，叶名琛为巡抚。二十九年，英舰入粤河，申前约，广缙等拒不许入。时广州绅民私起团练，势张甚，广缙因密召诸乡团练十馀万，列两岸，呼声震天。英人惧，请更定广东通商专约。粤人请以严禁入城之语载入条件中，英人恐激民变，妨商务，遂签约。广缙等疏入告，朝旨大悦，封广缙子爵，名琛男爵。咸丰二年，广缙移督湖广，名琛坐迁总督，英香港总督巴冷复申前请，名琛峻拒之。六年，英政府以巴夏礼任广东领事，是年九月，有亚罗船自外海入省河，所载皆华人而诡张英旗。巡河武弁指为匪，登艇索犯，拔其旗，投甲板上，执水手十三人，械系省狱。巴夏礼大急，照会名琛，谓约载不法华人，逃至香港，或英船潜匿者，华官得移取，不得擅拘，毁旗尤非礼。且华民在英舟为佣，实无罪，责归所获十三人。名琛遣一微员，送十三人于领事馆。巴夏礼见所遣为微员，又不致词道歉，疑有意折辱之，遂不受。名琛仍置十三人于狱，而绝不为备。于是，英舰攻陷黄浦炮台。名琛诘衅由，巴夏礼请入城面议，不许，至是遂攻省城，陷之。以兵少，虽得广州，不能实行占领，不久复退，归军鉴。粤民见英军退，争起为暴动，纵火洋楼，凡美、法、英各商馆及十三家洋行，一切烧毁，英兵亦焚缘濠居民数十家以示报复。

七年，冬十二月，英法同盟军陷广州。先是，巴夏礼知法、美二国商馆被焚，喜曰：“二国必与我矣！”驰报□请□英国简伯爵额尔金，率兵轮八艘抵粤，分泊澳门、香港，遣使告俄、法、美各国合从之利，俄美不许，惟各简使求改订商约，法则以六年广西有戕杀彼国牧师事，求偿未得，遂与英联军，同贻名琛书，约期会议偿款，美领事亦以毁屋失财，移文责偿。皆置不答。将军、巡抚、司道见事急，就商战守，亦怡然若无事，众固请，则大言过十五日必无事矣。盖名琛父志诿，好扶乩，名琛为建长春仙馆，祠吕洞宾、李太白二仙，一切军机进止，咸取决焉，“过十五日必无事者”乩语也

于是同盟军复贻名琛最后书（哀的美敦书）迫令于四十八小时引去至期不得复遂以十一月袭据海珠炮台进陷广州名琛匿左都统署同盟军劫得将军巡抚都统等大索名琛得之挟以登舟事闻褫名琛职以侍郎黄宗汉代之而名琛被虏至印度加尔各答越年馀病死时人恶其辱身辱国也为之语曰不战不和不守不死不降不走

八年夏四月英法联军陷大沽命大学士桂良等赴天津议款约成英法兵舰退出天津广州既陷英法欲乘胜迫中国政府改订条约俄美亦思乘闲增改通商约章于是四国连艘北上驶向天津集白河口投书直督谭廷襄请转达首相朝命侍郎崇纶内阁学士乌尔棍泰往会廷襄议款英人谓其非相臣不足以当全权之任辞不见遂攻陷大沽炮台俄美二国居闲排解乃派大学士桂良户部尚书花沙纳赴天津会议又赏已革大学士耆英侍郎衔飭令赴津

耆英往拜英使不见惧而还津帝震怒赐自尽桂良等至津英人出所订新例五十六条要以画押允行其中最重要者一增开牛庄登州台湾潮州琼州等处又于长江一带许选择三口一洋人得带眷属在京师长行居住一议偿商亏军费各二百万两清款后交出粤城法人所定四十二条与英略同军费赔款则减英人之半约既定四国兵舰同时起碇出天津

九年夏五月英舰攻大沽炮台科尔沁王僧格林沁击走之先是八年四月联军之陷大沽炮台也帝命僧格林沁督兵驰赴天津僧格林沁目击和议之失败实由海疆重地先时无备之故愤然上疏劾督臣谭廷里议罪复大修守备至是各国舰队赴天津换约大吏遣人告以大沽口现在设防不便行走当改由北塘口进时英舰先至领兵者为额尔金之弟卜鲁士抗不遵行总督恒福再遣员往趣令改道英舰遽驶入大沽炮裂截港之铁练有小轮船十三艘暨红旗挑战逼近炮台开炮轰击步队蚁附登岸僧格林沁遂开炮还击沈其数舰杀登岸兵数百领队官伤股而殒余一艘驶出拦江沙外美舰后至使臣华若翰遵约改道行走朝廷特优答之

十年秋七月英法兵陷天津英兵自九年五月败退沿途测量旅顺威海等各要口而去至香港益募闽粤亡命操练不辍华洋商人知其必谋报复也恐兴师妨互市议输银二万两以偿英饷阻其再举英法使臣乃照会通商大臣何桂清言若事事遵八年原约当即罢兵桂清以闻帝谕之曰卜鲁士首先背约辄带兵船毁我海口防具前此损兵折将实由自取所有八年议和条款概作罢论如彼自知悔悟可于前议条约中择道光年曾有之事无碍大体者通融办理仍在上海定义不得率行北来再有兵船驶入拦江沙者必痛加攻剿毋贻后悔盖自僧格林沁前此大沽之捷朝野动色相告谓自此外人或就我范围可修正旧约也而不知英法已潜集船百艘将谋大举入犯僧格林沁经营防务即北塘一口已用帑百餘万两而朝旨命撤北塘之备退保大沽北塘绅士御史陈鸿翊密疏言非计不听编修湘人郭嵩焘时在幕府亦力争之僧格林沁狃于前胜亦不听嵩焘遂辞去至六月英将额尔金法将噶罗率舰队至合兵万有八千窥北塘弛防遂驶进内港僧格林沁麾军驰往扼之值潮退英法兵舰不能动恐为所袭诡悬白旗示欲和僧格林沁信之按兵不敢击无何潮长舰突出长驱抵新河以七百人登陆僧格林沁瞰其寡出劲骑驰之七百人伪退乘势蹴之七百人忽排列为一字阵人持火枪俟逼近骤发无不中者遂纷纷由马上颠陨三十精骑得脱者七人而已于是英法兵舰进攻大沽时帝倚重僧格林沁恐其有失特旨令退守又命大学士瑞麟统京旗九千防通州是月五日大沽遂陷提督乐善死之僧格林沁退次通州张家湾越七日英法兵进据天津八月英法兵薄张家湾帝出奔热河英兵攻海淀克之纵火燔圆明园英法兵既据天津帝命侍郎文俊前粤海关监督恒祺赴津议约为英法所拒改令桂良往得英参赞巴夏礼照会要以增军费及开天津为商埠并各国酌带数十人入京换约桂良据以入告严旨拒绝英法遂大扰河西务是月朔进薄张家湾胜保红顶黄褂督战丛枪注射伤颊堕马师奔僧瑞二军亦退至京城外郑王端华尚书肃顺军机大臣穆荫匡源杜翰等拥帝奔热河恭王奕訢留守仍督僧端二军守海淀帝之仓猝率后嫔出京也道路初无供帐途出密云食豆乳麦粥而已先是英法军至通州命怡王载垣往议款桂良穆荫皆在巴夏礼带十余人入城载垣等宴之巴夏礼言今日之约须面见皇帝载垣答以候旨巴夏礼就榻佯睡不复语载垣遂暂退会有驰告额尔金将袭城者载垣密使僧格林沁设法擒巴夏礼解京拘于刑部狱及帝出走奕訢桂

良驻城外惟大学士周祖培尚书陈孚恩等会议城守城门昼闭英人声言攻城且索巴夏礼甚急胜保不可或请杀之众不敢决适有诏飞召南军曾国藩等入援派奕訢为全权大臣而英人照会至限三日内交还巴夏礼令其退至天津再议不许又令退至通州亦不许反麾兵攻海淀禁兵不战自溃爰释巴夏礼巴夏礼出欲泄忿纵火燔圆明园管园大臣都统文丰及主事惠丰投福海死九月英法和议成巴夏礼要奕訢至军订约限以三日开安定门周祖培等开城延入巴夏礼带百余人入城法使亦入俄因释放前此与巴夏礼同执之十余人已监毙八九英人愤甚再扰海淀火三日夜不绝复声言攻禁城奕訢乃再以和议请法使居闲排解先索恤款五十万两予之于是巴夏礼与额尔金各陈兵仗至礼部订约六十五条于八年原定外续增九条法亦续增十条更辟天津为商埠许两国派遣公使领事驻中国偿英国银一千二百万两法国银六百万两换约后廷臣合辞请帝回京不许明年七月崩于行在

卷四十七、俄订爱琿天津北京诸条约

文宗咸丰八年，夏四月，黑龙江将军宗室奕山与俄使木哩斐岳福订约于瑗琿城，割黑龙江北岸与俄。自雍正五年与俄订约，俄人陆路通商，惟恰克图一处历朝奉行。乾隆二十七年，设库伦办事大臣，总理边务。自是，两国商民互市不绝。至道光二十八年，有俄国商船驶抵上海，图就地贸易，两江总督李星沅引例却之。英领事阿利国，亦劝以循照定章，始回帆。三十年，其萨纳特衙门来咨，请于喀什噶尔、伊犁、塔尔巴哈台等处通商，朝旨允其于伊犁、塔尔巴哈台二处贸易，至喀什噶尔，由理藩院咨覆，告以种种窒碍，委无利益情形遂成约而退。咸丰三年，其海军少将普提雅庭来文，称由海岛购货折回，欲进上海休息，并请进口贸易。帝不许。后俄人以所属西伯利亚，东向无通航海口，深为不便，木哩斐岳福建议于俄皇尼古来斯行文中国，谓自黑龙江、格尔必齐河上流以达于海，未设立界标，即属未定之地，请即派员商议，欲以尝试中国也。及政府派人往，而俄使数期不至，实则道光末年，值中国国家多故时，俄人已潜于黑龙江北岸，屯兵占守，攘之为殖民地久矣。四年，俄忽以舰队顺黑龙江而下，通过爱琿。中国官止之，不听。五年，木哩斐岳福始与奕山会议界务。俄使发议，欲划黑龙江及乌苏里河为两国国境，以江南地归中国，而自有其北岸。奕山援《尼布楚条约》折之，是以议不谐。六年，普提雅庭师兵舰来天津，强迫政府定界，政府婉却之，至是俄移住其人民于乌苏里河口。而木哩斐岳福适来，奕山承政府之命，与订约于爱琿城，计三条，是为《爱琿条约》：

黑龙江、松花江左岸，由额尔古纳河至松花江口，作为俄国属地。右岸顺江流至乌苏里河，作为中国属地。由乌苏里河往彼至所有之地，此地如同接连两国交界明定之地方，作为两国共管之地。由黑龙江、松花江、乌苏里河，此后只许中俄两国行船，各外国船只，不许由此江河行走。黑龙江左岸由精奇里以南，至豁尔木勒津屯，原住之满洲人等，照旧准其各在所住屯中，永远居住，仍著满洲国大臣官员管理，与俄国人等和好，不得侵犯。

两国所属之人互相取和，乌苏里、黑龙江、松花江居住两国所属之人，令其一同交易，官员等在两岸彼此照看两国贸易之人。

中俄会同议定之条，永远遵行勿替。两国画押，互交照，依此文缮写，晓谕两国交界上人等。

自是，黑龙江北岸地全入于俄，而康熙中旧界自格尔必齐河循石、大兴以至于海者为之一大变，而雍正时所定乌特河为两国中立地者，更无论已。即旗屯一节，中国亦仅有管理之虚名，后庚子之役，原住旗人尽为俄人驱逼入江。五月，大学士桂良、尚书花沙纳等与俄全权大臣普提雅庭另订《天津专约》。时英法和议成，俄人又援利益均霑之例，于是月另订《天津专约》十二条，录其要者于下：

除两国旱路于从前所定边界通商外，今议准由海路之上海、宁波、福州、厦门、广州、台湾、琼州等七处海口通商。若别国再在沿海增添口岸，准俄国一律照办。

俄国在中国通商海口设立领事官，得派兵船在彼停泊，以资护持。

自是俄人在中国通商，海陆皆获大利，在欧美各国之上。

十年，冬十二月，恭王奕訢与俄使伊格那替业幅再订《北京条约》，割乌苏里、松阿察二河迤东地，与俄英法同盟军之陷北京也，俄使调停其闲。和议既成，俄乃挟此以索报酬于中国，于是月再订《北京条约》，续增十五条，是为《北京条约》，录其至重大者于下：

自乌苏里河口而南，上至兴凯湖。两国以乌苏里及松阿察二河作为交界，其二河东之地属俄国，二河西属中国。自松阿察河之源，两国交界逾兴凯湖，直至白棱河。自白棱河口、顺山岭至瑚布图河口，再由瑚布图河口顺珲春河及海中间之岭，至图们江口，其东皆属俄国，其西皆属中国。两国交界于图们江之会处，及该江口相距不过二十里。

西疆尚在未定之交界。此后应顺山岭大河之流及中国常驻卡伦等处，及一十七百二十八年，即雍正六年所立沙滨达巴哈之界碑末处起，往西直至齐桑淖尔湖，自此往西南顺天山之特穆图尔淖尔，南至浩罕边界为界。

合观《爱珲》《北京》两约，举黑龙江以北，吉林以东，悉割让于俄。其失地东西广二十馀经度，南北长十馀经度。说者谓彼时中国不谙舆地之学，不知实在之界究在何处，致使满洲旧壤骤失数千里焉。

卷四十九、湘军水师之编制

文宗咸丰三年，秋七月，帮办江南军务湖北按察使江忠源奏：“请饬两湖、四川分造战船，以清江面。”诏行之。先是二年冬，湖北巡抚常大淳疏言：“洪秀全水陆攻武昌，船炮充斥。请调江南军中之广西炮船、江南水师之广艇炮船及中小号炮船，分布长江上下游，以遏敌势，断粮运。”诏督师徐广缙等饬行。时武务废弛，徒存水师名，无船也。后向荣继起督师，遣调湖南炮船，以民船载炮而已。诏征登州水师船，亦募商舟。是年春间，九江陷，荣又奏调广州外海快蟹、大扒百馀，取海道至江南。而督臣叶名琛覆称所调战船颇笨重，恐难驶入长江。后又调上海之柁罟战船、温州之头莽等船，亦仅由上海道吴健彰，雇领夹板船三只，由海入江。至五月，洪军北渡淮河，南围南昌，御史黄经始奏：“请饬吴、楚、蜀三省，各制炮船，习水师，顺流攻击。”乃指名及湖南。诏饬抚臣骆秉章，秉章以力不及，置之。忠源初援湖北，与曾国藩论江皖大局，议造战船数百，先清江面，亦以事艰巨难行，至是编修郭嵩焘从忠源守南昌，侦敌皆船居，乃极言：“东南皆水乡，敌据有江路。而我以陆师击之，势常不及。必与敌争长江之险，而后可以言战。”因为忠源草疏，“请饬湖北、湖南、四川造战船各二十艘，自广东购巨炮十尊配之。”得旨允行。九月，诏帮办湖南团练侍郎曾国藩，酌派兵勇船炮，赴援湖北。时国藩已先自长沙移驻衡州，治水军，访船制。初无知者，依古法作筏载炮，将以截流，又欲为艨艟大舰，皆不能旋运，而羽檄征军，日数至，人颇以逗遛为疑。国藩叹曰：“今敌纵横江湖，非舟楫无与争利害。且成师以出，当为东征不归之计。九江以上，千里如洗，奈何以仓猝召募之众，执盍脆之器，徒步三千里，以当虎狼百万之强敌乎？”有水师守备成名标者，顾能言广东快蟹三板船法式，国藩亦自以意，用商船改造为长唇宽舷，试发炮，果不震，惟苦经费无所出，乃奏留粤省协饷银八万，兴水师四千，船二百，其大自五百石及千馀石，炮自二百斤至三千斤。又推五日竞渡船，意为短桡长桨如蜃足以人力胜风水奏征右江道张敬修率战船不果

来而广西同知褚汝航奉檄代敬修至上长龙船制国藩乃以名标董衡州船役而于湘潭设分厂使汝航董之先成长龙五十继成快蟹四十三板百五十于是闽越船制略备然亦非有法直以意为之屡改乃成招募壮丁习水战以儒生农氓或陆营官弁为营哨官其营制每一营凡快蟹长龙船各一三板船八一快蟹桨二十八人橹八人舵长一人舵一人头篙一人炮手六人一长龙桨十六人橹四人舵头篙各一人炮手二人一三板桨十人舵头篙各一人炮手二人计三百八十八人而成营其军器虽亦有刀盾枪矛无所用置炮于船之首尾旋而发之炮一发船一顿则其进愈疾或置腰炮美观瞻临敌亦无所用之其作营法相距宜疏小船依洲大舟横流设遇暴风不致相撞接流争先全恃三板快蟹长龙备指挥而已败即弃之乘三板以归三板无篷板覆以夹帐军士私造长龙编为公船以餐宿于其中

四年春三月曾国藩发衡州集军湘潭是年二月湖南师船成凡大小战舰二百四十艘重炮船百三十艘重民船百水军五千分十营由衡州募者六营以成名标诸殿元杨岳斌（原名载福后避穆宗名上一字改）彭玉麟邹汉章龙猷琛统之由湘潭募者四营以褚汝航夏銮

胡嘉垣胡作霖统之而汝航为总统又益以陆师十三营以塔齐布周凤山储玖躬林源恩邹世琦邹寿璋杨名声曾国葆统之而塔齐布为先锋水陆万七千人夹湘而下一时军容称极盛时总督吴文镕以促战先出败死湖北水师尽散敌由洞庭登岸袭宁乡遇水师下遽退寻复上岳州防军溃赖炮船以免会大风坏船飘伤大半陆军亦败还长沙整军敌遂乘胜上屯靖港及湘潭国藩全军往攻未至湘潭十里塔齐布湘潭战胜之报至于是水陆循城进攻八日之闲十战皆捷毁敌舟近千斩馘近万敌弃城走湘潭既复军气大扬未几山东登州总兵陈辉龙自广州广东游击沙镇邦自广西道员李孟群自桂林各将水军来会师水军益盛已而发长沙渡湖遇敌湖中彭玉麟杨岳斌两破敌于南津二人自是以勇略名称彭杨辉龙后至闻彭杨战胜意轻敌自将攻城陵矶湘军颇疑南风下水难退辉龙曰吾习水战三十年诸君无以为忧翌旦声炮行广东军旌旗鲜明刀矛如霜雪洋装铜炮震山逋辉龙乘自作之拖罟大船进至中流舟胶敌伏舟齐出诸小船往救水急风利返吹俱下敌争前夺船辉陷敌军覆炮船尽丧拖罟大舰遂为敌军战胜品敌师乘之还城陵矶褚汝航夏銓沙镇邦因赴援败同蹈水死是役也战死者数百人失船三十馀艘赖彭杨力守要害敌不得上国藩乃收拾馀船以俞晟代汝航复遇唐际盛造舟资之会塔齐布之陆军所至有功进薄城陵矶毁敌垒十三斩馘二十水军乃乘胜入长江毁东西岸敌垒九炮台三搜螺山倒口六豁口入黄益湖收嘉鱼复蒲圻进克武汉自是敌闻水军至辄震怖无策弃所守去故湘军顺流下千里无留行下江敌军以水军不可与争锋悉众屯田家镇彭杨将水师合陆军进击大破之岳斌直进至武穴乃回船掷火烧而上玉麟烧而下忽东风起岳斌乘风玉麟乘流天明合军俱还敌舟烬阵陆上者已夜走田镇既破湘军水师名天下朝廷采其战法手诏宣示江南北诸水军江南北水军师艇船不谙战续征红单拖罟船皆待风乃行所至淹留而江西亦造战船仿湖南船制以无将领辄失败湖南在籍官丁善庆陈本钦唐际盛李槃等始捐貲设船局而黄冕专制炮以应征军时言船炮者皆莫能及湖南其后水军益扩张岳斌所统十营玉麟所统八营合大小战船五百炮二千国藩遭父丧奏请以岳斌为总统玉麟为协理而战益利所至克捷虽或有小挫终获胜敌迨九洑洲一破长江肃清金陵大功告成诏论国藩功以创立舟师为首于是国藩奏请以所募水勇改为经制水兵时大江水师船至一千馀炮位及三千计提督一员总兵五员营官副参游二十四哨官都守千把外委七百七十四兵数万二千自荆岳至崇明五千馀里立六标分汛计船七百七十四营二十四副将营战船四十三参将营三十三游击营二十三自提督至外委各给坐船长龙设大炮六三板大小炮各二设火药局于安徽湖北二省城设子弹局于湖南省城设船局于汉阳吴城草鞋夹因奏事宜三十营制二十四同治五年六月军机大臣曾奏依行编章程六卷入方略垂示后世颁之天下水师既立以黄翼升为提督诏玉麟每岁一巡长江

编者曰太平天国既亡诏论曾氏功以创立舟师为首而舟师中人立功以彭与杨为最是两人之生平宗旨与曾氏兄弟同然观彭氏一生不乐秉节钺任疆寄若有所憾焉者则何哉

卷五十四、天津教案

穆宗同治九年，夏五月，天津人民殴毙法国领事，焚毁教堂。命曾国藩驰往查办。基督教自唐建中二年始入中国，所谓大秦景者也。及元至元二十七年，罗马教徒若望·高未诺来使于元，得元廷许可，布教北京，建礼堂。迨明正德十二年，日耳曼人路得创立新教，曰‘耶稣教’，奉罗马教者，多幡然从之。其流行中上之教会，势亦因之不振。时有西班牙人罗耀拉，目睹旧都中衰，结合同志，设耶稣伊德社，欲转入东洋，力为传布，以再兴旧教于中国。于是义大利人利玛窦泛海东来，以万历八年至广东，二十八年入北京，倡天主教。朝官徐光启、李之藻辈习其说，又从之译受《乾坤体义》、《几何原本》、《测量法义》诸书行世，以是见重于神宗，令得于京师内外，崇建礼堂。利玛窦卒，德意志人汤若望继至，承其业，明廷使当司天之任。明鼎革，若望归命新朝，世祖优礼之，使掌钦天监，尊为‘通玄教师’。自治曆之外，凡外交通译及测量境土事，悉以任之，并许其设堂京师，自为传教。故至康熙初年，天主教盛极一时，全国信徒不下数十万。而此辈久居中土，绘图测境，消息灵通，遂萌觊觎之渐。及乾嘉两朝，屡次下诏严禁，其势渐微。自道光二十三年，白门和议成，传教载入条约。二十五年，复徇法人之请，通商各口，皆设天主教堂。入内地传教之人，地方官皆优待保护。自是，法人以天主护法自居。在本国则逐之主政教分立之说，在中国则袒之，以为侦探我政俗，攫取我利益之机关，而中国教堂之祸，从此始矣。咸丰八年，广西西林知县张鸣凤处治法国传教之马神甫，领事诉于北京，褫鸣凤职。同治元年，湖南、江西拆毁教堂，各知县革职，并勒限赔修及严惩倡首之人。同时，贵州杀害教士文乃尔等，巡抚田兴恕至于遣戍。六年及八年，四川殴毙教士冯弼乐、李国两案，皆惩犯赏银，而教民杀死平民，及奸掳焚杀首恶王学鼎、张添兴等虽已议罪，终不到案。其司铎覃辅臣纠众杀毙团民赵永林二百余名，地方官不能查办，民人愈加忿激，仇教之事，遂纷然以起。是年四月，天津有匪人迷拐人口，并传言有挖眼剖心等事。据获犯武兰珍供，为天主教民王三所使。时崇厚在津办理通商，与法领事丰大业等商定，令道、府、县带同武兰珍赴堂，指勘所历地方房屋，与原供不符，亦即带犯归。旋闻有民人在教堂口角争，殴正在派并前往弹压。忽丰大业汹汹来署中，向崇厚施放手枪，并向知县刘杰放枪。击死知县仆从一名。于是民人奋起，群殴丰大业致死，并焚毁教堂，拆毁仁慈堂等处，杀伤教民及贞女数十人，又误杀俄国商人三名，误毁英美两国讲堂各一所。天津大扰，直隶总督曾国藩时在病假，朝命驰赴天津查办。六月，曾国藩奏筹办天津教案情形，请将误毙俄商及误毁英美两国讲堂，先行议结，从之。时法人籍端要挟，联英美以迫政府，其欲甚奢。国藩知法人难以理喻，倘四国协以谋我，更难于对付，因请将俄商及英美讲堂各项交涉，先行设法议结，不与法人牵混。诏令会同崇厚妥为商办，以免轆轳。命崇厚出使法国，以成林办理通商事务。时英法水师提督已在大沽请示国主，北京政府闻之，深恐决裂，特派遣崇厚前往法都为道歉使。曾国藩奏，查明津案大概情形，所有挖眼剖心之说，多属虚诬，请旨通飭各省以释群疑，允之。国藩抵津后，研讯教民迷拐人口一节，王三虽经供称授药与武兰珍，然尚时供时翻，亦无教堂主使确据。至仁慈堂，查出男女一百五十馀口，

逐一讯供，均称其家送至堂中豢养，并无被拐情形，至挖眼剖心，当国藩初入津郡，士民拦舆遽禀，不下数百余起，及亲加推问地，无一能指实者。询之天津城内外，亦无遗失幼孩控告之家，而民间纷纷言有眼盈坛，由陈大帅自带进京。大帅者，俗间称陈国瑞之名也，时以记名提督，奉召入京，统领神机营，又崇厚专弁到京，亦向总理衙门称连是说，并有人奏津民焚毁教堂，由堂内起有人眼人心等物，呈交崇厚收执，且闻现已消灭等语。而国藩则谓杀孩坏尸，采生配药，野番凶恶之族尚不忍为，而谓欧西文明各国肯出此残忍之行，以理决之，必无是事。况眼珠若至盈罐，则堂内必有千百无目之人，何无一人见在？即云残害，其尸具又将何归？即仁慈堂之设，其始意亦与中国育婴堂、养济院略同，专以收恤穷民为主，每年所费银两甚巨。彼以仁慈为名，而反受残酷之谤，宜其忿忿不平也。至人民之所以猜疑生愤，其原因有五：一堂门终年扃闭，过于秘密，外人莫能窥测底蕴。又堂中皆有地窖，津民未经目睹，但闻地窖深邃，各幼孩幽闭其中，往往被留不出。前任江西进贤知县魏席珍之女贺魏氏带女入堂治病，久而不返，其父至婉劝回家，坚执不允，因谓其有药迷丧本心。一仁慈堂收留无依子女及疾病将死之人，又彼教有施洗之说。施洗者，其人已死，教主以水沃其额而封其目，谓可升天堂。津民见其收及将死之人，闻其亲洗新尸之眼，已堪诧异。又由他处车船致送来津者，动辄数十百人，但见其入而不见其出，不明何故。一堂中院落即多，或念经，或读书，或佣工，或医病，分类而处，虽母子之间往往终年而不相见。一是年四五月间，堂中死人过多，其掩埋又多以夜，或有两尸三尸共一棺者。一日河东丛塚，有为犬所发者，一棺二尸，天津镇中营游击左宝贵等曾经目睹死人皆由内先腐，此独由外先腐，胸腹糜烂，肠肚外露，由是浮言大起，加以平日熟闻各处檄文揭帖之言，已信为实，而又积此种种疑窦，群怀悲恨。迨至拐匪牵涉教堂，府县赴堂查讯，领事对官放枪，众怒乃不可遏矣。国藩既查明以上根源，遂奏请明降谕旨，通飭各省，俾知从前檄文揭帖，所称教民挖眼剖心、戕害生民之说，均系谣传，布告天下，咸使闻知，一以雪教堂之冤，一以解士民之惑，并请将津人致疑之端，宣示一二，其行凶首要各犯，及乘机抢夺之徒，已飭属捕拏严惩，并调保定铭军三千人，驻扎静海，以资弹压。另片奏请将道府县三员革职治罪，均奉旨照准，并飭令神机营统领记名臬司陈中瑞，赴津听候查问。命毛昶熙前往天津，会同曾国藩查办事件，丁日昌帮同商办，李鸿章酌带所部，驰赴近畿一带驻扎。初，国藩闻始教案，立意兴崇厚分谤，不奖士民义愤。盖以粤捻初平，宜坚持和局，不宜与邻邦构衅。又虑四国合纵败约，变不测，京师震惊，于是力主和平办理，为教堂昭雪挖眼剖心之诬，以平其心。其焚毁各国教堂公馆，复提款兴修，俄国误伤三人，均给与抚恤。而法使罗淑亚肆意要挟，除惩治若干人外，必令府县官及陈国瑞三人议抵，国藩力拒之，疏言府县官实无大过，送交刑部已属法重情轻。至陈国瑞不在事中，仍复曲徇所请，飭令来京备质。彼若立意决裂，虽百请百从，难保无事。且外国论强弱，不论是非，若中国有备，和议当易定。已令记名臬司丁日昌统带张秋铭军九千人，拔赴沧州，以资防御。并函商督办陕西援师。湖广总督李鸿章酌带郭松林等，克日驰赴近畿一带驻扎，并疏言善全和局，以为保民之道；备御不虞，以为立国之本。诏嘉纳之，而津民不知此义，遂以怨崇厚者怨国藩，内之又为政府顽固党所掎击，呼为卖国贼，白简纷

纭，举国欲杀。旅京湖广会馆，且将国藩匾额，拔除摧烧之。于是，崇厚惧事决裂，奏国藩病势甚重，请罢免，而以鸿章代之。诏促鸿章迅赴京畿，并寄谕沿江沿海各督抚，严行戒备。八月，调曾国藩为两江总督，李鸿章为直隶总督。时曾国藩办理津案，已有眉目，拟于是月二十三日先行奏结。而鸿章自保定行次上书，言：“天津滋事各犯，正法八人，与议罪二十余人，办法不为不重。若杀戮太过，实为外人永远之患，尤非各国厚待中国百姓之心”云云。总理衙门大韪之，于是奏请飭鸿章迅赴津任。适国藩续奏至，中有：“此案棘手甚多，碍敷据守常例，不得不变通办理。见讯明各犯，拟办正犯者十五人，拟办军徒者二十一人。将来第二批奏结，或再办首、从犯各数名，或与法人订定抵偿实数，由总理衙门核定行知……”等语。疏入，大忤政府意，有旨责其拘泥，谓：“此案衡情定罪，惟当以供证为凭，期无枉纵岂能豫为悬拟，强人就案？”随有旨，飭鸿章迅速赴津，会同国藩、崇厚督飭办理。九月，以天津疏防民教起衅，革职知府张光藻、知县刘杰，发往黑龙江效力赎罪。正法滋事人犯二十人，军徒二十五人。光藻等逮京后，刑部拟以遣戍军台奏，上命从重改发黑龙江。陈国瑞讯与津案无干，著免议，其滋事人民冯瘸子等十五名，及续获之刘二等五名，即行正法。小锥王五等二十一名，及续获之邓老等四名，分别发配安置。曾国藩办案归结后，即著来京陛见；李鸿章著仍驻天津，筹办弹压、抚绥各事宜；崇厚著即克期放洋，前往法国，表明惋惜。

卷五十八、通使及选派留学

德宗光绪元年，秋八月，派侍郎郭嵩焘、道员许铃身出使英国，旋改派铃身出使日本国，以五品京堂刘锡鸿代为驻英副使。铃身因事留直隶，又以侍读何如璋代使日本。初，同治六年十月，派道员志刚、郎中孙家谷偕美使蒲安臣出使有约各国，办理中外交涉。九年五月，天津教案起，命侍郎崇厚出使法国。皆临时派遣，非常驻之员。是年五月间，总理各国事务衙门奏请预储熟悉洋务人才，得旨允行。至是，复有是命，令诸使臣分驻各国，统率参赞、领事等官，办理一切交涉事件。冬十一月，以三品京堂陈兰斌、同知容闲出使美、日、秘三国。先是，同治十一年正月，江督曾国藩、直督李鸿章奏请挑选幼童赴美国肄业，兰斌与闲同派管理学生，常川驻美，经理一切。至是，奉命驻扎美、日、秘三国为公使。兰斌等抵美后，查美国各邦华人共十有四万馀，计金山一带已有六万，奏设领事于金山埠，以道员陈树棠充总领事，驻扎其地，金山美绅传列秘充领事。至日，查有古巴属鸟，华民佣工其处者有六万馀人，因设古巴总领事一，以主事刘亮沅充之。马丹萨领事一，以同知陈善蓄充之。寻又设秘鲁嘉里约领事一，暂驻利马，并居驻秘参赞署中，后专驻海口。

二年，秋八月，总理各国事务衙门奏定出使经费，允之。时云南匪徒戕杀马嘉理一案议结，李鸿章与英使议定条款，内有简派使臣齎奉玺书赴英表明婉惜一条，故前派使臣郭嵩焘等将出洋，前往英国。至是，总署拟定出使经费呈奏，得旨允行。冬十二月，李鸿章、沈葆楨奏请派道员李凤苞等率领福建船厂学生三十名，分赴英、法两国，学习制造驾驶，从之。先是，同治六年六月，闽督左宗棠奏设船厂于福建，保荐保楨总理船政。前后五年，造成轮船三号，兵轮二十艘，分布各海口。初立拉铁、打铁、铸铁、轮机、水缸诸厂开学堂二所，选幼童分习驾驶、制造诸艺。十二年十一月，奏请于船厂前后学堂选派学生，分赴英、法，学习制造、驾驶。飭下鸿章等会商，旋因台湾有事辍议。及光绪元年四月，闽厂监督日意格回国，保楨遣学生数名随往法国游学。是年三月，海防洋教习都司李励协解职回德，鸿章奏派武弁、卞长胜等七人同往德国武学院，讲习水陆军械技艺。至是，又遣凤苞率同制造学生十四名，制造艺徒四名，赴法国官学官厂，学习制造。又驾驶学生十二名，赴英国格林回次士穆德学堂并铁甲大兵船，学习驾驶兵船。

三年，春三月，改派驻英副使刘锡鸿出使德国，裁驻英副使。夏五月，驻扎日本使臣何如璋，奏请于日本口岸设立理事，从之。横滨筑地两口，设正理事一，以同知范锡朋派充。神户、大阪两口，设正理事一，以同知刘专铿派充。长崎一口，设正理事一，以中书余璿派充。秋九月，驻英使郭嵩焘奏请于英属新嘉坡设立领事，从之。嵩焘奏称，英国之新嘉坡岛为万国通衢、五方杂处、华商辐辏，往来日臻繁盛，应请设立领事官，以道员胡璇泽充当，得旨允行。

四年，春正月，命驻英使臣郭嵩焘兼充法国公使。

秋七月，命一等毅勇侯补京堂曾纪泽出使英国、法国，道员李凤苞出使德国。

五年，夏五月，命侍郎崇厚出使俄国，旋授全权大臣，许其便宜行事。因与俄国政府议收还伊犁事也。

六年，春正月，命大理寺少卿曾纪泽出使俄国，将崇厚所收还伊犁条约再行商改。

七年，春三月，陈兰斌等奏设檀香山领事，从之。太平洋中有国，曰‘山域治埃兰’译称檀香山。共辖八岛，为华民出洋要冲，又为美国金山后路，且系秘鲁来华中站，至是，议设领事于其地，以商董同知衔陈国芬改为领事官。秋七月，命三品京堂郑藻如出使美、日、秘三国，召陈兰斌回京，在总理各国事务衙门行走，始裁副使。藻如抵美后，奏设纽约埠领事，以通判欧阳明充领事官。

十年，夏四月，侍讲许景澄出使法、德、义、荷、奥等国，未到任以前，以李凤苞兼署。

十一年，夏五月，召曾纪泽回京，以江西布政使刘瑞芬出使英国、俄国。时英灭缅甸，分界事关系綦重，召纪泽回京面询，以瑞芬代之。命侍郎张荫桓出使美、日、秘三国。

十三年，夏五月，命内阁学士洪钧出使俄、德、奥、和等国，大理寺卿刘瑞芬出使英、法、义、比等国，道员李兴锐出使日本国。兴锐因病未行，以庶常黎庶昌代之。冬十二月，两总督张之洞奏设小吕宋领事，不允。小吕宋埔为日斯巴尼亚国属地，洞屡疏称小吕宋计有华民五万余人，分诉日人虐害情形，恳请派官保护。综核情形，非设总领事不可。经电商使臣张荫桓拟派总兵衔两江先用副将王荣和为驻扎小吕宋总领事，总署难之，不允行。

十五年，春二月，命江苏按察使陈钦铭出使英、法、义、比四国，寻钦铭以病免，以大理寺卿薛福成代之。三月，命侍讲崔国因出使美、日、秘三国。

十六年，秋七月，命侍读许景澄出使俄、德、奥、荷四国，道员李经方出使日本国。

十七年，春正月，驻英使臣薛福成奏设南洋各岛领事，从之。上年七月，海军提督丁汝昌巡历南洋群岛，其未设领事各地，华民约三十万，备受土人虐待，因而环诉于汝昌，请求奏设领事。汝昌归言于总署，咨令福成酌夺办理。至是，福成请于香港设一正领事，以新嘉坡领事知府左秉隆派充。新嘉坡原设领事改为新嘉坡兼辖海门等处总领事，以驻英二等参赞道员黄遵宪调充驻扎新嘉坡，兼辖麻六甲[1]、丹徒斯群岛、槟榔屿、威利斯雷省，暨其属部科科斯群岛。（以上皆英属土，英人定其

总名曰“海门”，共计华民十七万四千三百二十七万）及白蜡（即卑力国计华民六万馀）石兰莪（即石郎阿国计华民二万八千）松盖芙蓉（计华民一万）柔佛（计华民十万）以上皆小邦归英保护者英人联合各地定其名曰海门属都

十八年夏六月命编修汪凤藻出使日本 冬十二月命太常寺少卿杨儒出使美日秘三国

十九年冬十一月命道员龚照瑗出使英法美比四国

二十年冬十月命湖北布政使王之春如俄唁俄皇亚力山德之丧并贺新皇尼可来第二即位

二十一年春正月命大学士直隶总督一等肃毅伯李鸿章如日本议和时中日战事方剧而中国海陆军队屡败于日本因假鸿章以全权往日本广岛（时日皇移驻广岛策应海陆各军）讲款以美员福世德从 冬十二月以明年四月俄皇加冕派李鸿章为正使往贺先是以王之春尝充唁使故贺使即便派之驻京俄使喀希尼忽抗言曰皇帝加冕俄国最重之礼王之春人微言轻不足当此责可胜任者独李中堂耳乃改派鸿章为头等公使前往俄国致贺实则喀希尼欲诱致鸿章往俄办订中俄密约也

二十二年冬十月命四品京堂罗丰禄出使英国道员黄遵宪出使德国四品京堂伍廷芳出使美国

二十三年春二月命侍郎张荫桓赴英国贺女皇维多利亚即位六十年庆典
三月驻京俄使喀希尼微服潜赴英密邀荫桓游俄待以殊礼以笼致之使不反对密约也
命侍郎吕海寰出使德国荷国以黄遵宪奉命后缘事未行也

二十四年夏四月诏飭总理各国事务衙门酌派同文馆学生并咨行直隶两江两广湖广闽浙各督抚遴选学生往日本留学从御史杨深秀请也是年闰三月闲日本使臣矢野文雄有函告总署据称日本政府知中国需才孔亟倘选派学生出洋习业日本愿供经费并亲至总署面称中国如派学生往日本肄业人数以二百名为限至是深秀奏及之乃有是命 秋八月命四品京堂李盛铎出使日本国是年三月命黄遵宪使日未行至是政变遵宪称疾请开去差使允之以盛铎往 冬十月命驻俄使臣侍郎杨儒前往荷兰国海牙城会议日来佛条约即红十字会时各国在此议立保和公会会期

二十六年冬十二月命左都御史张百熙赴英国唁英君之丧并贺新君即位

二十七年夏四月命醇亲王载灃为头等专使赴德国上年五月北京拳匪乱作戕害德使克林德至是命载灃往德谢罪代表帝惭愧之意并达谢忱闻德皇将强之行跪拜礼留滞边境不进经政府按国际公法力争德皇始允予通融 五月命侍郎那桐为专使赴日本以拳乱时日本使馆书记生杉山彬在北京被戕至是遣那桐前往日本代表帝惋惜之意兼达谢忱

命五品京堂蔡钧出使日本 命驻扎各国公使访察游学咨送回华听候考试录用 六月命知府许台身出使韩国时朝鲜已称帝改国号曰韩建元光武遣使来聘用敌国礼廷议以朝鲜藩属今夜郎自大不如绝之帝曰我不能有而附于日日既左右之立国建元称帝号矣固俨然邻国也此与东西诸国宁有少殊乎我不能拒绝东西诸国之使奈何独拒韩使遂令其覲见而报以国书如常礼至是遣台身出使于韩驻扎汉城台身旋奏设汉城总领事以举人傅良弼派充 命副都统荫昌出使德国 秋七月调驻英公使罗丰禄出使俄国时以驻俄使臣杨儒与俄外部议约俄人威胁利诱儒不敢拒乃以下车倾跌致病请急命丰禄前往接替 八月命各省选派学生出洋肄业 召载澧回国载澧奉命抵德致递国书之后拟即启程前往美日及英意比等国德皇大不悦谓有违专诚之旨遂不允收礼而意皇致函载澧约十月十五日后方能接待英廷亦无迎迓之谕载澧电闻谕即启程回华 冬十月命四品京堂张德彝出使英国时古巴宣告自主派德彝兼充古使与古巴妥立新约

二十八年夏四月命五品京堂许钰出使义国杨兆璽出使比国吴德章出使奥国向例奥国以驻俄使臣兼充义比两国以驻英使臣兼充而三国以国体所关屡请中国遣派专使因有是命 六月命五品京堂胡惟德出使俄国四品京堂孙宝琦出使法国 秋九月命各省选择学生派往西洋各国讲求专门学业 冬十月派五品卿衔汪大燮为日本游学生总监督是年六月闲驻日使臣蔡钧反对自费生九人入振武学校学生五十余人赴使馆请求日本警察署忽逮捕学生代表吴敬恒孙揆均递解回国复叱逐五十余人出署而钧飞电北京外务部（总理各国事务衙门改设）谓学生受康有为嗾使聚众哄闹使署会美日专使贝子衔载振过日本晤其外部大臣小村寿太郎日人固心直学生惟不欲显持短长但以选派博学爱才之人充总监督驻扎是邦为言载振据以覆奏至是派大燮为管理赴东洋游学生总监督责成既专取缔益密日本留学界自是日益多事矣 十二月派贝子衔溥伦为美国散鲁伊斯城博览会赴会正监督以道员黄开甲东海关税务司美人柯尔乐副之

二十九年秋七月以湖北游学日本学生王璟芳效忠守正赏给举人出身从抚臣端方电请也 冬十月命杨晟出使奥国

三十年秋九月驻美使臣梁诚奏设墨国总领事驻扎萨里那古卢斯海口从之外务部奏设南斐洲英国属地总领事驻扎打兰士啤路埠等处以道员刘玉麟派充从之 冬十月派驻俄使臣胡惟德赴海牙会议 十一月电谕驻日使杨枢密查留东学生设立同仇会事时日俄构兵以东三省为战地中国政府宣告局外中立于是俄之海军厚集旅顺分驻海参崴其陆军则厚集奉天分驻朝鲜北及关东南部政府不敢问境内主权门庭之内听人哄争日人哗然姗笑之谓中国此次空前怪状之中立为可笑可怜留东学生耻之全体激愤一面倡立同仇会号召会员切齿裂眦喘汗奔走一面组织学生军遣代表钮永建内渡联合南北疆吏运动政府愿听节制以抗俄人而政府则顽然不应一面使直督拘捕代表一面电促公使威逼解散至商请驻京日使内田筹压制留东学生之法

三十一年夏六月考试出洋学生赏金邦平等进士举人出身有差自是每岁试留学生以为常 秋七月两江总督周馥奏请选普通德文学生十名赴奥国学习陆军下所司知之（续派

商部右丞绍英出洋考察政治）八月飭各省督抚多派学生游学欧美 命四品京堂刘世训出使法国三品京堂周荣曜出使比国五品京堂黄诰出使义国外务部参议汪大燮出使英国调杨晟出使德国李经迈出使奥国荣曜缘事未行改命顺天府府丞李盛铎出使比国九月改派四品京堂杨兆璽出使比国时命李盛铎会同载泽等前往各国考察政治改命兆璽使比冬十月以前驻俄使臣陆徵祥为专使赴荷国海牙平和会以驻荷使臣钱恂副之美前外部大臣福士达从会期订于三十三年五月五日举行及开会各代表提议设立公判所会众群訾中国法律最敝谓皖浙徐锡麟秋瑾两案株连惨酷有永不许拒回领事裁判权之言抑中国为三等国征祥据理力争政府亦牒请各国政府公认照头等国办理旋法代表覆称中国既照头等国摊费自应照头等国接待征祥遂据向会中声明会中又以中国兵舰朽坏难保和平复由征祥电请政府速加整顿会众又讥中国武代表丁士源越分妄为请严加诘诫飭遵军统十一月命庆亲王奕劻选派宗室出洋学习武备

三十二年春三月命驻英使臣汪大燮为贺日斯巴尼亚皇大婚专使
秋九月赐游学毕业生陈锦涛等三十一人进士举人有差

三十三年秋七月命外务部右丞雷补同出使奥国 八月命商部左侍郎伍廷芳出使美墨秘古等国九月予游学毕业生章宗元等进士举人出身有差
冬十一月派道员蒯光兴为欧洲游学生监督
十二月予进士馆游学毕业员杨兆麟等奖励有差

三十四年春二月命外务部右丞胡惟德出使日本国调钱恂出使义国以陆徵祥出使荷国三月允农工商部奏请于西贡河内瓜哇添设领事
夏四月予游学毕业生章宗祥等进士举人出身有差
六月予进士馆游学及外班毕业学员黎湛枝等奖励有差
因美国减收赔款派奉天巡抚唐绍仪为专使前往致谢
秋八月命陆军部右侍郎荫昌出使德国 九月予进士馆游学毕业员陈云诰等奖励有差予游学毕业生陈振先等进士举人出身有差 予进士馆游学毕业员叶尤圻等奖励有差
冬十月御史叶芾棠奏赴美游学生请按省分派下学部知之

[1]即明史满刺加国

卷五十九、英订烟台条约及续约

德宗光绪元年，春正月，英国翻译官马嘉理被杀于云南。先是，马嘉理领总理各国事务衙门护照，往缅甸迎印度派来逼将柏郎等，既得遇，折回云南，是时行至腾越厅属蛮允地方被戕。英人以为云贵总督岑毓英实主使之，交涉遂起。二月，飭署云贵总督岑毓英将英国翻译官马嘉理被戕一案，确实查办。时谕军机大臣等：“英国注意云南等处已非一日，现欲借此开衅，以为要挟之计，亟应加意筹防。着岑毓英将此案确实查办，并著刘嶽昭迅即回任，会同办理。一面遴派明干之员，带领得力弁兵前往，就近驻扎，借弹压土司为名，暗杜彼族不测之谋。或腾越一带，本有兵勇屯戍，即由该督抚密筹，不可遇涉张皇，亦不可稍涉疏忽。总期边衅可息，后患无虞，方为妥善。”三月，飭云贵总督刘岳昭等，迅将马嘉理一案持平办理。时总督探闻英国欲派兵进滇，并闻驻京英使威妥玛出京时，驻京俄使布策与之密商。英兵进滇，俄兵亦由伊犁进，使中国首尾不能相顾。中国海关总税务司英人赫德亦称其国现派兵五千，由缅甸蓝贡海口至云南交界处所驻扎。总督悉据以闻，政府以所闻各节，虚实虽未可知，而亟应先事绸缪之计，诏飭督臣刘岳昭、抚臣岑毓英：“迅将此案确查，秉公办结”，并谓滇省之野人：“虽居铁壁关外，其地尚属中国，不得谓非中国管理。”“设马嘉理非野人所戕，而诱之野人；或实系野人所戕，而谓野人非王法所能及，势必如上年台湾番社之事，彼族即可派兵自办，遂其奸计”云。夏五月，命湖广总督李瀚章往云南查办事件，著即迅速赴滇，将马嘉理被戕一案会同该督抚秉公讯结。秋八月，飭四川总督吴棠、传知前侍郎薛焕迅速赴滇，帮同李瀚章办理马嘉理被戕一案。

二年，夏六月，命大学士直隶总督一等肃毅伯李鸿章为全权大臣，即赴烟台，与英国使臣威妥玛会商一切事务。先是，李瀚章等查办滇案，覆奏谓：“马嘉理前此道滇赴缅，沿途地方均妥为保护。后由缅返滇，中隔野人土司地界，该处向多匪徒与进价勾劫，其时腾越绅民，闻洋人带有洋兵多名，将入关内，是以集团自卫。而马嘉理自缅折回，未经知会地方，致匪徒乘机劫抢。因洋人施放手枪，毙其伙匪阿用一名，登时起意拒捕杀害马嘉理及其从人四名，地方官实无调兵阻止及指使戕害事。”而威妥玛返京，与总署王大臣会议，仍坚请将全案人证提京覆讯。王大臣不允，威妥玛遂于四月出京。诏李鸿章俟其到津时，与之互商。既与威妥玛至烟台，未即南下，诏李鸿章驰赴与议。秋七月，李鸿章与威妥玛定约于烟台。鸿章抵烟台，至威妥玛处会商，仍坚执事由由岑毓英主使，倘中国不允将全案提京，彼已令观审员格维纳回英面陈，并将全案文卷证据赍送本国查核，一月内方有办法，此时即与议商，仍须咨请本国政府作主等语。鸿章反复与之驳诘，以滇案业经钦派大员往查，讯取供证确凿，若必欲将督抚大员提质，须将所得岑毓英指使文扎信据，或的确可靠见证交出查验，当据以请旨，否则中外各国皆无此办法。继威妥玛又以上年秋间，在部署议定办理滇案，优待驻京大臣，整顿通商事宜三大端，须一并办理，乃可结案，其人欲甚著，而所言甚肆。适俄、德、法、美、日、奥六国驻京使臣及英、德两国水师提督均在烟台，鸿璋故示整暇，往来无宴，并诣英、德两兵船阅操。

会万寿节，鸿璋又邀请各公使、提督宴饮庆贺，极力与之联络。情谊方洽，于是各使臣公议，亦谓无确实凭据，提提京为非，威妥玛始允另议办法，旋订会议条款三端，专款一条，所谓《烟台条约》者也。摘录于下：

第一端，昭雪滇案。

一、威大臣拟有滇案奏稿底本，由李大臣或总理衙门具奏。惟于出奏之前，须将折本交威大臣阅看。

二，奏明奉旨发抄后，由部署将折件谕旨抄录知照，并通行各省，将此折件谕旨详细列入告示。限两年内，由英国驻京大臣随时派员分往各省，查看张贴告示情形。即由地方大吏派委委员，会同前往。

三、所有滇省边界，与缅甸地方往来通商一节，应如何明定章程，于滇案议结折内一并请旨，飭下云南督抚。俟英国派官员赴滇后，即选派妥干大员会同商订。

四、自英历明正月一日

〈即光绪二年十一月十七日〉

起，以五年为限，由英国派员于滇省大理府或他处租宜地方一区驻防，察看通商情形，并随时可与该省官吏商办关于英国官民一切事宜。

五、所有在滇被害人家属，应给恤款，以及滇案用遇经费，并因各处官员于光绪二年前以前办理未协，有应偿还英商之款，现定为关平银二十万两，由威大臣随时兑取。

六、俟此案议结时，奉有中国政府惋惜滇案玺书，应即钦派出使大臣前往英国。所有使臣衔名及随从人员均应先行知照威大臣，以便咨报本国。其国书底稿亦应先送阅看。

第二端，京外两国官员会晤礼节及审办案件交涉事宜。

一、现因两国官员往来会晤及文移往来一切事例，京外尚有未协之处，应由部署照会各国驻京大臣，会同商订礼节条款，总期中国官员看待驻居中国各口等处外国官员之意，与泰西各国交际情形无异，且与各国看待在外之中国官员相同。缘中国现有派员出使之举，此项章程亟应定明。

二、咸丰八年所定《中英条约》第十六款，所载：“英国国民人有犯事者，由英国领

事官或他项奉派官员惩办”等字样。查原约内汉文，以英国两字包括。前经英国议有细章，并添派按察司等员，在上海设立承审公堂，以便遵照合约办理。现英国业将前定章程修改尽善，中国亦在上海设有会审衙门，办理中外交涉案件。而所派委员审断案件，或因事权不一，或因顾忌嫌怨，往往未能认真审追，兹议由总署召会各驻京公使，将通商口岸，应如何会同总署议定承审章程，妥为商办。

三、凡遇内地各省地方或通商口岸，有关系英人命盗案件，议由英国大臣派员前往该处观审。至中国各口岸审断交涉案件，两国法律既有不同，只能视被告者为何国之人，即赴何国官员处控告。原告为何国之人，其本国官员只可赴承审官员处观审。倘观审之员以为办理未妥，可以逐细辩论，底使可无向隅，各按本国法律审断，此即条约第十六款所载“会同”两字本意。以上向旨，两国官员，均当遵守。

第三端，通商事务。

一、议准以各口租界作为免收洋货釐金之处，并添开宜昌、芜湖、温州、北海四处口岸，作为领事官驻扎处所。及重庆可由英国派员驻寓，查看川省英商事宜。轮船未至重庆以前，英国商民不得在彼居处开设行栈。俟轮船能上驶后，再行议办。至沿江之大通、安庆、湖口、武穴、陆溪口、沙市等处，均系内地处所，并非通商口岸，按《长江统共章程》，不准洋商私自起下货物。今议通融办法，轮船准暂停泊，上下客商货物皆用民船起卸，仍照内地定章办理。除洋货半税单昭章查验免釐，其有报单之土货，只准上船，不准卸卖外，其余应完税釐由地方官自行一律妥办。

二、新旧各口岸，除已定有各国租界，应无庸议，其租界未定各处，应由英国领事官会商各国领事官与地方官商议，将洋人居住处所尽定界址。

三、洋药一宗，威大臣议请本国准为另定办法，与他项洋货有别。令英商于贩运洋药入口时，由新关派人稽查，封存栈房或趸船，俟售卖时，洋人照则完税，并令买客一并在新关输纳釐税，以免偷漏。其应抽收釐税若干，由各省察勘情形酌办。

四、洋货运入内地，请领半税单照。各国条约内，原已订明，自当遵办。嗣后各关发给单照，应由总署核定尽一款式，不分华洋商人，均可请领，并无参差。洋商将土货由内地运往口岸上船，条约内亦有定章，英商完纳半税，请领单照，即可运往海口。若英商自置土货，该货若非实在运往海关出口，不得援照办理。所有应定章程，免致滋生弊端之处，威大臣即愿会同总署设法商办。至《通商善后章程》第七款，载明洋货运入内地，及内地置买土货等语，系指沿海、沿江、沿河及陆路不通商口岸，皆属内地，应由中国自行设法防弊。

五、咸丰八年，所定条约第四十五款，内载“英商若将完纳税项洋货复运外国，禀明海关监督，发给存票，他日均可持作已纳税饷之据”等语。原约并未定有年限，

今订明三年为期，限满作废。

六、香港洋面粤海关，向设巡船，稽查收税事宜。屡由香港官宪声称此项巡船有扰累华民商船情事，现在议定，即由英国选派领事官一员，由中国选派平等官一员，由香港选派英官一员，会同查核定章遵办，总期于中国课饷有益，于香港地方事宜无损。

七、以上议准添开通商各口岸及沿江六处准起卸货物一节，应由李大臣奏请于半年后，开办各口租界，免洋货釐金，及洋药在新关并纳釐税两节。俟英国会商各国，再行定期开办，另议专条。现因英国酌议，约在明年派员由中国京师启行前往，遍历甘肃、青海一带地方，或由内地四川等处入岁以抵印度，为探查路程之意。所有应发护照，并知会各处地方大吏暨驻藏大臣公文。届时当由总署察酌情形，妥为办结。

十一年，夏五月，驻英使臣一等毅勇侯曾纪泽，与英首相兼外务尚书侯爵沙力斯伯里续订《烟台条约》专条十款成。洋药税釐并征，载在《烟台条约》，延搁数年，迄未开办。迭经总署与英使威妥玛商议，总以咨报本国为词，藉作延宕地步，至九年正月，以威妥玛回国，诏派纪泽与英部商办此事，期在必成。如李鸿章前议百一十两之数，并在进口时输纳，即可就此定议。纪泽屡与前外部尚书伯爵葛兰斐尔磋商，至本年二月，始克成议。会葛兰斐尔退职，沙力斯伯里以首相兼外部尚书，纪泽叠催订期尽押。英外部忽称印度部因中国内阁学士周德润奏参凤阳关违例收税事，索纪泽文据，担保此次所订专条不致为官吏所坏，卒致不行等语。纪泽申辩再三，最后具牒声明条约既定，不致有意外之勒索，英外部始订期是月初三日画押。计条约专条十款，所谓《烟台续约》者也。列于下：

一、《烟台条约》第三端第一、第二两节所拟办法，现在议定，应由两国国家日后再行商酌。

二、《烟台条约》第三端第三节所拟洋药办法，今议定，改为洋药运入中国者，应由中国海关验明，封存海关，准设具有保结之栈房，或封存具有保结之趸船内。必俟按照每百斤箱向海关完纳正税三十两，并纳釐金不过八十两之后，方许搬出。

三、现在议定，凡照上节所载正税、釐金两项安纳之后，该货主即可在具有保结之封存处所，限同海关，将洋药拆改包装。其货包每种式样尺寸，应由海关官员会同该口领事官预告酌定，听货主择用。如货主于此时请领运货凭单，海关即当照给，不取分文。其所请凭单，或每包一张，或数包一张，悉听货主之便。凡有此等运货凭单之洋药，运往内地之际，如货包未经拆开，暨包上之海关印封记、号码数均未擦损私改，即无须再完税捐等项。此等运货凭单，只准华民持用，而洋人牟利于此项洋药者，不许持用凭单运寄洋药，不许押送洋药同入内地。

四、现在议定，给发凭单章程，各口一律。

五、中国国家应许此等货包在行销洋药地方开拆者，如有应纳税捐等项，或当时所征，或日后所设，或由明收，或由暗取，均不得较土烟所纳税捐等项，格外加增，亦不得别立税课。如此等税损系照货价计课，即应将洋药与土烟价值相较均算，其较算之法，应于洋药之市价内扣除进口时所纳釐金。

六、现在议定，此次所定续增专条，应与一千八百七十六年九月十三日所定《烟台条约》视同一律，其实力郑重之处，亦与逐字载入《烟台条约》无异。此专条应于画押以后六个月开办施行，此指两国批准文据已在期内互换而言。倘期内未能互换，即自互换之日开办施行。

七、专条所载洋药章程，议定昭行四年。四年以后，两国如有欲废弃章程者，无论何时，皆可先期十二个月声明，一经通知，届期即为废纸。惟议定，倘查所发运货凭单，于海口运送洋药前往内地行销处所之时，仍不免其输纳一切税捐等项，则无论何时，英国即有废弃专条之权。倘续增专条，既经废弃，则洋药办法，仍应昭现在所行之《天津条约》所附章程办理。

八、续增专条，即经开办，如查其中有应行变通更改之处，两国国家即可会同商议酌改。

九、《烟台条约》第三端第七节所载派员查禁香港至中国偷漏之事，应即作速派员。

十、此次专条所改之《烟台条约》，暨此次议定续增专条，一并由两国朝廷批准文据，应在伦敦作速交换。定约大臣各奉本国国家之命，议定续增专条，画押盖印。此专条系在伦敦缮立汉文两分，英文两分，共为四分。

卷六十一、藩属之丧失

德宗光绪五年春闰三月，日本灭琉球，夷为冲绳县。琉球在中国东南大海中，康熙二年册封琉球国王，自是贡舟三年一至。原部三十六岛，纡蟠如虬龙流动，故称琉虬，后改琉球。北部九岛，中部十一岛，南部虽有十六岛而周回不及三百里。北部中有八岛，当咸丰时，日本乘中国多事，引兵占据，仅存一岛。同治十年，以琉球人漂流台湾，为生番所杀，日本人借此起衅，争琉球为其版图。出其国史相证，所书明万历三十七年，义久取琉球，其后书琉球入贡者十。日本宽文十一年当中国康熙十年，天和二年当康熙二十一年，享保三年当康熙五十七年，宽延二年当乾隆十四年，明和元年当乾隆二十九年，宽政二年当乾隆五十五年，又八年当嘉庆元年，文化三年当嘉庆十一年，天保三年当道光十二年，天保十三年当道光二十二年。当日，日本驻京副使柳原前光，以此与总署反复辩诘者果日。未几，有日人四名，亦漂至台湾遭害，日廷乃以兵向台湾，要索恤银五十万两，始罢兵行成。而琉球主权，已阴让于日本，政府不之觉。及光绪初元，英人争滇案，法人扰越南，俄人驻伊犁，日人遂乘间遣人传日皇旨，令琉球停止中国贡使。其国王答以“久为中国藩封，不便擅废……”因使人来告。时政府以新疆军务方急，中西交涉事繁，竟不之顾，至是，日本发兵鉴至琉球，执其王尚泰以归，废之。寻改其地方为冲绳县，封尚泰侯爵。

七年，春二月，谕总理各国事务衙门，再向日本使臣妥商球案。上年二月间，日本人竹添进一至天津，谒直督李鸿章，议结球案，称其政府之意。拟以北岛、中岛归日本，南岛归中国。又以前与中国所订约章无一体均沾之条，与诸西国独异，欲援照加入。鸿章以其将球事与约章混为一案，近于要挟，严拒之。旋日本公使宍户玢屡至总署，催结球案，益知中俄之约未定，意在乘机挟制。而美前总统格兰德复出任调令，亦主张割岛分离之说。鸿章因就询在津之球人向德宏，知南岛枯瘠，球人得之仍不能自立，而球王及其世子，日本又不肯释还。鸿章遂致函总署，谓“俄事方殷，日人籍肆要求，允之则大受其损，拒之则多树一敌，惟有延宕之一法以为对付。俟俄事既结，再理球案，则力专而势自张。”总理王大臣韪之，悬球案不遽结，至是俄约成，诏以存琉球宗社及割分两岛事，命总署与日商订。后宍户玢以未满所欲，悻悻而去。至南越新约成，日本乃援法以为例，于是琉球终归日领矣。

九年，秋七月，越南与法兰西立新约十三条。越南在中国南境，本称安南。康熙五年，封黎维禧为安南国王，自后六年一贡。嘉庆八年以后，改号越南。全境分为四部，北曰东京，中曰交趾支那，南曰柬埔寨，极南曰下交趾支那。咸丰、同治间，屡次与法人构兵，连失西贡附近之三郡及南交趾支那、柬埔寨等地。结西贡条约，认越南为自主国，实为法之保护国，政府尚未知之也。光绪八年，复籍名保商，以兵船驶入河内，攻陷之。是年二月，陷南定、河阳及广安、宁平二省，分兵攻陷东京顺化炮台。至是，迫越人割东京以议和，订约十三条，其第二云：“嗣后越南为法之保护国。非法国许可，不得与他国交通。”约成，越人始来告。

十一年，夏四月，大学士直隶总督一等肃毅伯李鸿章与法使议和于天津，订新约十款成。中国为越南与法人构兵连年，法人以海军夺海南，踞台湾，直捣福州，轰毁船厂，歼舰队几尽。其陆军在东京先后为刘永福、冯子材、苏元春等所击败。是年二月，法人攻小南关，子材复击走之，诸军拔队穷追，连蹙之于文渊、于谅山、于谷松、于威波、于长庆、于船头，追奔二百馀里，歼敌殆尽。方敌之大挫于文渊也，其国大哗，议院诸人多訾议政府，其势难以久持，乃潜托总税司赫德为言于李鸿章以议和。政府尚未知谅山之捷，遽允之。时法使臣曾纪泽密电法国情形，请力战，不报。约成，以越南让法。冬十月，英吉利由印度进兵，灭缅甸。缅甸在中国南境，于乾隆十八年入贡。其冬，国内大乱，酋长麻哈祖为白古人撒翁所败，擒而沉之江，撒翁据阿瓦。翌年，缅属之木梳头土司瓮籍牙起兵，攻走撒翁，遂王缅甸，渐以兵胁服诸土司，于是东至整欠、景迈、孟艮、孟勇，西北至蛮暮、木邦、孟拱，均为缅属。西南边外骚然。滇督刘藻、杨应琚前后以失机获罪，将军明瑞、大学士傅恒等屡出师征之，不能克，遂与议和退师，而贡使终不至。迨暹罗与缅势稍替，五十三年，缅甸孟云畏暹罗之逼，遣使入贡，返俘虏。五十五年，复具表乞封，愿十年一贡，许之。由是按期入贡。道光二十三年，英人侵割印度，以兵船驶入缅甸内港，逼都城，缅人割阿萨母、阿罗汉迭、乃式里母地予英，始定和议。咸丰年间，又以怒江口通商埠头之土官抽税繁重，英人复以兵船至郎崑，再割北沾全土界英，自是缅人以迭被英人侵凌，中国不能救，遂存轻视，岁贡竟绝。至光绪元年，又尝遣使入贡，及法人扰攘安南，英人复先攻夺缅甸傅海、牟国之地，即今所谓南缅甸者也，至是英人乘中国因法越事厌兵之际，又由印度派兵袭缅，一举而灭之。事闻，命驻英使臣曾纪泽与英外部抗议，立君存祀，俾守十年一贡之例，不可得，后由总署与驻京英使欧格纳订立缅甸约，始允存贡之议。其第一条载明：“每届十年，由英廷派缅甸大臣循例举行。所派之人，应选缅甸国人……”等语。中国争得纳贡之虚名，而实利全归于英矣。

二十年，春三月，朝鲜东学党滋事，朝王来乞援，许之。朝鲜在中国东北境，自梁贞明四年，王建统一朝鲜半岛，更国号高丽。至明洪武二十五年，李成桂受明册封，复号朝鲜，世为中国藩属。咸同间，法英两国与之构难，政府不之问。同治十二年，日本又与有违言，以兵舰入其燕华岛，突遭炮击。日人举兵问罪，以其为半主之国，依公法，其外交当由上国主之，因遣使来问。政府复以畏事之故，遽答之曰：“朝鲜国政，中国素不与问，贵国自与理论可也。”于是日人于光绪元年正月与朝鲜订立和约。其第一条：“日本以朝鲜为自主之国，与日之本系自主者相平等。”五年，英、美、德、法诸邦相继往朝鲜，求互市，朝鲜拒之。时李鸿章不明国际法上对于属国之权利及属国无外交之公注，贸然三致书于朝鲜国相李裕元，劝其与各国立约，且以闻于政府，谓借此备御俄人，牵制日本。六年，驻日使臣何如璋上书总署，倡主持朝鲜外交之议，请驻扎办事大臣于朝鲜。鸿章大不谓然，谓：“显然代谋。遇有交涉，各国将惟我是问，殊为棘手。不若密予维持维持保护，尚觉进退裕如。”八年，四月，朝鲜与美国立约。朝命道员马建忠、提督丁汝昌前往莅盟。旋英、法两国先后与朝鲜立约，皆由建忠介之。八月，朝鲜督监营兵以索饷哗变。

，藉清君侧为名，杀大臣及办外交者数人，并攻日本使馆，戕日本人数人，日使花房义质跳而免。乱兵入王宫，杀王妃闵氏，并囚国王熙与世子垢，大院君徐出镇抚之。大院君，王本生父是应也。熙嗣位时年幼，康穆太妃赵氏委任是应综理国事，号为兴宣大院君，摄政十年，力持镇国主义，致屡召外兵。既反政，王柔仁，闵妃参政，锐志求强，开海禁，联外交，一反大院君所为，国事遂变。大院君寢不平，故乱作，日本众寡，以兵舰至朝鲜。使臣参判金允植、侍讲鱼允中在天津闻变，遂乞师。时鸿章已以母丧假归，置直督张树声以闻，命广东提督吴长庆登州戍卒三千东渡。至汉京，诱执大院君，送天津，诏安置保定，令其闭门思过。其党百余人，悉捕杀之。朝王依日本之要求，给以赏金、开埠及驻兵，定约而返。时侍读张佩纶请派朝鲜通商大臣，理其外交之政。事下，鸿章覆奏，仍护前说，贪一时之省事，假名器以畀人，自是各国皆不以中国藩属待朝鲜。朝鲜政府，时分新旧二党，旧党附中国，号事大党；新党附日本，号独立党。十年十月，附日党金玉均、洪英植等作乱，杀其大臣闵台镐、赵宁夏等，召日兵入宫。中国驻防提督吴兆有（先是有人奏日朝约中如兵费及驻兵两条所关甚大道员马建忠实主其事且允由中国商局代借赔款诏问长庆长庆亦归罪建忠谓其擅预日约任性妄为遂与鸿章成郅其年三月鸿章撤长庆归戍旅顺口留三营驻汉京以兆有统之兆有长庆部将也闰五月长庆呕血卒于旅顺军中）与办理商务委员袁世凯助勤王兵杀英植等护朝王入宫金玉均等出奔日本日本公使竹添进一焚使馆走仁川之济物浦十一年正月日本遣宫内大臣伊藤博文来天津订约载明将来朝鲜有事中日两国欲派兵往必先互行知照于是朝鲜又成为中日两国公同保护之国是年三月朝鲜又有东学党之事党中人皆富于革命思想因抵制日币事党首崔福成倡会于全罗道之古阜县举国响应朝鲜政府发兵捕之党中迎拒兵犬败遂陷全州将逼王京世凯亟电鸿章称朝鲜乱党猖獗朝鲜决不能自平请派兵助剿鸿章遂发兵向牙山一面遵依津约使驻日使臣汪凤藻照会日本日本遂亦派兵往中国援师行至中途而朝鲜乱党悉平之报至夏六月日本兵入朝鲜王宫幽朝王使大院君主国事流其大臣闵泳骏等日兵既入汉京中国兵亦至屡请同时撤兵日人不允要东协助干预朝鲜内政中国亦不从且申明朝鲜为中国藩属日本则责中国背津约谓朝乱无待于剿中国无端发兵欲借端以开战局是曲在中国也于是其使臣大鸟圭介首责朝鲜独立自主勿认为中国藩属复以改革内政五事要之朝王不应圭介乃率兵入宫杀护兵困朝王政令无巨细皆入日人箠钥时世凯归国始为战备及战事开中国屡见挫于日本海陆兵力俱尽乃命鸿章赴日本讲和磋磨三月款议始成遂以明年正月订约于日本之马关其第一条载明中国认明朝鲜国确为完全无缺之独立自主所有对于中国修贡献典礼嗣后全行废绝于是日皇自大本营还东京受其国人之欢祝朝鲜王独立称帝改国号大韩建元光武而朝鲜与中国二百七十五年之关系自是断绝

冬十二月英法二国协商保证暹罗国独立暹罗在中国南境即古扶南自乾隆四十六年航海来贡政府因而册封之时缅甸势方强进侵边地暹罗频掣其肘以遏其方张之焰实有功于中国自是列于朝贡之邦先后赐御书扁额曰天南乐国曰炎服屏藩道光中始与英人缔约各国继之群认其独立暹人亦思自振励朝贡之典礼遂缺及咸丰初元太平军起东南披靡风声播及南洋西人又加煽惑暹人信之将乘此脱属国名义同治八年遣使来上书请废

贡献之礼以后赠献方物彼此授受仪式当与西洋诸国同政府拒之光绪四年曾纪泽使英途过暹京讽令照旧入贡暹不允但请立商约又拒之五年三月暹廷忽接到驻暹英领事转递中国催贡札文盖英官以战船假中国旗号伪云青贡之师以胁暹人使之求助于彼也暹王知之向臣下具道所以历年久贡之故因贡表内前用跪具字樣近已改用西礼不无窒碍然卒莫为代达于中国者故不能不与英人倍加亲密云先是暹王久拉即古兰格罗以势孤意怯下令改朔易服禁蓄奴兴教育辟道路定法律更币制整顿林业等事皆效法西俗国势赖以稍充然介于英法两大之闲法既以交趾支那东京为属地以东埔寨及南部越南为保护国又胁暹罗以湄公河东一带为法国属暹罗百方拒之不得许以所索之地并偿金五百万法郎克以和时十九年事也法既伸张势力于暹罗英以属土与暹毗连恐法人侵及缅甸至是与法人订约互不得侵占暹罗片土至一千九百零四年四月八日双方在伦敦签押宣言确定英法两国在暹罗政治上之地位并保证暹罗独立云此外中国之藩属如苏禄国在中国南海中雍正五年入贡乾隆五年内附至是以三岛独立而所属之东婆罗州已割归英公司南掌国一名老挝在中国南境雍正九年内属乾隆以后国土分裂西分服于缅甸其大半后为土司专辖其南方则于光绪十一年中英订结滇缅条约时英外部侍郎克蕾晤驻使曾纪泽称英廷愿将潞江以东之地让还中国其中北有南掌政府不受迨暹罗独立南掌遂归附之布鲁克巴国即不丹在中国西藏东南境雍正十年来属今称独立国哲孟雄国即锡金在中国西藏南境康熙五十九年归属光绪十六年英人胁服之朝命驻藏大臣升泰与英划界哲孟雄国遂尽入于英博罗尔国即帕米尔一作波谜罗在中国新疆葱岭之西境乾隆二十四年纳款自英俄环伺迤北迤西属俄迤南则附于英属之阿富汗国阿富汗国即爱乌罕在巴达克山国之西南乾隆二十九年入贡光绪五年英人占领之巴达克山国在葱岭之西境乾隆二十四年来献回酋霍集占兄弟之馘遂归诚布哈尔国在葱岭以西乾隆二十九年因巴达克山国请内附浩罕国即敖罕一作霍罕为葱岭西回回干隆二十九年来纳贡哈萨克国即吉利吉斯族西人称曰鞑靼里包新疆西北境乾隆二十二年征服布鲁特国包新疆西南境乾隆二十三年遣使来朝以上四国今皆为俄属廓尔哈国一名尼泊尔又称巴勒布在西藏西南境乾隆五十五年大学士福康安等率师征之兵败赴军前降乾竺特国一名坎巨提又作喀楚特在新疆西南境乾隆二十九年来贡方物自是除廓尔哈尚修职贡乾竺特尚为内属外旧日国藩竟无一存者矣

卷六十八、自立军之失败

德宗光绪二十六年，秋七月，秦鼎彝起兵于安徽之大通，不克，走日本。鼎彝，湖南长沙人，一名卹，又名俊杰。上年秋，东渡日本游学，是年二月返沪。时康有为等居日本，以保皇会名义募集海外华侨巨款，使刘阳、唐才常在沪招集同志，为内应，将图大举，一时声势颇震动，湘阳林圭奕因汉上之众以应之。鼎彝乃自沪至皖之大通，运动水师弁卒，共图起事，并与皖抚卫队管带孙道毅深相结纳，密输军火予之，以为响应计。方与汉上约期并发，为大通保甲局委员许鼎霖侦悉，告密巡抚王之春，下令戒严。彝见事泄，仓猝发难，督率水师，占领盐局，局员钱绶甫逃，防营管带萧镇江守中立。王之春闻警，派营官邱显铭率所部至通捍御，并令芜湖防营统领李本钦就近率大队来通，以助军势。鼎彝挥兵搏鬪甚力，卒以兵单寡败绩，余众四散，鼎彝仅以身免，仍走日本。汪镕谋起事于湖南，事泄自杀。镕，安徽人，幼从父宦游湖南。自德据胶、澳，感于外患日亟，创设白话报于芜北，以开通民智自任。未几，政变，朝士被杀者六人，株连甚众，镕愤然曰：“康某日言变法，为清廷效忠，尚不见容于满人，横遭诛窜，天下事尚可为乎？”因鼓吹益力。及是年五月，拳匪乱作，开衅列强，大局益危。时唐才常倡破坏于沪上，林圭等谋举事于汉皋，镕亟思结合湖南会党，以为发难地。大会湘省志士于定王台，以掣于经济之缺乏，不能大有所设施，复赴汉约师期。时主南路者，为清泉杨暨，主西路者为武陵何来堡，均谋响应。未几，大通失败，湘抚俞廉三迎合督臣张之洞意旨，大索党人。镕兄鉴以县佐候缺长沙，热中于进，乃告密于劣绅王先谦，凡与镕有连者，悉罗列无遗。先谦上之廉三，乃缙绅四出，镕方自汉归，闻被捕，始知为兄所卖，仰药死之。复逮其次兄瑶，下之狱。鉴叙功，得保知县。唐才常谋起兵湖北之汉口，事发被杀。先是，长沙毕永年幼读衡阳王氏遗书，慨然具种族思想。弱冠后，即结纳乡中会党，以为异日利用地。浏阳谭嗣同深敬其人，因与缔交。政变之前数日，永年至北京，观察政局，造康有为，语不合，乃为书抵嗣同，历陈利害，劝之行。嗣同不果，永年遂东渡。嗣同卒及于祸，永年至日本，晤广东香山孙文、日本人宫崎寅藏，与语，皆大合，旋偕日人平山周回华运动，出入湘省者凡三次。偕各会党首领赴香港，组织兴中会。自湘、鄂至长江一带，两粤、闽、浙之间，皆为所鼓动，方谋克期大举，以乏饷械故，迟迟未发。时有所谓保皇会款，才常欲因其资，联络嗣同旧部师襄等发难南方，为嗣同复仇，方别有所组织，永年亦才常反，因往说之，以勤王光复相与辩论一日夜，卒以宗旨不合，永年恸哭而去，弃为僧，居粤之普陀，所部遂归于才常。密布长江上下游，窥武汉，欲因而袭取之，为根据地。才常复组织正气会于上海，以为机关，寻易会名为自立，开国会于张园，志士至者数千，公推香山容闳为会长，福建候官严复为副会长，才常为总干事，林圭及长沙沈荃皆干事。圭，湘阴人，为才常弟子，而亦永年挚友也。初游学日本，上年冬返国，偕行者，慈利李炳襄、田邦璇，武陵蔡锺浩，长沙秦鼎彝，及才常之弟才中共五人，建议欲着手湖南之运动。挈一日本人，拟建立学校或报馆、译书局，暗设自立会机关部，不果行。圭乃至汉口，设自立国会，散放富有票，起自立军，分地段以设旅馆，为会友及其他党徒往来寄宿之处，而东南独立之基础已立。其旅馆在汉口

者曰宾贤公，襄阳曰庆贤公，沙市曰制贤公，荆州曰集贤公，岳州曰益贤公，长沙曰招贤公。刊布会章，称新造自立之国。其规条有不认满洲为国家，及本国会深懷危亡等语。分立五军，以大通为前军，鼎彝统之；安庆为后军，邦璇统之；常德为左军，龙阳陈犹龙统之；新堤为右军，苒统之；汉口为中军，圭自统之。而推才常为督办，分途增募兵勇数十营。上游则界四川之宜昌，下游则界江西之武穴，南则界湘之荆州，北则界汉之襄阳、随州、当阳、应山、麻城，中路则沔阳、新堤、沙洋、嘉鱼、蒲圻、崇阳、监利，皆其势力范围所及。诸事粗定，值北方拳乱事作，圭思利用此时机而起，促才常发上海。才常至汉，定期是月十五日大举，以部署未整，缓之。而长江防范严，军耗不能达大通，至期而大通已举事，以后路不及响应，无援而溃。后屡迁期，而二十五，而二十九，至是，事败，时二十七夜也。

才常圭炳寰邦璇及长沙瞿河清向联陞沅陵王天曙湖北潜江傅慈祥广东香山黎科黄自福福建漳浦郑保晟直隶宛平蔡成煜同系者十三人翌日又捕获七人皆见害方才常之在汉也尝藉日本人为通殷勤于鄂督张之洞讽以自立军将拥之挈两湖宣言独立之洞先颌之故当自立军之厚集兵力时时过江点兵又大通前军之败距是时已十馀日之洞固皆熟闻之而不予发觉然卒狐疑莫能自定才常以之洞无复可望乃示绝于之洞而扬言于外人曰倘张之洞奉满廷之伪谕以排外（是年五月联军攻大沽之洞电奏北京言臣应不带兵北上御敌恭候朝命后为江督刘坤一阻止）吾必先杀张之洞以自任保护外人之事语浸闻于之洞继又侦知才常等之所为与己绝反对且将布告在汉各国领事据武昌独立之洞乃突发而擒之才常题诗狱壁中有剩好头颅酬故友无真面目见群魔之句圭为人沈鸷有条理主持军中一切交通之力甚大而其谋国之忠历境之艰尤为同人中之杰出者炳寰志趣弘伟文思敏瞻从圭治军书遇事赞画翩翩记室才也邦璇魄力尤雄学识绝流俗自安庆计划失败退至汉口遗诗数章读之皆凛凛有生气慈祥科保晟成煜四人乃留学日本陆军学生时以暑假归与谋不数日而及于难永年宗旨主急进而多方略与人交开诚布公故群贤乐为之用汉事未起以前一夫倡说举国同声皆永年一人十馀年前奔走呼号之力也自是湖北杀人无虚日以护军营二百人驻汉口铁政局形迹之稍涉嫌疑者皆不免约死百余人湖南数亦称是盖湘抚俞廉三承之洞旨任用劣弁刘俊棠杨明远熊海门劣员王祖荫等要功觊利恣意搜索同时两湖骚然其在湖南死事之最著称者汪镛外为唐才中蔡锺浩何来保方成祥徐德姚小琴李生芝汪楚珍李英徐崑陈保南易瑞林李广顺莫海楼仇长庚李如海沈竹亭及臬幕李运航駢死者亦百余人惟杨暨走免才中自其兄才常被逮于汉口以脱于难奔新堤旋入湘以集军遂及于难锺浩治事机警始从才常部署于汉上事败返武陵方有所谋画忽被逮来保被执于辰州檻送长沙杀之生芝于汉上事败之后复于慈利联合沙市会众成十馀营图再举时有慈利官班子之号其势力范围之大可以概见运航以汉寓检查信据得其寄予炳寰家书言及进兵湖南事有曰一路来当为王者之师毋得杀戮过甚遂以是定讞逾年廉三复名捕长沙舒闰祥闰祥闻之愤言曰士可杀不可辱因饮药以殉沈苒起兵于湖北之新堤附近之崇阳监利及湖南之临沅沅州湘潭各起应之皆败绩苒在新堤闻汉上以迂缓失事亟起发难于新堤而崇阳监利与湖南临沅潭等邑群起响应时因中军已失人心涣散师遂溃黄南阳李寿金曾广文王昌年皆被执死之苒走武昌

二十九年夏六月沈荇被执于京师命立毙杖下荇自新堤失败之后欲着手中央之运动乃走北京至天津时联军屯聚于津沽荇通刺谒联军诸将士而与日帅尤治谋藉奉魁案以尽复满族因条列诸凶名及其罪款致诸联军于是载勋启秀载漪载澜之徒分别诛窜几尽闻者称快荇既居北京二年时值联俄党与俄人订密约于北京荇侦知之悉为揭载于日本各新闻于是政府备受东京留学生及各友邦之诘责有内务府郎中庆宽者前以身家不清为御史锺德祥所劾籍其家既落职日思复官不得尝随刘学询至海外谋捕康有为亦不获又检讨吴式钊初亦自附于新党后以沈鹏事牵连褫职二人固皆识荇欲陷之以图开复乃相与协谋发荇以上三事先商之鄂督张之洞前驻日使臣李盛铎然后因权阉李莲英以告密即日传旨步军统领协同工巡局捕荇于城内三条胡同既上狱太后命毋庸覆奏捶毙之乃以竹鞭鞭背至四时之久血肉横飞惨酷万状而犹未死以绳勒其颈始绝时月之初八日也自荇惨死后国中舆论大哗上海人士大开追悼会于愚园男女至者及千外人亦大不平以为中国政府如此野蛮各国实难以平等相待惟有以强硬手段使之恐惧而外部叠接驻扎各国使臣警报谓各国政府观于此事逆料中国居大位者将有不得久安之势且有某某等国将重翻庚子庇匪旧案索当时罪魁之幸免者于此时再行正罪英外部大臣蓝斯唐更于上议院论及此事之非故各西报持论皆谓沈荇之死震动人心较之日俄开战尤当

编者曰自立军世人所谓勤王之师也因其会章有曰务合海内仁人志士共讲忠君爱国之实以济时艰人遂指为保皇之铁证然其序则有曰低头腥膻自甘奴隶又曰非我族类其心必异此其军中之真相究为何若但观其词气之闲已有隐隐流露者矣盖平心论之是时内地风气未开闻谈民权变法者莫不色骇而却走唐氏固知之以为中国有数千年之习惯即满清有三百年之驯伏非藉忠君爱国之名词不足以号召天下故一时人杰如毕永年氏徐杭章炳麟氏皆常以此相驳诘而唐氏勿顾也不然当日军中之健将如林圭氏秦鼎彝氏汪镕氏沈荇氏皆天纵之才岂轻为人所鬻合者况后此之特起民军以光复我汉族者即出于自立之军将也是则唐氏及当年在事诸同人之隐志又乌可不亟为揭明之以示天下

卷七十一、改订藏印条约

德宗光绪十六年，春二月，驻藏大臣升泰与英国总理印度大臣兰士丹，在孟加腊城，会议藏印条约八款成。初英人既并有印度，急欲北图西藏。先收哲孟雄、不丹、廓尔喀三国为保护藏人惧英之逼，并憾哲部之私结英人，遂于光绪十四年正月遣兵入哲，筑堡塞于龙吐，严陈兵备，阻绝商旅。英人将出兵击之。总理各国事务衙门闻之，与驻京英使威妥玛定约，停止英兵入藏，而飭令藏人速撤龙吐卡房。驻藏大臣文硕抗疏争，谓地为藏地，撤无可撤。政府拆其迂谬，撤文硕还，代之以升泰。旋英人麻葛葛带兵至哲，攻毁龙吐卡房，藏兵退还。八月，藏兵复与英兵相攻击，藏兵败，咱利、亚东、朗热等隘同时失去，于是升泰派员赴边，阻至英兵，并自至边境，勒令藏兵解散。与英员保尔会商界务，总理衙门亦派税务司赫政往，帮同商议。寻保尔约升泰至独脊岭会议，至是约成，计八条：一、订定藏哲之界。二、中国认哲孟雄为英国属地。三、开印藏通商之路及外交交涉。四、另订藏印通商之约。五、另订哲孟雄界内游牧之事。六、另订印藏官员交涉之文移往来。七、此约批准后，限六个月，由驻藏大臣暨英国驻印大臣，各派员会商第四、第五、第六另议之事。八、此约批准六个月内，在伦敦互换正约。

十九年，冬十月，四川越嵩营参将何长荣，税务司赫政与英国政务司保尔在大吉岭议定藏印通商、交涉、游牧条约九款，又继款之条成，此遵十六年之约，妥议界务、商务，详细章程，计接议条款九条：一、开西藏亚东为通商口岸。二、租佃建置。三、交涉案件。四、洋关税则。五同六、交涉案件，七、交际仪文。八、同。其内容之最要者，亚东以光绪二十一年开市，设税关，以总税务司赫德辖之。限五年以内不征税，惟英人欲于藏哲交界处立界牌，中国不许而英人入藏自由之权利亦不完全。英人怏怏至二十九年，遂有率兵侵藏之事。

三十年，秋八月，命三品卿唐绍仪前往西藏查办事件。先是，俄人与英人争藏，英人对藏政策全以威逼，俄人则纯用怀柔，于是中日战争以后，藏人知中国之不可恃，欲结俄为援翼以御英，乃倾向于俄。及联军陷北京之报达拉萨〈（藏京）〉，中国威信坠地，俄乃诱藏结密约。至二十九年，日俄将开战，英人乘其时，俄人不能南下，乃籍口藏人于光绪十六年、十九年之条约不能履行，于上年九月十八日，遣其大佐荣赫鹏率远征队，由印度进兵。十一月初六日，达于藏境之花梨驻军，三月有奇，俟麦都那将军大兵之至，会齐，以是年二月十一日指江孜进发，计共步兵八百五十，马兵百五十，炮六十。五日，抵缁纳，藏卫戍地也。是日，藏政府使使入英军，请忽进。荣赫鹏告以此次之来，带平和的使命而已。强进不止，藏军千五百拒之，遂开战，麦都那几负伤。俄而，藏兵大败，死伤五百，捕虏二百。十八日，驻藏大臣有泰〈（即前大臣升泰之弟）〉遣人至英军，止其前进，不听，但约有泰赴帕克里议和，照十六年条约办理，愿即休兵。有泰借口商上不肯支应，乌拉不能启程，怯不进。二十日，麦都那进台巴谟阿湖，击退藏兵八百，伤亡甚众。翌日，英人派格尔卡斯兵及印度兵，各一中队，与藏兵战于嘉维山峡下，历六小时，英军

伤亡二十五，藏人二百。三月十三日，英军抵江孜以东峡路，藏军千五百守之。以发炮不能命中，英军安然直进。四月十二日，驻英使臣张德彝电达外务部，言已商英藩部，谓电印度总督崙士六停止进兵，所议各条，请与驻毕。英使萨道义商定，电藏速办。政府与萨使议不谐，置之。十三日，英军袭据巴拉村及附近村落。十八日，荣赫鹏牒告有泰，限以本月二十五日至江孜会议。二十四日，藏军袭坎马之英军炮台，不利，死者百六十四人。时英国兵力总数已有四千六百人。五月十三日，英军既占领江孜，仍盼有泰赴议。有泰仍不敢进，日挈藏姬五六人，赴柳林子备酒、跳舞、纳凉，藏人皆切齿。十六日，藏人乞英军休战，以待拉萨使节之至，英人许之，约以三日。十九日，藏政府代表至江孜，与荣赫鹏会议，不得要领，复展休战期限三日。二十二日，休战期满，荣赫鹏复下命进攻，破江孜炮垒。六月初一日，荣赫鹏传檄远近，布告入拉萨议和之事。翌日，拔队进行。初七日，英军至拿亚孜，藏政府代表人来言，拉萨为宗教圣地，非商议国事之所，请回使节，返于江孜，英人不许。二十八日，英军入拉萨，达赖喇嘛勒朗结遁。七月初六日，荣赫鹏乃往见有泰，告以中国之责任，且诘有泰不赴约之故。有泰自言无权受制商上，不肯支应夫焉，以自明无罪。荣赫鹏笑颌之，即以此据为中国在藏无主权之确证。于二十二日，列条约十款，迫藏众即画押：一、西藏番人，现允遵照庚寅〈（光绪十六年）〉约章之第一款，将哲雄孟边界，重立界碑。二、西藏番人，应允除亚东关外，并在江孜、噶大克二处，开埠通商，英藏商民均可听便往来，其癸巳年〈（光绪十九年）〉所立商约，所有不妥处须与藏番商议，改定后，以上所开之三地均须遵办，其商民前往印度，应就现行道路转运，如另有商务兴旺之地，再行商酌添设商埠。三、癸巳约章，甚不妥协，应另案由西藏派番官与英国商改。四、税则一经订妥后，不得再加。五、由印度边界至亚东、江孜、噶大克三处边界，沿途不得设立关卡等，如各该处道路险峻难行，仍须由藏修理，又该三处应由西藏设立番官，所有驻扎该处之英官，如有文件致驻藏大臣及汉番各官，均应由该官接迎，将来他处添设商埠亦应仿此办理。六、因藏番不遵约章，开罪英国边务大臣，妄动兵衅，应由藏赔给兵费五十万磅，合卢布七百五十万元，匀作三年付给，以西历千九百零五年元旦为首期，至该款定于何地交收，应由英国先行咨会，或即在大吉岭交收。七、因欲将前六款实力办到，故印兵、英兵仍行留驻春丕〈（即城备）〉，俟三年后，商埠已来，赔款已清，方行撤退，否则仍驻该处。八、由印度边界至江孜及前藏地方，凡扼塞之区，均须由藏番修改平易。九、此后如不经英国允许，则无论何国人，不得典卖租给西藏土地，又不得预闻一切应办事宜，又无论何国不得派遣官民蒞城，协同藏番办理各事，又不得干预修道并筑路开矿等事，又各样恒产及一切值钱产业，不得与外人抵押、对换、租卖。十、此约由英国边务大臣荣赫鹏与达赖喇嘛勒朗结，于九月二日〈（西历）〉，在西招画押盖印，约文用英文及番文缮写，以英文为准。约既成，翌日有奏据以电告政府，犹以从权办理先行签约为请，并言勒朗结潜逃，请即传旨褫革。诏以西家子违西喇麻代任，而严缉勒朗结，即令有泰与英使协商藏地通商之事。旋俄、德、美、义公使环起抗议，而俄尤剧，其驻京公使璞科第屡向外务部声言：“中国若轻易开放西藏，则中国须将库伦、新疆等地事权让俄，亦须另立专约。”于是政府始发电责有泰，使废约。有泰电请专派全权，

政府仍令其竭力议驳，并命川督锡良赴巴塘，与有泰协商。锡良覆奏借口于川省患旱，土匪蜂起，辞不往，至是命直隶津海关道唐绍仪开缺，以三品京堂候补，加副都统衔，授为全权大臣，前往西藏商改《英藏条约》。

三十二年，夏四月，外务部侍郎唐绍仪与英使萨道义订《藏印正约》六条于北京成。绍仪自三十年八月奉命赴藏，至十一月始成行，于三十一年正月至印度，与英议约专使费利夏议不谐。二月，诏以绍仪接任驻英公使，命直赴英京，毋庸赴藏。时达赖已自库伦折回西宁，十二月，荣赫鹏忽派兵拥后藏班禅入印，而绍仪在印磋商条约，既已经年，舌瘡笔秃，迄无成议，由外务部奏请移至京师商办。时值日俄休战，日使小村寿太郎来议辽沈约，乃召绍仪还国。绍仪遂挈参赞梁士诒归，留参赞张荫棠于印。绍仪既归，仍谕令与萨使交涉藏事，往复磋磨，至是始克就绪，计正约六条。而光绪三十年，荣赫鹏与达赖所订之《英藏条约》仍附是约之后，一切承认之，惟改称中英续订印藏条约而已。遂于是月初四日签押正约。

一、光绪三十年七月二十八日，英藏所立之约暨其英文、汉文约本，附入现立之约，作为附约，彼此允认切实遵守，并将更订批准之文据，亦附入此约。如遇有应行设法之时，彼此随时设法，将该约内各节切实办理。

二、英国国家允不占并藏境，及不干涉西藏一切政治。中国国家亦应允不准他外国干涉藏境，及其一切内治。

三、光绪三十年七月二十八日，英藏所立之第九款内之第四节，所声明各项权利，除中国独能享受外，不许他国国家及他人国民享受。惟经与中国商定，在该约第二款指明之各商埠，英国应得设电线通报印度境内之利益。

四、所有光绪十六、十九年，中国与英国所定两次《藏印条约》，其所载各款如与本约及附约无违背者，概应切实施行。

五、此约分缮中文、英文，业已细较相符，惟辩解之时仍以英文为准。

六、此约须由两国大皇帝批准画押，自两国全权大臣画押之日起，限三个月在伦敦互换。此约中文、英文各缮四分，共八分，两国全权大臣画押盖印为凭。

编者曰：当光绪十八年，英国有名之探险家笛罗女史自两藏归，语人曰：“中国之对藏番，纯用欧人待殖民地之法。”时人皆韪其言。是则乾隆朝所定原约之功效也。自后人奉行不力，任藏人与外国交涉，遂有英人干预之患。而《英藏之约》以成，及在北京更定所设《中英续订印藏条约》举前约而一一承认之，于是西藏地方遂至受英人干涉，竟不能与无条约之内地同等，遇有战事，且阻我进兵矣。然则西藏不仍为中英公同保护国耶，呜呼西藏，呜呼西藏主国！

卷七十四、谕禁鸦片之严厉

德宗光绪二年，秋八月，定严禁栽种罂粟例。鸦片烟之禁，始自雍正时，其初但充药品。英商以之贩运内地，称洋药，故民间吸食者极少。至道光初，其风始炽，寻由印度传之云南。而南土兴，辗转传至四川而有川土，又传至甘肃而有西土，由是而至贵州，由是而至陕西、山西。一二十年来，废田而种罂粟，岁益侵广，而西洋贩运中国，亦岁益增多，盖开种日繁，即吸食者日众，势将尽中国之人，皆至失其生理，槁项黄馘，奄奄仅存，无异残废。西洋人士知鸦片为害之烈与中国受害之深也，相与设为公馆，广劝禁止栽种贩卖，于是中国人亦耻之，言路纷纷具疏，请严禁吸食，并禁种罂粟。因有是举，然亦徒有章程，并无实事，不免为外人所窃笑而已。

三年，春二月，驻英使臣郭嵩焘奏请设法严禁鸦片烟，不报。嵩焘奉命使英，初至伦敦，英国世爵夏弗斯伯里、议院院马光斯求尔德、教士里格德尔、刺尔丹拿毕等五十余人来谒，力劝中国设法禁烟。又其议员阿什伯里游历各国，所至风土人情，皆照相以记之，而于中国男女僵卧吸食鸦片之事，共传观以取笑，嵩焘耻之。是年正月，嵩焘复接据粤绅唐德峻至，咨请总理衙门转奏。其后屡见英国士绅力除鸦片烟之害，发于至诚，又接粤绅桂文灿、温有溪等二。至是，具疏入告，请设法严禁人民吸食，略谓：‘鸦片产出印度，而南洋附近之暹罗，东洋之日本皆有厉禁，无吸食者，独中国贩运销行，每年课税至数千万，为英国人入款一大宗。而其地士绅会议犹勤勤焉，谓烟土贻毒中国，引以为咎，倡言禁止。中国人民肆行吸食，略无悔悟，其势非严定督抚处分。以督率州县，不能望有转机，请朝廷坚以持之，宽以期之。限示三年，责成督抚分饬各州县，多制戒烟方药，施散劝谕。以满三年为期，逾期不能戒者，官吏参革，生监举人褫斥，长官不举发者同罪。而凡文应试士子，例具五童互结，宜以鸦片烟为首禁，容隐者一并除名。童生吸住鸦片烟，皆先停考，滥入场者，廪保坐黜。廪生吸烟，皆先停止保人，滥保者教官坐黜。而于各省栽种罂粟方，则由有司劝谕绅民，整顿所属地方，渐摩劝化，更需以二十年之期，尽人民而变革之矣。’疏入，不省。三月，郭嵩焘奏，鸦片为害中国，拟请设法禁止，下各将军府尹，各直省督抚议奏。嵩焘再疏称，臣光绪三年二月初八日，具奏设法严禁鸦片一折，至今未奉批谕，窃惟国家兴利除弊，关系重大，未易轻议整顿。鸦片烟为害中国，五六十年，通计各省人民陷溺其中者，率十之四五。其害日广，其毒亦日深。道光十九年，特诏严禁，遂至激成海疆之祸，而吸食者愈多。至咸丰九年，例禁已开，更无顾忌，臣于此时复为禁止鸦片烟之议，人皆知其难行，而臣揆之事理，验之人心，顾独以为至易。盖使国家设立科条，责成地方官禁之，徒以扰累百姓，其终必至愈禁而愈开。使人民自为禁制，以奖励其廉耻，而激发其天良，则动于诏旨一二言而人心自振，积弊亦将自除。并陈办法数条：

一、权衡人情，以定限制之期。

二、严禁栽种，以除蔓延之害。

三、严防讹诈，以除胥吏之扰。

四、选派绅员，以重稽查之责。

五、明定章程，以示劝惩之义。

六、禁革烟馆，以绝传染之害。

奏上，谕交各该将军府尹、各直省督抚斟酌妥议具奏。原奏者发钞。

四年，春二月，工部右侍郎阎敬铭、山西巡抚曾国荃奏，申明栽种罂粟旧禁，允之。自郭嵩焘再疏条陈禁烟之法，奉旨交各省议覆后，久之，仍寂然无闻。是年，敬铭因督办秦晋工振，在山西见晋省地半硗瘠，产粮本不见多，又不按亩力耕，私栽罂粟，民间既少存粮，一遇荒歉，尽成饥殍，特商同国荃出示晓谕，劝民间嗣后务当变计，尽力农作，期于国产充盈，凶荒有备。所有栽种罂粟者，责令族长、甲长押令拔除，改种五谷，违者究治。官吏私征罂粟亩税，立予参撤。至是，具疏奏明，谕如所议行，并着各省仿照章程，一体严禁。秋七月，陕甘总督左宗棠奏请将禁种罂粟不力及实在出力各员，分别惩劝，从之。宗棠在甘肃，督饬司道，设法劝禁栽种罂粟，颇著成效，至是，奏请惩劝查禁不力及出力各员。奉旨依准所有查禁不力之尽先道宁夏府知府李宗宾、候补直隶州知州代理宁夏县知县胡韵兰、灵州知州孙承弼、两当知县任懋修、碾伯县知县邵杜宁、朔县知县贺升运等革职、开缺、撤任有差。其查禁尤为出力之宁灵厅同知喻光容，赏知府衔，署中卫县知县刘然亮署宁夏府知府，张家槐署平罗县知县，吕恕代理宁夏县知县，李日干代理灵州知州，德荫署甘肃宁夏镇总兵冯南斌等均交部优叙。九月，曾国荃奏，晋省禁种罂粟，请仿照两江，将栽种罂粟地亩充公章程办理，允之。国荃前与阎敬铭奏明重申栽种罂粟旧禁后，适编修李用清查赈至晋，就便察看晋省各厅州县所种罂粟之处，较一年前减去十之六七，因缄告国荃，乘此大稔粮贵之时，劝民改业，可期事半功倍。国荃嗣查两江禁止罂粟，有将地亩充公章程，最为民闲所畏惮，至是，奏请仿照办理，并请将地方官稽查不严及能力禁而不扰累闾阎者，分别撤参奖励。谕如所议行。

八年，夏六月，山西巡抚张之洞奏：民闲栽种罂粟，有妨嘉谷，拟严法申禁。允之。之洞疏称：晋民好种罂粟，最盛者二十馀厅州县，其余多少不等，几于无县无之。旷土伤农，以致亩无栖粮，家无储粟。丁戊奇荒，其祸实中于此。然而覆辙相沿，不知迷复，议者或持不宜禁之说，大率一由见小，一由畏难。然臣谓以地以时，有不可不禁者四：晋地硗瘠，产粮无多，早年本恃外省接济，自为罂粟所夺，盖藏益空，即如前此大稔。垣曲产烟最多，饿毙亦最众。近日种烟之地以交城为最盛，而粮价亦以交城为最昂。贼民害稼，确有明证，此时若再不遏其流，设有偏灾，岂

堪设想？此必禁者一也；晋省山农多，水利少，种植莒粟之功倍于蔬卉，偶有山溪水许可资灌溉，悉以归之莒粟。此物最耗地力，数年之后，更种他谷，亦且不蕃。仅有此区区难得之水利而养此毒民之物，此必禁者二也；晋省吸烟之癖，官吏、士民、弁兵、胥役以及妇人女子，虽皆沾染大率乡僻居其十之六，城市居其十之八，人人尪羸，家家晏起，怠惰颓靡，毫无朝气。在官者不修其职，食力者不勤其业，循此不已，贫者益贫，弱者益弱。数十年后，晋其危乎！惟种之多者，故吸之便，此必禁者三也；洋药税为海关大宗，今日方议重征，藉禁外贩，以为坊民正俗之谋。若内地不禁，听其蕃滋，何以关远人之口？此必禁者四也。查晋省莒粟之所以不能禁者，一由于上官之禁弛不一，朝令夕更；一由于官吏之视为利源，图收亩税。祛此二弊，必有成效可观。臣愚以为，禁之有方，行之有渐，先膏腴而后硗确，先腹地而后边厅，责之于乡保，毋徒付之于吏胥，遏之于播种之先，毋徒毁之于扬华之后。力禁苛扰，严定考成，感民以诚，未有不自动。虽不能遽绝根株，而少一畦之莒粟即多一口之馀粮矣。至于官绅将卒，臣已多方劝戒，现仿李鸿章天津所设之戒烟局，延医购药以冀广起沉痾。属官有嗜好废事者，分别撤任停委，勒限戒断，许令自新。弁勇勒限戒断，不悛者汰黜。学校诸生，由学臣随时董戒，冀以渐摩观感，徐收移风易化之功。疏入报闻，仍著随时查察，有犯必惩。

三十一年，春正月，户部奏洋药土药害人耗财，拟严定分年禁法。画一办法，从之。中国鸦片之祸，弥漫已臻极点。始焉禁卖禁吸禁种，终于无效；近年以财政紊乱，倒行逆施，借口变通之法，略加征税，使购买不易，吸食者自寡，于是各直省中土捐、膏捐，所在皆是。顾又格于洋关则例不能重征阻碍土药之销路故有税亦与无税等时西人讥中国之风俗谓不去其五经毒鸦片毒终无望治之一日一时臣工皆耻之纷纷条奏禁烟办法如驻义使臣许珏奏陈义国榷烟大略拟请先就土药整顿试办直督袁世凯奏覆征收膏税事体繁重请飭户部筹议办理先后下部然诸条陈办法皆主张以征为禁谓虽多取而非虐其实则征而已禁未能也况局卡愈密绕越愈多岐路未易稽查私土因而充斥不惟禁不能禁而且征无从征部臣有见于此与其求征税之方税仍不旺不若行禁烟之策害可永除因仿日本治台湾禁烟法由官熬膏握准吸准买之权拟定分年禁法筹一办法入奏谕照所议行

三十二年秋八月谕禁鸦片定限十年以内将洋土药之害一律革除净尽著政务处妥议严禁吸食并禁种莒粟章程旋会议政务处大臣筹拟禁烟办法十条具覆一限种莒粟以净根株二分给牌照以杜新吸三勒限减瘾以苏痼疾四禁止烟馆以清渊薮五清查烟店以资稽察六官制方药以便医治七准设戒烟会以宏善举八责成地方督率绅董以期实行九严禁官员吸食以端表率十商禁洋药进口以遏来源疏入奉旨颁行

三十三年秋九月以睿亲王魁斌庄亲王载功都御史陆宝忠副都御史陈名侃等吸食鸦片情形显著将所任差缺照章先行派员署理如能迅速戒断仍准照旧供职

三十四年春二月外务部奏覆陈筹议禁烟与各国商定办法六条请飭民政部度支部速行

会订稽核章程严定考成通颁直省责成各督抚实力奉行从之上年十月闲外部与英使妥商禁烟办法六条一洋药分年递减以五年内进口疑数折中定额自一千九百七年以后年减一成十年净尽一印度之噶里古达为洋药总汇之地由中国派员前往监视拍卖打包得知发运洋药实数一土药税每担现已加抽至一百十五两洋药力量倍于土药而原有之釐税并征祇一百十两应照原定之税数加倍征收以征为禁一香港为洋药熬膏之地应由港督协助严禁烟膏不得运入中国境内一租界内烟店烟馆及各吸烟之所并各行店售卖烟具其清查筹禁之法照中国地方官办法一律办理一吗啡及吗啡针之害设法禁止已载在中英中美新约惟须有约各国应允照行方可举办后经双方议定第一节印度洋药以出口五万一千箱之数为定额按年递减五千一百箱自一千九百零八年（光绪三十三年十二月）为实行之始第二节申明中国派往印度之员祇查发运洋药实数并不干预他权第三节加增洋药税釐俟土药统捐及土药价值调查明确后再行续商第四节声明香港烟膏禁止出口入华并禁止烟膏由华入港之贸易第五节如华官在各项租界外实行禁止烟馆及吸烟处所各口岸租界内工部局不俟华官之请自行设法办理第六节禁止运入吗啡及吗啡针一俟有约各国全允即应照行后由外部照会法葡荷三国公使严禁越南澳门南洋各岛转运洋药入口惟波斯为无约之国部中咨行税务处转飭总税司筹拟办法其禁止吗啡吗啡针运华亦由部中照会各国应允至是奏闻疏入依议三月派恭亲王溥伟协办大学士鹿传霖协办资政院事务景星丁振铎充办理禁烟大臣秋七月以内阁学士文海载昌夙患烟应朦混注册均著革职

末帝宣统元年春二月申谕禁烟办法 冬十二月颁行禁烟条例

二年秋八月以吉林等省清除种烟未净该督抚均交部议处先是因各省疆吏奏请变通禁烟年限政府恐各省奏报不实乃飭令度支部派员赴各省密查至是覆称吉林黑龙江河南山西福建云南新疆等省均经奏报一律肃清其实并未净尽各督抚均交部议处其山西吉林云南等省从前保案均撤销 冬十二月申严烟禁

三年夏四月因外务部与英使续定禁烟条件飭各省督抚迅将禁种禁吸禁运各事认真整顿

卷七十五、宣统嗣立

德宗光绪三十四年，冬十月，授醇亲王载沣为摄政王。帝自上年入秋以来患疾，不御殿者两载余，上月达赖喇嘛勒朗结来朝二十日，帝犹勉御仁寿殿接见。是月初六日，复御紫光阁赐宴，至初十日，太后万寿节，勒朗结率徒祝嘏，帝已疾甚，不能亲诣行礼，但传旨加封勒朗结为诚顺赞化西天大善自在佛。至二十日，太后亦不豫，乃命载沣暂设朝政。命载沣之子溥仪在宫内教养，并在上书房读书。时太后知帝疾将不起，而未有储贰，乃于是月二十日取溥仪入宫，命皇后鞠之。生三年矣，其母为醇邸福晋，故大学士荣禄女也。太后寻命庆王奕劻往奏帝。帝曰：‘立嗣以长，不亦顺乎？’继闻醇王摄政，帝喜曰：‘付托得人矣！’帝崩，时是月二十一日酉刻也。遗诏略曰：‘朕躬气血素弱，自去年秋间不豫，医治至今，日以增剧，以致弥留不起。顾念神器至要，亟宜传付得人，兹钦奉皇太后懿旨，以摄政王载沣之子溥仪入承大统为嗣皇帝，必能仰体慈怀，钦承付托。中外臣工，务当恪尊前次谕旨，各按逐年筹备事宜，切实办理。庶几九年以后，颁布立宪，克终朕未竟之志！’太后命以嗣皇帝承继穆宗为嗣，兼承大行皇帝之祧。以摄政王为监国。

尊太后为太皇太后，兼祧母后为皇太后。

太皇太后叶赫那拉氏崩，时是月二十二日未刻也。安徽马炮兵变，驻安庆马炮队官熊成基欲乘秋操起事。是月二十六日黎明，率众袭城。城中严守不得入，又为江中兵舰所攻，遂向西北桐城、枞阳等处退走，众渐溃散。成基复于哈尔滨被捕，死于吉林。十一月，嗣皇帝即位，以明年为宣统元年。上大行皇帝尊谥，曰：‘同天崇运大中至正文纬武仁孝睿智端俭宽勤景皇帝’，庙号：‘德宗’，陵曰：‘崇陵’。上大行太皇太后尊谥曰：‘孝钦显皇后’颁示监国摄政王礼节。

设立变通旗制处。上太后徽号曰：‘隆裕皇太后’

命奕劻以亲王世袭罔替，并加恩王公大臣有差。定谕旨由军机大臣署名之制。

十二月，另编禁卫军，由监国摄政王兼统。大学士王文韶卒，予谥文勤。

收还京汉铁路。命军机大臣袁世凯开缺回籍养苛。命那桐在军机大臣上学习行走。以外务部右侍郎梁敦彦署理外务部尚书。

末帝宣统元年，春正月，邮传部尚书陈璧以用款靡费，调员冒滥革职。

以东三省总督徐世昌为邮传部尚书。三月，各国派送德宗景皇帝梓宫专使觐见。

德宗景皇帝梓宫奉移山陵。追予故户部尚书立山，兵部尚书徐用仪，吏部侍郎许景澄，内阁学士联元，太常寺卿袁昶谥。夏四月，命贝子衔镇国将军载振往日本国，法部尚书戴鸿慈往俄国，答谢派遣专使来送梓宫。

命各省财政统归藩司，或度支司综核，其除一切局所，予限一年次第裁撤。

五月间，复前协办大学士翁同和原官。

监国摄政王暂行代理海陆军大元帅，并先行专设军咨处。六月，以督办津浦铁路大臣吕海寰失察，路局局员李德顺营私，开去差使，以邮传部尚书徐世昌代之。

秋七月，派两江总督张人骏为南洋劝业会会长。与日本订立东三省五案条款成。日本因安奉铁路改筑事，自由行动，交涉几致决裂，至是，并其他诸案及吉长贷款契

约，订立条款完案。八月，大学士张之洞卒，予谥文襄。

福建福州大火大风，死者百余人，伤者二百余人，船舶沉没者二千餘艘。

命法部尚书戴鸿慈在军机大臣上行走。

九月，以军机大臣鹿传霖为大学士，吏部尚书陆润庠协办大学士。冬十月，直隶总督端方以恣意任性，不知大体，革职。端方因送德宗梓宫，令人在太后行宫外摄影，为散秩大夫李国杰所劾，乃坐以焚化冥镪时，乘輿横冲神路，遂革职。

大学士孙家鼐卒，予谥文正，以陆润庠为大学士，戴鸿慈协办大学士。

十二月，谕诫建言诸臣，不得怀挟私见，及毛举细故，不知大体。

赏给游学专门詹天佑、严复等进士、举人有差。监国面奉太后懿旨，明年正月初十日万寿，皇帝在宫内行礼，停止庆贺。时太后居延熙宫，大内御花园之东有土阜一区，向以日者之言，不宜建筑。帝登极后，于此兴修水殿以奉养太后，四围浚池引玉泉山水环绕之。殿凡九层，层九间，又四角各有一亭，计三十九间。以铜为栋，以玻璃为墙，四望空明，入其中者，如置身琉璃世界。墙之夹层中，置水蓄鱼，下层地板亦以玻璃为之，俯首而窥，池中游鱼一一可数，荇藻参差，青翠如画。地板又可开阖，时或揭起，驾小舟直达宫外。中层、上层亦用玻璃，上层顶上，更有玻璃缸数事，为蓄鱼之需。楼梯皆置宫外，由东南亭内曲折环绕渐升而不自知也。太后自题扁额曰‘灵沼轩’，而俗呼曰‘水晶宫’。闻此次工程费帑已达百万，以上，逊位之时，尚未毕工也。

二年，春正月，革阿旺鸡布藏吐布丹甲错济寨汪曲却勒朗结达赖喇嘛名号。勒朗结自三十年六月避英兵至库伦，朝命革去达赖喇嘛句号，及勒朗结折回西宁。三十四年，诏谕其来朝赐加封号，上年，并派员护送回藏。至十二月，驻藏大臣赵尔丰忽电告政府，谓勒朗结与俄国订结协约，请政府牒告各国使臣，谓该曰非经中国皇帝认可，则作为无效。时尔丰之兄尔巽督川，即派大军入藏，以为尔丰干涉藏政之后援。是年正月初三日，川兵至拉萨，勒朗结即于是夜出奔印度，至是命褫去其法号，令尔丰别选灵异幼童择立，以为达赖。勒朗结诉政府之暴于英，英公使质于外务部，部答以达赖谋叛，故黜之，吾国对于西藏政治，无所变更也。勒朗结复诉俄，英、俄皆啧有烦言，而印度佛教徒方拟举空前绝后之盛仪以欢迎勒朗结云。

戴鸿慈卒，以邮传部尚书徐世昌协办大学士。

命内阁学士吴郁生在军机大臣上学习行走。

定嗣后内外文武满汉诸臣陈奏事件，一律称臣。

二月，山西交城文、水两县人民因禁烟暴动，旋讨平之。广东党人汪兆铭等谋刺监国摄政王，事泄，被获，命永远监禁。先是，兆铭等均定为死刑，时监国鉴于党祸日夕相寻，恐益重其怒，乃作释怨之举，博宽大之名。肃王善耆又从事赞成，遂飭法部以扰害治安定拟判决二人，皆处以无期徒刑，加重永远禁锢。三月，湖南省城饥民暴动，焚毁巡抚衙门及教堂学堂。先是上年，长沙府属秋收歉薄，是年奸商复运米出省，售于外人，乡民阻境不获，米价因之而昂贵。是月初五日，饥民数百拥之抚署，要求平糶。巡抚岑春煊议劝绅捐，先办义糶。劣绅王先谦首先梗议，叶德辉积谷万馀石，不允出粮，遂至变起。莠民痞棍，聚至数千，纵火焚署及教堂学堂。

。先谦等仍归咎抚臣激变，电请简易巡抚，孔宪教、杨巩倡议，拥戴藩司庄赓良。由少数劣绅推为巡抚，朋陷抚臣，不遗余力。事间，朝命春冀开缺，派湖北藩司杨文鼎前往，暂行署理湖南巡抚，旋命湖广总督瑞澂会同文鼎，彻底查究。复经查明，地方文武办理不善，及绅士挟私酿乱，奏请分别惩儆。疏入，文武各员，春冀、赓良，巡警道赖、承裕，盐法道柳延熙，长沙协都司贵龄，左营守备周长泰，浦防所所长游击龚培林，警务委员知县周腾均著革职，馀降调革留察议。劣绅前国子监祭酒王先谦，分省补用道孔宪教均著降五级调用。吏部主事叶德辉，候选道杨巩均著革职，交地方官严加管束。裁奉天巡抚缺。

夏四月，彗星见于西北，月馀乃灭。命邮传部佐侍郎汪大燮出使日本国。五月，江苏沛县男化为女。县城东八十里乔厉庄潘氏子，年六岁于夜分时惊哭数声，次晨自言下体有异，母验之，已变为女。予进士馆游学毕业员项骧等奖励有差。六月，山东莱阳、海阳县人民因抵抗苛税暴动，为官兵杀伤数百人。先是，民间以铜元兑纳钱粮皆按七折扣算，是年春，海阳县方奎开征更按五折扣算，加以火耗、轻封、封尾、盐金、德麦诸陋规，正供一两。民间所纳需大钱三千七百八十文。民不堪命，乱机遂萌。莱阳则以开办地方自治，绅士王圻等肆意苛征，履亩重税。过于正供，间架有税，有头有税，牛马亦有常捐。民间稍有抵抗，县官朱槐之复袒劣绅，苛敛不遂，淫刑以逞，及至酿成祸变。复归罪于曲思文，谓其煽众谋乱。调兵剿办，劫杀淫暴，甚于盗贼。顾犹以兵力之不足，复请朝旨派第五镇练军驰赴助剿凶残劣弁。肆其锄戮，死伤者几及千人。

六月，谕飭各督抚慎选牧令，有鉴于莱阳、海阳之祸也。秋七月，革开缺江西提学，使浙路总理汤寿潜职，不准干预路事。寿潜为浙江路事，电军机处诋邮传部侍郎盛宣怀为苏浙路罪魁祸首，不应令其回任，请收回成命，或调离路事以谢天下。廷旨，斥其荒谬、狂悖，予严谴。大学士鹿传霖卒，予谥文端。设各省交涉使。

命外务部右丞沈端麟出使奥国。八月，命外务部右丞刘玉麟出使英国。

命陆军部尚书荫昌兼充训练近畿各镇大臣。

命近畿陆军均归陆军部直接管辖。裁撤近畿督练公所。

改四川盐茶道为盐运使，并设奉天盐运使。

以徐世昌为大学士、吏部尚书，李殿林协办大学士。革江海关道蔡乃煌职，因度支部奏参乃煌于办理款项罔利营私，居心狡诈，不顾大局，令革职。

九月，四川定乡兵变，窜陋云南中甸，旋被官军剿平。

赏给游学毕业生吴乃琛等进士、举人有差。

予进士馆游学毕业员钱崇威等奖励有差。

赏给陆军游学毕业生黄承恩等举人，并授军职有差。

命散秩大臣一等萧毅侯李国杰出使比国。

冬十一月，赏给陆军游学毕业生李宣倜等举人，并授军职有差。

赏给北洋大学堂毕业生冯熙敏等进士，并授职有差。

十二月，云南大姚县人民暴动，县城失守，旋为官军剿平。派东三省总督锡良、直隶总督陈夔龙、两江总督张人骏、湖广总督瑞澂、云贵总督李经义参订外省官制。

赏给游学陆军毕业生李兆纶等、林凤游等，工科毕业生陈祖良，法政科毕业生郑际

平举人，并授职有差。派贝子衔镇国将军载振为头等专使往英国，贺英君加冕。时英人以载振为皇室疏族，于政界又不占重要之位置，且以载振纳妓杨翠喜一事，故尤轻视之。及载振抵英，其坐席在三十六位，厕于埃及使之前，印度使之后，与亡国贱奴等视。载振归，政府愤甚，乃一归咎于驻英使臣刘玉麟，谓系公文中未将贵州叙出及其他揭词多有不合，严旨申饬之。

三年，春正月，因英兵占据片马，命驻英使臣请英政府撤兵。中英缅甸界务久未解决，上年秋间英派兵驻片马，云贵总督及云南绅民屡请力争，外务部命驻英使臣刘玉麟速与英政府交涉。东三省疫。二月，四川德格、春科、高日三土司改流，设边北道、登科府等官，并改巴塘、打箭炉为巴安、康定二府，设康安道。

裁撤驻藏帮办大臣，改设左右参赞。派全国军队训谕六条。黄兴等起事于广州，毁总督衙门，被官军击退，死者七十二人，兴走还香港。先是，有广东香山人孙文始创兴中会，潜谋革命。光绪二十一年十月，谋起事于广州，事泄，走海外，会员陆皓东等死之。文至伦敦，为驻英使臣龚照瑗所捕，因英政府干涉，始得释放。又有湖南长沙人黄兴者，与陈天华、宋教仁等创华兴会，二十六年十月谋举事于长沙，事泄，走日本。寻文至日本，乃与兴等合创同盟会，密购军火，纠合会党，思于闽、广、云南起事。三十三年十一月，由越南进攻广西镇南关，夺石辅山炮台三座，旋以军火不济而败。三十四年三月，兴又自越南海防攻入云南河口、南溪等处，分兵攻蛮耗、开化、蒙自等处，旋亦败退。至宣统二年正月，广东新军因与巡警交哄起衅，兴等又乘机起事，为防击毙数百人，余众溃散。是月二十九日午后四时许，兴率同志百余人往攻督署，时署中防范极严，不得入。官军蜂拥至，势不敌，遂败，死七十二人，兴缢城出渡香港。

夏四月，江苏咨议局与两江总督张人骏争预算案，全体议员辞职。

谕以本年秋季调集禁卫军及近畿各镇陆军，在永平府大操。吉林省城大火，历一昼夜始熄，城内官钱局、陆军粮饷局、高等审判厅、检察厅、财政局、官书局、图书馆皆片瓦无存，监狱烧毁殆半，以度支司署为尤甚。民居被毁约万余户，财产损失约二十余万，人口遭难约三分之二。

六月，太后因帝七月内在毓庆宫入学读书，派弼德院院长陆润庠等授读。

黑虹见天，越九宿复见，起自西北，蜿蜒至东南而没。闰月，分行广东禁财条例。安徽、江苏、江西、浙江、湖南、奉天、黑龙江大水。漠阳大火。是月十六日晚起，一时水际并焚，至翌午五时始熄，计际上被焚之屋八千余所，水中被焚之船亦千余艘，舵主焚毙及溺死者百余人。木星见，光射东南。命裁各省府治首县。

秋七月，监国摄政王校阅禁卫军。八月，民军起事湖北之武昌，湖南、江西、陕西、贵州、山西、云南、浙江、江苏、广西、安徽、广东、福建、四川先后响应。

九月，乙丑朔，日食。乙卯望，月食。冬十二月二十五日，下诏宣布退位。

卷七十七、假饰立宪及组织贵族内阁

末帝宣统元年，春二月，降谕宣示朝廷一定实行预备立宪。先是，光绪三十二年宣示立宪，以九年为之预备。数年以来，政府不职，百事堕废，筹备之事，有名无实。至是，以帝初立改元，欲一新图人之耳目，故为无聊之颁布，以自文饰。

夏五月，命陕甘总督升允开缺，以奏阻立宪故也。

秋八月，以九月初一日各省咨议局开议，降谕诰，诫议员及各督抚。

冬十一月，革甘肃布政使毛庆蕃职，因玩误宪政也。十二月，直隶各省咨议局议员孙洪伊等请速开国会，不允。时国人见时局日亟，金谓非亟设监督机关，无以促政府之改良。由洪伊等联合二十馀万人，上书政府，籲请缩短立宪期限，早开国会。旋奉谕旨，俟将来九年预备业已完全，国民教育普及，届时必毅然降旨，定期召集议院。颁行府厅州县地方自治章程。颁行法院编制法。

二年，夏四月，颁行现行刑律。颁行币制则例。中国币制单位定名曰‘圆’，暂就银为本位，以一圆为主币，重库平七钱二分。另以五角、二角、五分一角三种银币，及五分银币，二分、一分、五釐、一厘四种铜币为辅币。圆、角、分、釐各以十进，永为定价。五月，咨议局议员孙洪伊等并各省旗籍、各代表请速开国会，不允。上年国会请愿见拒政府后，而民智愈固，至是，以三十万之大众为第二次之请愿，各代表上书中曰：先帝下九年开国会之诏，全由当时时势与今不同。先帝犹是尧步舜趋之时，我皇上已处禹驰汤骤之世。是月二十一日，奉旨，仍俟九年筹备完全，再行降旨定期，召集议院。冬十月，各省咨议局及各省人民代表等，请速开国会，组织责任内阁，命缩改于宣统五年实行开设议院，并命即行组织内阁。时国人知舍国会与责任内阁，无以救亡。再联合各省为第三次请愿之举。各省督抚亦是年九月二十三日，合词电奏；资政院于同月二十六日，决议上请。至是月初三日，始有诏，允于宣统五年召集议院，并先将官制厘订；须即组织内阁，编订宪法。时论谓政府舍国会而先取内阁，不知国会未开以前，所谓责任内阁者，果何所附属？且督抚电奏，人民请愿，皆云责任内阁，而诏中删去责任二字，不知无责任之内阁，吾闻之有之也，既已久矣，何俟宣统三年而始成立，何俟再以诏书为之规定？谕所有各省代表人等，著民政部及各省督抚剴切晓谕，令其即日散归，各安职业。派贝子溥伦、镇国公载泽，允纂拟宪法大臣。十一月，资政院奏大臣责任不明，难资辅弼，不省。先是，资政院屡有书责问军机责任，军机公然以不负责任覆之，资政院遂具书弹劾军机大臣责任不明，请别组织责任内阁。奏入，奉旨：“朕维设官制禄及黜陟百官之权，为朝廷大权，载在先朝钦定宪法大纲，是军机大臣负责任与不负责任。暨设立责任内阁事宜，朝廷自有权衡，非该院总裁等所得擅领，所请著毋庸议。”是谕乃由军机署名，盖假诏旨以为护符也。命民政部步军统领衙门，将东三省要求速开国会代表，送回原籍，不准逗遛，并命各督抚开导弹压，如有违抗，查拏严办！命宪政编查馆迅速纂拟内阁官制。十二月，颁布新刑律暨暂行章程。颁布宣统三年预算案。发还天津人温世霖于新疆，以其在津组织四次国会请愿也。

三年，春正月，申谕各省停止刑讯。三月，颁布全国军队训谕六条。夏四月，颁布内阁官制，设立内阁，以军机大臣庆亲王奕劻为总理大臣，大学士那桐、徐世昌为协理大臣，外务部尚书梁敦彦为外务大臣，民政部尚书肃亲王善耆为民政大臣，度支部尚书镇国公载泽为度支大臣，学部尚书唐景崇为学务大臣，陆军部尚书荫昌为陆军大臣，郡王衔贝勒载洵为海军大臣，法部尚书绍昌为司法大臣，农工商部尚书贝子溥伦为农工商大臣，邮传部尚书盛宣怀为邮传大臣，理藩院尚书寿耆为理藩大臣，均为国务大臣，裁撤内阁军机处、会议政务处，旧设内阁大学士、协办大学士，仍次于翰林院。时内阁虽成立，而为奕劻所组织，阁虽又以皇族居多数，于是国人皆晓然其意旨之所在，而称之为“贵族内阁”设立弼德院。

颁布内阁属官制暨内阁法制院官制，裁撤宪政编查馆、吏部等衙门。六月，都察院代奏直省咨议局议员，请另行组织内阁，不许。时国人以皇族组织内阁，不合君主立宪公例，由咨议局议院请都察院代奏，奉旨以：“黜陟百司，系君上大权，议员不得干预！”改礼部为典礼院。命溥伦、载泽纂拟皇室大典。

命裁各省府治首县，设立地方审判厅。秋九月，谕撤销内阁暂行章程，再再以亲贵充国务大臣。时湖北武昌民军起，湖南长沙、江西九江、陕西西安、贵州贵阳、山西太原同时响应，国内人心瓦解。资政院疏称内阁应负责任，国务大臣不宜委任懿亲。是月初九日奉旨：“懿亲执政与立宪各国，通例不符。我朝定制，不令亲贵干预朝政，实深合立宪国家精义。同治以来，国难未纾，始设议政王以资夹辅，相沿至今。本年设立内阁，仍令王公等充国务大臣，原属一时权宜之计。朝廷本无所容心，兹据该院奏称皇族内阁与立宪政体不能相容，请取销内阁暂行章程，实行内阁完全制度，不以亲贵充当国务大臣等语，所陈系为尊皇室而固国基起见，朕心实深嘉纳，一俟事机稍定，简贤得人，即令组织完全内阁，不再以亲贵充国务大臣，并将内阁办事暂以符宪政而立国本。”

资政院奏请颁布明诏，将宪法交院协赞，允之。庆亲王奕劻等奏，奉职无状，请立予罢斥，允之。奕劻开去内阁总理大臣，那桐、徐世昌开去协理大臣。镇国公载泽等奏国务重要，请另简贤能，以符宪政而资治理，允之。载泽等均各开去国务大臣。授袁世凯为内阁总理大臣。

卷七十九、铁路国有政策

末帝宣统三年，夏四月，宣示铁路政策。干路均归国有，枝路准商民量力酌行。从前批准铁路各案一律取消，如有抵抗，即照违制论。铁路国有，发之者，御史石长信。主之者，邮传大臣盛宣怀，此为清内阁成立第一政策。先是，宣怀及载泽等，拟借英、美、德、法四国千万镑，载泽尚犹豫，宣怀力怂恿之，借约遂成立。至是，以贷款筑路宣示天下。而日本人亦要求其政府，愿得有债权，宣怀复主张借日款千镑以调停之。命既下，直省人民以铁路商办，已奉有成案，拟各举代表，赴京抗议。以侍郎衔端方充督办粤汉、川汉铁路大臣，三品京卿郑孝胥为湖南布政使。时湘、粤、川、汉各省士民，皆谓粤汉铁路始由盛宣怀私售美商合兴公司。光绪二十八年，各省人民争之，不惜竭血汗之资，惨淡经营，仅得收回集股商办。今政府乃以国有政策与民争利，是不啻夺我生命财产付诸外人，于是联合会抗争。语愿上达，而政府已入宣怀言，主张用兵威以压制人民，会员群议戒严暴动，但俟咨议局开常年会，一律不赴召集。各省工商亦同时罢业以示抵抗。政府患之，以端方尝抚湘鄂，欲倚以笼络两省人士，乃起复端方为督办粤汉铁路大臣，而孝胥盛倡国有政策，著论载宪报。至是，遂有孝胥为湖南布政使之命。命停止四川、湖南两省铁路租股，旋又允湖南京官奏请，停止因路抽收之米盐捐及房捐。五月，湖南巡抚杨文鼎代咨议局奏称湘路力能自办，不甘借债，奉旨严行中饬。时湘省保路风潮激烈，万众一心，文鼎虑有他变，因甘言抚慰，许以局议上复，密电政府，描绘开会情状，谓有匪徒从中煽惑，非挟雷霆万钧之力势，不足示威。宣怀亦力赞其说，乃有格杀勿论之谕。署四川总督王人文代咨议局奏称铁路改为国有，请饬暂缓接收，奉旨严行中饬。先是，川路公司得湘鄂争路函电，全体赞成，川省京官复再三集议，坚持反对国有及收回股本之说。日本留学界又力主‘路存与存，路亡与亡’之议，川人议以不输租税为抗制，人文亦以政府显拂輿情，慨充代表。时宣怀以四国借款，势成骑虎，因运动载泽力言于监国，遂奉旨以铁路改归国有，势无反汗，且籍口上年川路公司人员亏耗巨款，并有剥削脂膏，徒归中饱，殃民误国，人所共知等语。川中輿情，日益激愤。宣布川粤汉铁路收回国有详细办法。御史赵熙、欧家廉奏劾宣怀藉债卖路等二十馀款，不报。时广东同乡京官联署劾宣怀蒙蔽朝听，侵权违法。湖北京官胡汉章等联名抗争，历数宣怀罪状，鄂咨议局亦刊布传单，召集会议，至者数千人，竞筹对付之策。赵熙等因疏以入告，政府仍不为动，仅将原折发交宣怀阅看而已。邮传部奏上英、美、法、德四国代表所议川汉、粤汉铁路借款合同，命盛宣怀署押。时宣怀密与载泽、端方议定铁路办法，以已成铁路为根据，约分四大纲：自京汉南达粤汉为南干，京张北接恰克图为北干，京汉东接齐齐哈尔达珲春为东干，正太西接同蒲至伊犁为西干。载泽乃密告监国，请于借款合同，趣期署诺，复通电各省，严禁开会妄议路事。粤路公司致电邮传部，请收回铁路国有成命。先是，粤人以各省争路无效，于是月初十日大集股东于公司，筹策对付。主席朱伯干及各地代表采摭輿论，定义五条：‘一、万众一心，保持商界之局。致电邮传部力争，并请粤督代奏挽回。联合湘、鄂、川三省同志，坚持至竟；二、倘政府甘悖先朝成命，遣官强占粤路，粤人宜协力同心，妥筹对付；三、拟先就公司置机关部；四

、约十五日开第二次会议；五、商办宗旨既定，董事所拟五策[1]作为无效，毋庸投票公决。’议既定，至是电部力争。旅美粤人亦开会谋对付之法，语极愤激，有云政府借债筑路，名为国有，直为各国所有，自弃其人民以与各国，乱命断难盲从；又曰粤路股银皆斯民汗血，当执定先朝成案，有劫夺商路者格杀勿论；又曰：路亡国亡。政府虽欲卖国，我粤人断不能卖路，并倡言国必自灭而后人灭，此后结局尚未可知，万一决裂，侨民当谋种种对待云。四川议员萧湘、李文熙，湖北议员汤化龙、张国镨，湖南议员谭延闿、黎尚雯、罗杰等联合争路。先是，川绅甘大璋迎合政府，竟私将川路股款呈请作为附股，众大愤，不期而会者十万人，电请同乡京官削大璋名籍，并予惩戒，以平人心。萧湘等以路事联系全局，非群策群力不为功，乃于京师全蜀学堂延鄂、湘两省京官组织铁路联合会，一致进行。延闿等亦电请都察院代奏，严劾盛宣怀罪状。化龙等以中书郑万胆所上争路公呈无效力，遂幡然变计，隐收民有实效，拟定商民股款，不向政府索回。作为路股，要求发给股票，并要求邮部许三省商民立查账会，有稽核度支之权。立论至为和平，而宣怀不许，盖意在把持，不容商民有查帐权利也。两广总督张鸣岐严示解散粤路股东会。歧于粤路公司开会筹议路事后，复使在籍编修江孔殷授意董事等，运动金融业抵押股票，得三十万，欲获投票多数以压制股东，会潮汕铁路总理费景棠莅会，见局董议案，愤不能平，众遂推景棠为主席，复订期会议。景棠草定议案，翌日，鸣岐出示禁止开会，取销议案。粤人大愤，争持纸币赴官办银行易银。华侨闻风，私议将股票属之外人以为抵制，事虽未行，自是不复信任政府。邮传大臣盛宣怀与督办铁路大臣端方议订铁路权限。端方罗致湘、蜀有力士绅金肇康、乔銜搢及门生故吏之久官两湖、夙有声望者，高凌霨、赵彦滨、冯启君等，箕收效于无形，私谒奕劻，言视事后，酌用本省办路员绅，特在泯除意见。奕劻深然之，许其便宜调遣，令宣怀与文约法三章，籍清权限：‘一、凡曰省铁路交涉，统归督办大臣负责，邮部不必过问；二、以前借款交涉，归邮部担任，与督办大臣无涉；三、督办大臣有奏调办事人员特权，邮部不得干预。’既定议，端方始摒挡出都，电各省疆吏，商定收买股票办法，不愿意者，不予强迫，换给国家股票，性质与商办略同，盖思利用四省士绅，压制商民也。湖南教育会会长黄忠浩等陈请咨议局公讨盛宣怀卖路误国罪状。“湘省自铁路事起，学堂相继罢课，人情日益激昂，巡抚杨文鼎举格杀勿论之谕，益用压力，严禁学生干预路事。忠浩闻之大愤，以路事破坏于宣怀，宣怀一日不去，路事一日不定，乃上书咨议局，请向政府力争，略谓咨议局章程、职员权限第五款：议决本省担任义务之增加；第六款：议决本省章程规则之增删修改；第七款：议决本省权利之存废。查粤汉湘境铁路向美国合兴公司赎回，湖南派出赎路款七百馀万两，奏由盐斤口捐项下解付，此实全湘负担最大之义务。历经五年，许收二百八十馀万两，自奏归商办后又收集民股二百馀万圆，嗣后奏准照川省抽收租股一百二十八万圆，房捐股四万馀圆。此项股票，定为优先、普通二种，按年保息六釐，将来公司获利，按成分摊，优先股则另提花红奖励，此为全湘应有权利，亦即湘省单行事件。今干路收归国有，自积极言之，固系国家行政，属于资政院应议之范围，然因行此政策而取销从前之商办公司，是就消极而言，实系咨议局章程所列职员权限第五、六、七款，应由咨议局议决者也。此次干路收归国有，但云定为政策，其

属于国家行政者，既不由资政院通过，其属于地方权利义务者，又不交咨议局议决。新内阁制甫颁，总协理方辞职，而盛宣怀即运动干路国有，定为政策，取销三省公司之铁案，罔上行私，破坏宪政，百喙奚辞？考各国议会，问于变更成法之案，视一切议案为特重，良以法律为人民生命财产之保障。若已成之法可依随时命令更改，人民生命财产必受莫大之危险，此为野蛮专制之国有之，号称‘立宪’，岂宜出此？忠浩等以为咨议局章程，既为先朝钦定，即为内外臣民所共守。此次盛宣怀荧惑圣听，擅借外债，横取商民现营实业，谬称定为政策，病国殃民，固不得信。即欲定为政策，亦须先由内阁提议，更改先朝钦定章程，交资政院通过，始得实行。今章程自章程，政策自政策，成法破坏，民无适从，此事不得解决，将来咨议局章程，皆可消灭。即就路事而言，民有干路，既可随时取消；民有枝路，亦何不可随时取消？现在国势阽危，正赖民力共营实业，此次取消三省商办成局，名为确定政策，不啻遏绝人民实业生机。咨议局人民代表，竭无限脂膏，费无穷手续，倘章程无效，人民安所讬命？诸公对于路事，既已函电交驰，倘所争无效，即请将上项理由一面呈请府院代奏，一面速呈资政院。乞宣示中外，此后咨议局章程，何条作为有效，何条作为无效，并请严治盛宣怀破坏法律、误国殃民之罪！书上，为文鼎侦悉，急电鄂督瑞澂，询对待之策，瑞澂覆电，于路事不置一词，但谓对于军警各界，亟宜严备，免致革党乘机煽惑，速派楚有兵轮上驶，冀以压力施诸湘民。宜昌宜万铁路分公司以停工激成民变，湖广总督瑞澂檄宜昌镇总兵潘瀛、荆宜施鹤道吴筠孙会剿。川汉铁路，宜万一段，于上年冬间开工，筑成三十馀里，工人数千，大半土著。自干路国有之说起，各省路局以死力争，而亦万分公司希政府意，遣散工徒，停建筑，股东群起诘问，不答，股东竞赴公司索资，答以路归国有，应由公家筹还，不得向公司质问，众股东益愤，至徒手与执事人相搏，工人和之。公司宇舍器皿立毁，警局遣警兵排解不服，亟白宜昌守，即檄驻宜防营整队往弹压。众怒其以威劫民，陡集数千人，争起抗拒，毙兵士二十馀。绅商闻警，亟事抚慰，始稍引去。亟开会议决，电内阁力争，守道吴筠孙亟电白瑞澂，遂咨陆军统制张彪相机剿抚。彪以潘瀛带兵往。六月，王人文奏劾盛宣怀贷款合同失败各节，不报。先是，盛宣怀与端方电告人文，宜昌、夔州路工，准用美国工程司承办，所需借款，以四川财政作抵。川人大哗，誓死不承认，乃组织保路同志会。既成立，人文莅会，感川人诚挚，慨然曰：“诸君热心爱国，吾何惜一官？誓与川人相终始！”遂具疏劾盛宣怀误国殃民罪状。疏入，留中。闰月，瑞澂奏请明定路线以安人心。报闻，端方抵鄂，惑于川人邮传部参议李穆勋之言，拟改川汉路线。鄂境初拟起宜昌讫汉阳，矩改起宜昌讫广水，使穆勋为川路总办，并委江西道员吴清铭调查三省路线。鄂中舆论大哗，商会因其书抗争，略谓鄂境路线，儿竟起宜昌讫广水，抑起宜昌讫汉阳，关系全省命脉，必须取决公论。设改为宜广，运输极为不便，经济交通，亦多窒碍。民情疑惧滋甚，并附呈宜汉路线简明图说，要求瑞澂代奏，飭部明白宣示，以安人心。瑞澂本与端方不相能，得书大喜，思借以挠端方，遂据入以告。事下邮部，盛宣怀故左袒端方，适端方电至，述抵鄂种种情形，并谓部中前定收路办法，多所不协，须详加商改。又言洋商承工，督办必须参预。宣怀忌其争权，遂疏之，自是端方孤立，益郁郁无所展布。王人文以川人争路风潮几遍全国入告，请示办法

。严旨申饬。川中保路同志会既成立，不一月，各府县创成立分会以应之，重庆人谓重庆虽外郡，实川路中心点，荟萃商贾，极扼交通，视省会尤重。郡人集会江西会馆，与会者万五千余人，人文默觐民志，激而愈甚，因以众情不顺，据实入奏。宣怀疑人文有意反对，至川人肆意要挟，请旨严饬之。人文得电愤极，是以去就争，而戒绅民勿得暴动。命湖广总督瑞澂、两广总督张鸣岐、四川总督赵尔丰、湖南巡抚余诚格，会办各省铁路事宜。盛宣怀以铁路既归国有，各疆吏不当坐观成败，故有是命。秋七月，四川保路同志会聚，供先帝位，朝夕哭临，闻城学校罢课，商贾罢市，各国驻川领事，要求外务部设法保护。是月初一日，川路公司股东开保路大会，决议罢市，学堂亦停课，商民供德宗牌位举哀。南至邛雅，西迄绵州，北及顺庆，东抵荣隆，号泣之声，达于逮迹。重庆为通商口岸，外人商业所萃，各国领事因照会政府，请设法保护。将军玉崑、总督赵尔丰等联名奏请川路归商办，政府不允。四川保路会代表刘声元上书，请严治盛宣怀罪以谢天下，被逮，寻释之。时川事日亟，川中同乡京官公呈内阁，历陈川路现办情形，并将往来电文汇呈，请迅定办法，以安人心。时保路会代表刘声元抵京，以政府大臣，多与盛宣怀比昵，必为宣怀回护掩饰，不如逮呈监国，民情或可上达。乃两谒监国，皆为门者所拒。声元跪地安门外，俟王至，即拦舆呈递，令逮交步军衙门讯问。统领乌珍监其诚，礼送声元归乡。端方奏劾赵尔丰庸懦无能，命端方带兵入川查办。端方电劾尔丰败坏路事，保瑞澂、袁世凯以代之。而朝旨即命端方赴川查办，端方惧不进，密电商之盛宣怀，宣怀请饬端方自湖北带兵入川。郑孝胥初抵湘，知民气方张，未可以压力胜，因假会议官制，返京师。至是，端方奏调参赞路政，报可。度支大臣载泽、邮传大臣盛宣怀，请以御史赵炳麟总办广东铁路，辞不赴。是月十一日，粤人在香港开保路会成立大会，与会者万余人，公推刘少云、梁楚三代表争路。代表起启程时，开哀送会，会员白衣冠送之。宣怀电令张鸣岐解散保路会，端方遣粤绅顾世清调查粤路。川绅罗崇龄专办广州至三水铁路，复以炳麟为人望所归，电商载泽、宣怀，请以炳麟总办铁路。炳麟不为屈，辞甚坚，宣言政府无论如何劝勉，如何迫趣，决不担任路事。时广州士绅亦拟公举炳麟督办铁路，炳麟亦峻却之。四川保路会代表刘声元再上书，请庆亲王奕劻代奏。谕交步军统领递回四川原籍，交地方官严加管束。声元赍书至庆邸，痛陈川中危迫情形，请将盛宣怀立予罢斥治罪。奕劻心虽不善宣怀所为，究目声元为多事，未几即有押解四川之旨，旅京川人临歧哭送者千人。声元慨然曰：“路亡川亡，川人宜哭川，不宜哭声元。”闻者益恸，解役亦泣涕不已。命赵尔丰剿办争路人民。川人闻端方督兵入川，益愤，是月十五日，公举代表诣都署，求阻端方入蜀，尔丰允为代奏，继以前此代表无效，端方等反资为口实，遂负气不欲再为过问。代表泣恳再四，咨议局副局长罗纶语稍激，众和之，尔丰怒，遂拘保路会会长度支部主事邓孝可，股东会会长编修颜楷，贡生张澜及咨议局局长法部主事蒲殿俊，举人罗纶，民政部主事胡嵘，举人江三乘、叶秉诚、王铭薪等。于署中，人民相率至署哀求释放，统领田徵葵命衙兵开枪，击毙四十余人。尔丰以川人藉争路为名，希图独立，并发布自保商权书，拥戴罗纶为首领，意在变乱，与路事无涉，飞电入告，故有是命。时近省各县民团多为官兵焚杀，死者甚众。命岑春煊前往四川，会同赵尔丰办理剿抚事宜。春煊至武昌，与瑞澂不合，遂

称疾，会尔丰奏剿办得手，朝旨许春煊还上海。瑞澂逮川绅萧湘于汉口，幽之。川咨议局副议长法部主事萧湘，自京至汉，清理路款，瑞澂闻其来，惧其鼓动鄂人，亟遣兵警渡江，就汉口凤台旅馆逮交武昌府看管。

八月，以接收湖北境内粤汉、川汉铁路办理迅速，瑞澂等传旨嘉奖。以袁世凯为湖广总督，岑春煊为四川总督。时武昌民军起，瑞澂遁，武昌、汉阳及汉口，俱为民军所占领，重庆亦告急，乃起复世凯督鄂，促春煊即日销假督川，均著督办剿抚事宜。撤去王人文川滇边务大臣，以赵尔丰代之，又以端方署川督。广东提督李准奏劾盛宣怀病国殃民，端方奏劾王人文姑息酿乱，皆不报。人文当争路掌事，力庇人民，为端方所深忌，准以川人攻宣怀，政府疑其左袒。折上，皆留中。岑春煊条陈川事治本治标二策，下邮传大臣议。春煊在沪，电致政府，论川事当分本标二策。治本者，当申明铁路国有，本以利民，许民附股，未忍使川民稍受亏损，特以办法稍涉操切，且与湘、粤等省显分厚薄，因而激成忿争。为川民宣布德意，有不愿附股者，一律发还；治标者，则宜先撤李穆勋，以慰川人之心。谕交盛宣怀议奏。九月，以违法私行，贻误大局，革邮传大臣盛宣怀职。资政院疏参其违法侵权，激生变乱也，并将内阁总理大臣奕劻，协理大臣那桐、徐世昌，交该衙门议处。命赵尔丰释放因争路被捕士绅，并将王人文、赵尔丰交内阁议处，道员田徵葵等革职、遣戍有差。

[1]一、更换国家股票；二、换领国家公债票；三、愿领回资本者，国家占价归还；四、续缴二三期股银换国家息债票；五、仍援原案坚请商办